

Dill' wen dill' kob daa bzej


Lúcaza'

Dga bzej Lúcaza' na' bseleen lao Teófilona'

1 ¹Ben' zan ba goklall'gake' wzejgake' to to diika' ba gok ladjnto'ni ²kon ka wna ben'ka' bli' bsemi neto', ben'ka' ble'gakile' daa gok dezd nech na' gok lo na'gake' be'gake'n dill'. ³Na' ka'kz nad', ba wñabyoll' nakyen'an gok dezd nech. Na' chakid' nakan wen wzej' li', Teófilo, kon ka gok to to diiki, ⁴kwenche inezilo' daa ba bli' bsemi'gakile' li' nakan dowalj dii li.

Wdixjee anjla' galj Juanna'

⁵Kana' chñabia' rey Heródeza' gana' mbani Judeana' wzoa to ben' wlie' Zacarías, goke' toz bñozka' nonlen dii Abíaza'. Na' xoole', Elizabeta', lekzka' goke' xiin dia che dii bñoz Aaronna'. ⁶Na' choph xooltie' chongake' wen lao Chioza', na' chongake' yog'lolte daa nllie' bia'. ⁷Na' aga no xiingake' wzoa daa nak Elizabeta' nool will; na' ba naktegage' ben' gol.



*Ki nak gana'
bzeygake' yala'.*

⁸Na' to shii ka bidol' bñozka' nak Zacaríaza' txen gongake' xshin Chioza' daa nak lo na'gake', ⁹bengake' to wyitj, ka yoologake' chongake', kwenche got'bia' noe' yidol' lljlo' llen yala' loo lill xlatj Xancho Chioza'. Na' bidol' Zacaríaza' gone'n. ¹⁰Na' shlak chgwee llen yala' loo yoodo'na', ben' zan bgaan chyoole choe'llwillgake' Chioza'. ¹¹Na' bli'lao to anjl che Xancho Chioza' Zacaríaza', na' anjla' zie' shlaa de shlina' gana' chzeygake'

yala'. ¹²Ka ble'i Zacaríaza' anjla', bikzə bi billel-lallee gone' daa le bllebe'. ¹³Na' anjla' chi'ene':

—Bi illebo' Zacarías, la' Chioza' ba bzenague' daa chñabilo'ne', na' xoolo' Elizabeta' sane' to xiino' na' wsi'ob' Juan. ¹⁴Na' yibachgailo' kat' galjb', na' lekzka' ben' zan yibayi, ¹⁵la' xiino'na' gakb' to ben' zakii lao Chioza'. Bi chiya' wnixb' vino wa bichlə dii gonan ka sollib', na' Espíritu Sántona' soloe' inabi'e yichjlall'do'baa ka zi' galjləb'. ¹⁶Na' yigoob' ben' zan xiin dia che Israela' lo xnez Chioza', beena' nak Xangake'. ¹⁷Na' kwialob' lao Xanchona', na' soalen Espíritu che Chioza' leb' ka wzoalene' Elíaza', na' gapb' yel' wak ka daa wdape'. Na' ye'b' ben'ka' bi zoalen xiine'ka' wen, yizoagake' mbalaz. Na' gom' ka wzenag ben'ka' bi cheeni wzenaggake' dill' sin' che ben'ka' zej shli lao Chioza'. Na' diikin gom' kwenche kat' za' Xanchona' na' gonlilall'gake'ne'.

¹⁸Na'ch che' Zacaríaza' anjla':

—¿Nakra gak inezid' shi lekzilo'n?, la' ba nak' ben' gol na' lekzka' nool cha'na'.

¹⁹Na'ch che' anjla'ne':

—Nadaan anjl Gabriela', na' chon' xshin Chioza', na' kwine' bselee nad' kwenche zaa zidnia' li' dill' wenni. ²⁰Na' daa bi wyajli'o daa wnia' li', idap shi'ona'. Bich gak inio' axt kat'ch illin lla gak yog' dga ba wnia' li'.

²¹Na' ben'ka' lle' chyoolə chbezgake' yichej Zacaríaza', goklejjakile' daa wllaile' loo yoodo'na'. ²²Na' ka bicheje' bich chak inie', senzə chone', na' gokbe'gakile' nan nochodan' bli'lao le' loo yoodo'na'.

²³Na' ka biyoll ben Zacaríaza' daa llia bia' gone' yoodo'na', na'ch biyaje' lille'na'. ²⁴Na' ka wde gok diiki, na' bia' xoolo', Elizabeta'. Na' lao gay' beo' bichkzə ga bcheje', na' wne': ²⁵“Xancho Chioza' ba goklene' nad' kwenche bich sia' yel' zto' lao ben'.”

Wdixjee anjla' galj Jesúza'

²⁶Na' ka gok xop beo' noa' Elizabeta', bsel' Chioza' anjla' le Gabriel yella' le Nazaret daa llia gana' mbani Galileana', ²⁷gana' zoa to nool wew' lie' María. Na' Maríana' ba nakan wshagna'lene' to ben' le José, na' Joséna' nake' xiin dia che dii rey Davina'. ²⁸Na' wyoo anjla' gana' zoa Maríana' na' chi'ene':

—¡Chwap' li' chiox, nool, ben' ba goklen Chioza' kwenche gak dii wen cho'! Xanchona' zoalene' li', na' ba benleeyche' li' aga ka yog'lolte nool.

²⁹Na' Maríana' bibanile' daa golle'ne' ka', na' gokile' berache naz beeni nad' ka'. ³⁰Na' che' anjla' le':

—Bi illebo' María, la' Chioza' ba wleje' li' kwenche gone' to dii wen cho'. ³¹Na' naa woo to bdo' na' kat' galjb' na' wsi'ob' Jesús. ³²Na' gakb' to ben' zakii na' ye'gake'b' Xiin Chios, beena' nak liizelozi ben' choo ben' xen. Na' Xancho Chioza' gone'b' to ben' wñabia' ka dii xozxto'b' Davina' ³³kwenche toshiizi inabia'b' le' ben' Israel, le' nakle xiin dia che dii Jacoba', na' yel' wñabia' che'baa bi yiyoll yidon.

³⁴Na'ch wñabi Maríana' anjla', chi'ene':

—¿Nakra gakz wa', lla?, la' aga no ben' byo zoalen'.

³⁵Na'ch che' anjla' le':

—Espíritu Sántona' yidsoalene' li', na' yel' wak che Chioza', beena' nak liizelozi ben' choo ben' xen, soalenan li'. Na' bi'do'na' galj gakb' lall' na' Chioza' na' ye'gake'b' Xiin Chios. ³⁶Lekzka' dialla cho' Elizabeta' ba no'e, la'kzi ba nake' ben' gol. Na' la'kzi chaki ben' nake' nool will, ba gok xop beo' no'e. ³⁷Aga bi de dii bi chak gon Chioza'.

³⁸Na'ch che' Maríana' anjla':

—Xmos Xancho Chiozan' nak', na' wak gone' cha' kon ka ba wno'.

Na' biza' anjla' gana' zoa Maríana'.

Jawia Maríana' Elizabeta'

³⁹Na' lii wza'te Maríana' wyaje' to yell dii lia yaa yao che Judeana'. ⁴⁰Na' blline' lill Zacaríaza' na' bwape' Elizabeta' chiox. ⁴¹Na' ka bwap Maríana' le' chiox, gokbe'i Elizabeta' bxit' bdo'na' loo li'ena'. Na' wzolo wñabia' Espiritu Sántona' loo yichjlall'do'ena', ⁴²na' wñie' zillj, chi'ene':

—Chioza' ba benleeyche' li' ladj yog'lol nool, na' lekzka' bdo' cho'na'. ⁴³¿Nora nak' nad' zidwia'zə xna' Xan'na' nad', lla? ⁴⁴La' kon ka bwapo' nad' chiox, lii bxit'te bdo' cha'ni loo li'ani daa chibaib'. ⁴⁵Chakomba li' wyajli'o ka wna anjla', la' yog' daa wna Xanchona', aga wde bi gakan.

46 Na'ch wna Maríana':

Do yichj do lallaa choe'lawaa Xancho Chioza'.

47 Chibayi yichjlall'dawaani lao Chioza', beena' chisla nad'.

48 Ba biyesh'lallile' nad' nak' xmosé',

naa solo yog' ben' ine' nad': "Chakomba li'."

49 La' Chioza', beena' nap ye'l' wak choo ye'l' wak xen, ba bene' dii wen inleeb cha'.

Nake' liizelozi ben' li ben' shao',

50 na' chiyesh'lallile' yog'te ben'ka' chall chllebgake'ne'.

51 Dii zakii nleeb ba benlene' ye'l' wak che'na'.

Ba bchinj bselle' yog'loj daa nan gon ben'ka' chep cha'lall'.

52 Ba bikwase' ye'l' wñabia' che ben' wñabia'ka',

na' ben'ka' ble'gakile' nakzi, Chioza' ba bene' legake' ben' zakii.

53 Na' ben'ka' chbil chdon, ba bzesh bzeljile' legake' kon dii wen dii shao' che'na',

na' bilague' ben' wni'aka' to ka cha'gake'.

54 Ba goklene' cho' ben' Israel, cho' nakcho xmosé',

na' toshiizi chiyesh'lallile' cho',

55 kon ka bchebe' gone' che dii xoxzto'cho Abrahama'

na' yog' ben' zizaak lo dia che'na'.

56 Na' Maríana' bgaane' ka do shon beo' lill Elizabeta', na'ch bizee ziyaje' lille'na'.

Golj Juanna'

57 Na' ka bllin lla wxan Elizabeta', wxane' to bi' byodo'.

58 Na'ch ka wñezi ben' wlill che'ka' na' ben' dialla che'ka', wyajgake' bibalengakile'ne' daa ba biyeshii Xancho Chioza' le'.

59 Na' ka gokib' to xman, jloogake'b' sen daa ne' circuncisión, na' goklall'gake' wsi'gake'b' Zacarías ka le xabaa. 60 Na' che' xña'baa:

—¿Bi gakan! Juanan chiya'l' wsi'nto'b'.

61 Na' gollgake'ne':

—¿Bi che wsi'zo'b' ka'? La' aga no dialla cho' le ka'.

62 Na'ch bengake' sen kwenche wñabgakile' xabaa bi cheenile' wsi'e bdo'na'. 63 Na'ch wñabe' to yagla'do' kwenche bzeje'n, na'

daa bzeje' nan: "Juanan wsi'nto'b'." Na' yog' ben'ka' bibani. ⁶⁴Na' lii gokte biñe Zacaríaza', na'ch wzoloe' choe'lawee Chioza'. ⁶⁵Na' ben' wlill che'ka' bllebgake' ka nak daa gok, na' yog' yellka' lle' ladj yaa yao che Judeana' wze dill' ka gok. ⁶⁶Na' yog' ben'ka' beni ka gok, gogkatile':

—¿Noran gak bi'do'ni, lla?

Wnagake' ka', la' nakbia' zoalen Xancho Chioza' leb'.

Daa wna Zacaríaza'

⁶⁷Na' Espíritu Sántona' wnabi'e yichjlall'do' xab' Zacaríaza' na' bi'e cho'a xtill' Chioza', wne':

⁶⁸Choe'lawaa Xanchona', beena' nak Chios checho, cho' ben' Israel,

la' ba bide' ladjchoni, cho' nakcho ben' yell che',
kwenche yisle' cho' lawi dii mala'.

⁶⁹Na' ba bselee to ben' nap yel' wak xen yisle' cho',
na' zee lo dia che dii Davina', beena' gok xmose'.

⁷⁰Ba chak ka bchebe' gone' kani'yi daa golle' dii ben'ka'
wdixjee cho'a xtillena', ben'ka' gok lall' nee.

⁷¹Bchebe' yisle' cho' lao ben'ka' bi chle'shii cho', na' lao
yog' ben'ka' chakzi' chakzbani cho'.

⁷²Na' golle' dii xozxto'choka' yiyeshile' legake',
na' bi gal-lallee ka nak diika' bchebe' gone'.

⁷³Ki nak daa bcheb Chioza' gone' che dii xozxto'cho
Abrahama':

⁷⁴Bchebe' yisle' cho' lao ben'ka' bi chle'shii cho'
kwenche we'la'ochone' na' bibi wwall wsheban cho',

⁷⁵na' gon kwincho lall' nee na' goncho ka yiyoolallile'
shlak mbancho.

⁷⁶Na'ch Zacaríaza' chi'e bdo' che'na':

Na' li', xiindawaa, ina ben' li' ben' chyixjee daa na
Chioza', beena' nak liizelozí ben' choo ben' xen.

Na' kwialozego' lao Xanchona' kwenche wzenaggake'
che' kat' zee.

⁷⁷Wzenilo' ben' wlall chechoka' daa chiya' gongake'
kwenche yizi'xen Chioza' saaxya che'ka' na' yisle'
legake' bi tegake' lo yel' zak'zi'na'.

78 La' Chios chechona' chakile' cho' na' chiyesh'lallile' cho',
na' wselee to ben' za' yabana' nsee to beeni' che
yichjlall'do' ben' yell-lioni

79 kwenche sho' beeni'na' loo yichjlall'do' ben'ka' chda gani
nak shgasj shchol ni che dii mala' daa nsa' yel' wit,
na' wliile' cho' nez li che'na' na' soacho mbalaz.

80 Shlak bgol Juanna', ben Chioza'ne' ben' wal. Na' wzoe' to
latj gana' bibi chashj chleb axt ka bllin lla wzoloe' be'lene' ben'
Israelka' cho'a xtill' Chioza'.

Golj Jesúza'

(Mt. 1:18-25)

2 ¹ Kana' chnabia' César Augústona', bene' byen ibab bal
ben' lle' to to yell doxen yell-liona' gana' chnabi'e. ² Na'
ka wbabgake' dii nech, beena' le Cirenio nake' governador
che Síriana'. ³ Na' benan byen biyaj yog' ben' yell che chegake'
kwenche jada' lie'ka'. ⁴ Na' daa nak Joséna' xiin dia che dii
Davina', bizee yell Nazareta' daa llia gana' mbani Galileana',
na' biyaje' yell Belénna' gana' golj dii Davina', daa llia gana'
mbani Judeana'. ⁵ Na' kwenche ibabgake' biyaje' yell Belénna' len
Maríana', beena' ba nakan ikee. Na' Maríana' ba no'e. ⁶ Na' shlak
zoagake' Belénna', bllin lla sane'. ⁷ Na' wxane' to bi' byodo' nakb'
bi' nech, na' btobe'b' lechaa na' wdixje'b' gana' chao bayix'ka',
la' bich bi latj blllel gana' chigaan ben'.

Jtixje'i anjla' ben'ka' chap xil'ka' ba golj Jesúza'

⁸ Na' lle'na' goljb', gaozə yell Belénna' lle' xonj ben' chapgake'
xil' che'ka'. ⁹ Na' gokxe to anjl che Xancho Chioza', na' yel' chey
cheeni' che Xanchona' bzeeni'n gana' lle'gake', na' le bllibgake'.

¹⁰ Na' che' anjla' legake':

—Bi illeble, la' zidtixje'id' le' dill' wen dill' koba' daa gonan
ka yibachgayi yog' ben'. ¹¹ La' naa yell che dii Davina' ba golj
beena' yisla le' lao dii mala'. Na' len' Xancho Crístona', beena'
chbezle wse! Chioza'. ¹² Na' kwenche yillelileb', ki nak gana'
deb': deb' gana' chao bayix'ka' na' ndobb' lech'.

¹³ Na' ka biyoll goll anjla' ka', lii bllinte anjl zanch kwite'na',
na' choe'la'ogake' Chioza', nagake':



*Na' lle'na' goljb', gaoza yell Belénna' lle' xonj
ben' chapgake' xil' che'ka'. Lc. 2:8*

14 ¡We'la'ocho Chioza' zoa yabana'!

Mbalaz ben'ka' zoa yell-lioni, ben'ka' ba bli'yi Chioza'
yel' goklen che'na'.

15 Na' ka biza' anjlka' ziyajgake' yabana', na'ch che' ljjwell
ben'ka' chap xil'ka':

—Li yidoshki Belénna', li sho' diwiashki daa ba gok, daa ba
wdixje'i anjl che Xanchona' cho'.

16 Na'ch ziyajdogake' Belénna' na' bllingake' gana' zoa Maríana'
len Joséna', na' bdo'na' deb' gana' chao bayix'ka'. **17** Na' ka biyoll
ble'gakile'b', na' be'gake' dill' lao ben' wlall che'ka' daa goll anjla'
legake' che bdo'na'. **18** Na' yog' ben'ka' beni ka wna wap xil'ka'
bibangakile' ka dillaa be'gake'. **19** Na' Maríana' kon ka biyoll
bzenague' dill'ka' na' bgaanān loo yichjlall'do'ena', na' gokile'
bera zejīn dga. **20** Na'ch ziyaj wap xil'ka' choe'la'ogake' Chioza'
daa ba ben ble'gakile' yog' daa goll anjla' legake'.

Jwa'gake' Jesúza' yoodo'na'

21 Na' ka gokib' to xman, wloogake'b' sen daa le circuncisión,
na' bsi'gake'b' Jesús kon ka goll anjla' Maríana' kana' zi' weeb'.

22 Na' kon ka na ley che dii Moiséza' gongake', wlezzgake'
ka bzaa llaka' bixi biyech Maríana' len bdo' che'na', na'ch
wyajlengake'b' Jerusalénna' kwenche jengake'b' lo na' Xancho
Chioza'. **23** Bengake' ka', la' ley che Xanchona' nan: “Bi' byo nech
che yog'lol ben', chiyal' gongake'b' lo na' Chioza'.” **24** Na' jaake'

je'la'ogake' Xancho Chioza' jengake' ka na leya' daa nan chiyal'
witagake' chop ngolbex wa chop palom.

25Na' kana' jwa'gake' Jesúza' yoodo'na', zoa to ben' le Simeón
Jerusalénna'. Nake' to ben' chon dii wen dii shao' na' choe'lawee
Chioza', na' chbeze' batan wsel' Chioza' beena' gaklene' ben'
Israelka'. Na' zoalen Espíritu Santo che Chioza' le'. 26Na' Espíritu
Sántona' ba bzenile'ne' nan aga weté' shi bin' ile'ile' Crístona',
beena' chbezgake' wsel' Xancho Chioza' kwenche inabi'e. 27Na'
Espíritu Sántona'kz bseleene' yoodo'na', na' na' zie' ka bllinlen
xaxna' Jesúza' le'b' kwenche gongakile'b' ka na leya'. 28Na'ch
blen Simeónna' le'b' na' be'lawee Chioza', chi'e:

29Chios cha', be' latj guet' mbalaz naa,

la' ba beno' daa bchebo' gono' cha', nad' nak' xmoso'.

30La' ba ble'id' beena' yisla neto',

31beena' ba bseloo lao yog'lo' ben' yell-lioki.

32Len' kwee beeni'na' loo yichjlall'do' ben'ka' bi nakgake'
ben' Israel.

Na' gone' ka neto' ben' Israel sho'nto' balaan, neto'
naknto' yell cho'.

33Na'ch Joséna' len xna'ba bibangakile' ka nak daa wna
Simeónna' cheb'. 34Na'ch wnabi Simeónna' Chioza' gaklene'
legake', na' chi'e Mariana', xna' Jesúza':

—Ba nchogbi'a Chioza' che bi'do'ni gom' kwenche zan ben'
Israelka' kwiayi'gake' na' lezkza' zane' yila. Na' wliib' ben'
ka nak yel' wak che Chioza', na' ben' zan inegake' zban cheb'
na' bi shajle'gake' cheb', 35na'ch gakbia' ka chza'lall' ben' loo
yichjlall'do'eka'. Na' ka nako' li', loo yichjlall'do'na' gakan ka'kzə
ga chaz to spad ka ile'ilo' daa illaglob'.

36Na' lezkza' yoodo'na' zoa to nool goldo', ben' chyixjee daa
che' Chioza'ne', na' lie' Ana. Nake' xiin dii Fanuela' na' xiin dia
che dii Asera'. Ben' xkwid'ze' bshagnee, na' gall yizchga wzoalene'
ben' che'na' ka wite'. 37Nake' noolə wizeb na' ba gokile' taplaj tap
yiz. Na' toshiizi zoe' yoodo'na', na' ka wal' ka tella zoe' choe'lawee
Chioza', na' tlizi chzoe' wbas' na' choe'lwille'ne'. 38Na' lezkza'
wbiguee kwite'ka' na' bi'e Chioza' yel' choxken daa ba bselee beena'
gaklene' ben' Israelka'. Na' bi'e dill' che Jesúza' lao ben' Jerusalénka',
ben'ka' chbez wsel' Chioza' beena' yisla legake' lao dii mala'.

Biyajgake' Nazareta'

39Na' ka biyoll bengake' yog' daa nllia ley che Xancho Chioza' bia', na'ch biyajgake' lalle'ka' daa le Nazaret daa llia gana' mbani Galileana'. 40Na' Jesúza' bgolb' na' zejch gokb' bi' wal na' bi' sin', na' le goklen Chioza' leb'.

Jesúza' jashaljlem' beñ' sin'ka' yoodo'na'

41Xaxna' Jesúza' chajgake' Jerusalénna' yog' yiz kat' chal' Ini Paskwa'. 42Na' ka goki Jesúza' shllin yiz, wyajlengake'b' lnina' kon ka yoologake'. 43Na' ka wde lnina' biza' xaxna'baa, na' bi gokbe'gakile' bigaan Jesúza' Jerusalénna'. 44Gokgakile' do ladj ben'ka' ziyajlengake' zilem', na' kon bigootezgake' nez do lla. Na' ka biyiljgake'b' ladj ben' dialla che'ka' na' ben'ka' nombia'gake' 45aga billelgakile'b'. Na' bibiigake' jadjiljgake'b' Jerusalénna'.

46Na' ka gok shonə lla billelgakile'b' yoodo'na', chi'b' ladj ben'ka' chli' chsedi leya' chzenagb' xtilleeka' na' chnabib' legake' che daa choe'gake' dill'. 47Na' yog' ben'ka' chzenag xtil'baa chibangakile' ye'l' chajni ch'baa na' ka chilliib' xtil' ben'ka' chli' chsedi leya'. 48Na' ka ble'i xaxna'baab' bibangakile'. Na'ch che' xna'baa:

—Xiindawaa, ¿biche benzilo' neto' ka'? Xo'ni na' nad' ba gokshejlall'chgainto' biyiljnto' li'.

49Na'ch che' Jesúza' legake':

—¿Biche chiyiljzle nad'? ¿Abi nezile chiya'l' soa' lill Xa'na'?

50Na' aga wyajni'gakile' bi zejín daa gollb' legake'.

51Na'ch Jesúza' biyajlem' legake' Nazareta' na' bzenagb' chegake' toshiizi. Na' xna'baa aga gol-lallee diika' gok. 52Na' Jesúza' zejch bgolb' na' wdapchb' ye'l' sin', na' Chioza' bibachile'b', na' lekzka' bibayi beñ' leb'.

Juanna', beena' bchoa beñ' nis

(Mt. 3:1-12; Mr. 1:1-8; Jn. 1:19-28)

3 1Na' ka gok shin' yiz chnabia' César Tibériona', na' Poncio Pilátona' chnabi'e gana' mbani Judéana', na' Heródeza' chnabi'e gana' mbani Galileana', na' beñ' bishee Felípena' chnabi'e gana' mbani Ituréana' len Traconítana', na' Lisániaza' chnabi'e

gana' mbani Abilíniana', ²na' Anáza' len Caifáza' nakgake' b̄xoz choo b̄xoz xen che ben' Israelka'. Na' kana'yen' w̄ne Chioza' Juanna', xiin Zacaríaza', kana' zoe' to latj gana' bibi chashj ch̄leb. ³Na'ch wyaj Juanna' jte' doxen yell-liona' de cho'a yao Jordánna' na' wdixje'ile' ben' chiyal' yiyaj yilengakile' na' choagake' nis kwenche yizi'xen Chioza' chegake'. ⁴Bene' kon ka bzej dii Isaíaza' gana' nan:

To ben' gosyee latja' gana' bibi chashj ch̄leb, na' ine':

“Li se kwas wzenagle che Xanchona'

na' wsalj yichjlall'do'leka' kat' zee.

⁵La' le' gone' ka chon ben' chillee ga nak xitj yao,

na' ka ben' chchinj yaa kwenche chileshe'n.

Na' chilie' yog'lol' nez dii nyok nlew,

na' chillee xitjka' chi' lo neza'.

⁶Na' yog'lol' ben' ile'gakile' ka gon Chioza' yisle' ben'

lawi dii mala'.”

⁷Na' ben' zan chllin lao Juanna' kwenche wchoe' legake' nisa', na'ch kat' chllingake' lawe'na', chi'e legake':

—¡Le' naklikzle ka bel' z̄nia! ¿Achakile wak wxonjile' ye! zak'zi' daa wsel' Chioza'? ⁸Li gon ka gakbe'i ben' nan dii li ba biyaj bilenile'. Na' bi gakzile bibi ye! zak'zi' ile'ile daa inazle: “Neto' naknto' xiin dia che dii Abrahama'.” Ni inia' le' axt yajki wak gon Chioza' xiin dia che dii Abrahama'. ⁹Yog'lol'-le shi bi chonle ka chiyoollalii Chioza' na' gak chele ka chak che to yag dii choe' dii zix dii bi nak wen, na' lii chhogtegage'n na' chzal'gake'n lo yi'na'.

¹⁰Na' ben'ka' chzenag xtil! Juanna' che'gake'ne':

—¿Beran chiyal' gonnto', shka'?

¹¹Na'ch che' Juanna' legake':

—Beena' de chop kwe' xe', chiyal' wi'e shkwe' che beena' bi de che'. Na' beena' de dii cheej chawe', chiyal' gaolene'n beena' bi de cheyin.

¹²Na' lekzka' bllin bal' ben' wichixjka' kwenche wchoa Juanna' legake' nisa', na' w̄nabgakile'ne':

—Maestro, ¿beran chiyal' gonnto', shka'?

¹³Na'ch che' Juanna' legake':

—Bi wchixjle dii xenchl̄ ka to daa chiyal' wchixjle.

14 Na' lekzka' bal ben'ka' nak soldad wñabgakile'ne':

—¿Shera neto', beran chiyal' gonnto' shka'?

Na'ch che' Juanna' legake':

—Bi wwall wsheble ben' kwenche ikaazle bi de che', ni bi wtobilene' dii bi nak ka'. Li gon banez laxjlana'.

15 Na' ben' zan yoo yichjgake' ila' Crístona', beena' wsel' Chioza' kwenche inabi'e, na' yog'ze' gokgakile' Juanna'ljan Crístona'.

16 Na' Juanna' golle' legake':

—Zi' za' beena' napch ye!' wak xench ka nad'. Na' nad' ni bi zakaa gak' xmose' kwenche wlechj' xele'na'. Nad' chchoa' le' nis daa chiyaj chilenile, san len' gone' ka yidsoa Espíritu Sántona' loo yichjlall'do'lena', na' ben'ka' bi chiyaj chileni, wselee legake' lo yi' gabi'la'. 17 Na' daa gon Crístona' che ben' chzaklebin ka daa chon beena' nox' yag xoz' daa chpa'ile' trígona', na' yitope' trígona' kooshaween na' wzeye' beb cheyinna' lo yi'na' daa biga yiyolkzə.

18 Kan' nak diika' bzajnii Juanna' ben'ka', na' dii zanch dill' dii be'lene' legake' kana' bi'e dill' wen dill' kob che Chioza'. 19 Na' Juanna' lekzka' bsheshlene' Heródeza', beena' wñabia' Galileana', daa bikee Herodíaza', xool ben' bishee Felípena', na' che bichlə dii malka' ba bene'. 20 Na'ch Heródeza' benche' bish' ljjwell dii malka' ba bene' daa wlo'e Juanna' lillyana'.

Wchoa Jesúza' nisa'
(Mt. 3:13-17; Mr. 1:9-11)

21 Kana' chchoa Juanna' ben' nisa', len Jesúza' bchoe'n. Na' shlak choe'lwill Jesúza' Chioza', byalj yabana' 22 na' betj Espíritu Sántona' jsoalene'ne', na' ble'gakile' Espírituna' ka to palom. Na' bengakile' shii Chioza' za'n yabana', chi'e:

—Lin' nako' Xiin', chakchgaid' li' na' le chibaid' li'.



Ki chpaagake' trigona'.

Ben'ka' nak dia che Jesucrístona'

(Mt. 1:1-17)

23Na' do shichoa yizi Jesúza' ka wzoloe' bene' yog' daa llia bia' gone'. Na' yog' ben' wnagake' xiiñ Joséna'. Na' Joséna' goke' xiiñ Elína', 24Elína' goke' xiiñ Matata', Matata' goke' xiiñ Levína', Levína' goke' xiiñ Mélquina', Mélquina' goke' xiiñ Jánana', Jánana' goke' xiiñ Joséna'. 25Joséna' goke' xiiñ Matatíaza', Matatíaza' goke' xiiñ Amóza', Amóza' goke' xiiñ Nahuma', Nahuma' goke' xiiñ Éslina', Éslina' goke' xiiñ Nagaina'. 26Nagaina' goke' xiiñ Maata', Maata' goke' xiiñ Matatíaza', Matatíaza' goke' xiiñ Semeina', Semeina' goke' xiiñ Joséna', Joséna' goke' xiiñ Judána'. 27Judána' goke' xiiñ Joánana', Joánana' goke' xiiñ Résana', Résana' goke' xiiñ Zorobabela', Zorobabela' goke' xiiñ Salatiela', Salatiela' goke' xiiñ Nérina'. 28Nérina' goke' xiiñ Mélquina', Mélquina' goke' xiiñ Ádina', Ádina' goke' xiiñ Cosama', Cosama' goke' xiiñ Elmodama', Elmodama' goke' xiiñ Era'. 29Era' goke' xiiñ Josuéna', Josuéna' goke' xiiñ Eliezera', Eliezera' goke' xiiñ Jorima', Jorima' goke' xiiñ Matata'. 30Matata' goke' xiiñ Levína', Levína' goke' xiiñ Simeónna', Simeónna' goke' xiiñ Judána', Judána' goke' xiiñ Joséna', Joséna' goke' xiiñ Jonánna', Jonánna' goke' xiiñ Eliaquima'. 31Eliaquima' goke' xiiñ Meleana', Meleana' goke' xiiñ Mainána', Mainána' goke' xiiñ Matátana', na' Matátana' goke' xiiñ Natánna'. 32Natánna' goke' xiiñ Davina', Davina' goke' xiiñ Isaína', Isaína' goke' xiiñ Obeda', Obeda' goke' xiiñ Booza', na' Booza' goke' xiiñ Salmónna', Salmónna' goke' xiiñ Naasónna'. 33Naasónna' goke' xiiñ Aminadaba', Aminadaba' goke' xiiñ Arama', Arama' goke' xiiñ Ezroma', Ezroma' goke' xiiñ Fáreza', Fáreza' goke' xiiñ Judána'. 34Judána' goke' xiiñ Jacoba', Jacoba' goke' xiiñ Isaaca', Isaaca' goke' xiiñ Abrahama', Abrahama' goke' xiiñ Taréna', Taréna' goke' xiiñ Nacora'. 35Nacora' goke' xiiñ Seruga', Seruga' goke' xiiñ Ragauna', Ragauna' goke' xiiñ Pelega', Pelega' goke' xiiñ Hebera', Hebera' goke' xiiñ Sálana'. 36Sálana' goke' xiiñ Cainánna', Cainánna' goke' xiiñ Arfaxada', Arfaxada' goke' xiiñ Sema', Sema' goke' xiiñ Noéna', Noéna' goke' xiiñ Lameca'. 37Lameca' goke' xiiñ Matusalénna', Matusalénna' goke' xiiñ Enoca', Enoca' goke' xiiñ Jareda', Jareda' goke' xiiñ

Mahalaleela', Mahalaleela' goke' xiin Cainánna'. ³⁸Cainánna' goke' xiin Enóza', Enóza' goke' xiin Seta', Seta' goke' xiin Adánna', na' Adánna' goke' xiin Chioza'.

Dii xiwaa goklalliin kooye'la'n Jesúza' gone' ka cheenin

(Mt. 4:1-11; Mr. 1:12-13)

4 ¹Ka biza' Jesúza' cho'a yao Jordanna', Espíritu Sántona', beena' chñabia' loo yichjlall'do'ena', bchi'ene' latja' gana' bibi chashj chleb. ²Na' na' wzoe' choa lla, na' dii xiwaa goklalliin kooye'la'n le' gone' ka cheenin. Na' shlak wzoe' na' ni lat' bibi wdawe', na' ka gok choa lla, wdone'. ³Na'ch che' dii xiwaane':
—Shi leilo' nako' Xiin Chios, goll yaji yiyakan yetxtil.

⁴Na'ch che' Jesúza':

—Cho'a Xtill' Chioza' nan: “Aga toz yel' wawa' choe'n yel' mban che benecha', san lekzka' Cho'a Xtill' Chioza' choe'n yel' mban chegake!”

⁵Na'ch ka wde, bche' dii xiwaa Jesúza' to lo yaa sib wal, na' tolbe'do' bliin le' yog' yellka' llia yell-lioni. ⁶Na'ch che'n le':

—Gon' li' doxen yel' wñabia'na' na' yel' zakiina' daa de che yog' yellki, la' ba nakin cha' na' wak wi'an kon no cheenid'. ⁷Na' gona'n li' shi wchek' xibo'na' we'lawoo nad'.

⁸Na' che' Jesúza':

—Cho'a Xtill' Chioza' nan: “Be'la'o toz Xano' Chioza' na' kon daa ine', lennan' gono'.”

⁹Na'ch ka wde, bizche' dii xiwaa Jesúza' Jerusalénna' na' blepan le' yichj yoodo'na' gana' nakch sib wal, na' gollan le':

—Shi leilo' nako' Xiin Chios, lla bxit'shki ni. ¹⁰La' Cho'a Xtill' Chioza' nan:

Chioza' wselee anjl che'ka' gap wwiagake' li',

¹¹na' gox'gake' li'

kwenche ki koo wchewo' yajka'.

¹²Na'ch che' Jesúza':

—Lekzka' na Cho'a Xtill' Chioza': “Bi wzo' Chioza' gone' daa nazan cho' kwenche xenlalloo shi gone' ka ba wne'.”

¹³Na' ka bi gok kooyel' dii xiwaa Jesúza' gone' ka cheenin, na'ch bkwasan kwite'na' shloll.

Wzolo Jesúza' bi'e Cho'a Xtill' Chioza' Galileana'


(Mt. 4:12-17; Mr. 1:14-15)

14 Jesúza' billine' gana' mbani Galileana' ziyoochgue' ye'l' wak che Espíritu Sántona', na' doxenzə na' wze dill' daa chone'.
15 Na' chjali' chjasedile' beñ' Israelka' gana' chdop chllaggake' choe'lwillgake' Chioza', na' yog' beñ' nagake' le xochi cho'e dill'.

Billin Jesúza' yell Nazareta'

(Mt. 13:53-58; Mr. 6:1-6)

16 Na'ch biyaje' Nazareta', yella' gana' bgole'. Na' ka blin lla sabda', llana' chombaan beñ' Israelka', wyaje' gana' chdop chllaggake' choe'lwillgake' Chioza' kon ka yooloe' chone'. Na'ch wzollee lawe'ka' kwenche blabe' Cho'a Xtill' Chioza'.
17 Na' be'gake'ne' yisha' daa bzej dii Isaíaza', beena' wdixjee daa goll Chioza'ne', na' ka bzeshe'n blabe' gana' na:



*Kin gok libr che
beñ'ka' kani'yi.*

18 Espíritu che Xancho

Chioza' zoalene' nad',
na' Chioza' ba bzoe' nad' zidyelen' beñ' yesh'ka' dill'
wen dill' kob che'na'.

Ba bselee nad' kwenche zidtip' lall' beñ'ka'
chakyeshii yichjlall'do'eka',
na' zidtxje'id' beñ' wak yisell yilaagake',
na' gon' ka ile'i beñ' lcho'ka',
na' gaklen' beñ'ka' chchi' chsak' beñ' legake',

19 na' wi'a dill' ba blin lla gaklen Xanchona' beñ' yell-lioki.

20 Ka biyoll blabe' yisha' na'ch bitobe'n na' biyo'en beena' ngoo lall' neen, na' bibi'e. Na' yog' beñ'ka' lle' na' shin chizozgakile' chwiagake'ne'.
21 Na' wzoloe' cho'e dill', chi'e:

—Naa billinin ka na Cho'a Xtill' Chioza' dga ba benile.

22 Na' yog' beñ'ka' lle' na' che' ljwellgake' le chon beeni, na' chibangakile' ka xochi cho'e dill'. Na' che' ljwellgake':

—¿Aaga beenin xiin Joséna'?

23Na'ch che' Jesúza' legake':

—Wnaljale cha' ka dillaa de: “Wen rmech, biyon kwino'.” Na' lekzka' wnaljale nad': “Daa beninto' beno' Capernaúma' lekzka' benshkin lallchoni.”

24Na' be'che' dill' chi'e legake':

—Dii li nia' le', to ben' chyixjee daa che' Chioza'ne' aga no shajle' che' yell che'na'. 25Na' nia' le', zan nool wizeb wlle' gani mbani Israeli kana' wzoa Elíaza', beena' wdixjee daa goll Chioza'ne', kana' aga bi yej gok shon yiz yoo gashjə na' wche'chga wbinna' doxen gani mbani Israeli. 26Na' bi bse! Chioza' Elíaza' kwenche gaklene' nool wizebka' lle' ni, san bseleene' to yell zit' daa le Sarepta, daa llia gaozə yell Sidónna', gana' goklene' to nool wizeb zoa na'. 27Na' lekzka' gok kana' wzoa dii Elisewa', beena' wdixjee daa goll Chioza'ne'. Ben' zan ben' Israelka' che'gakile' yillwe' daa le lepra, per ni toe' bi biyone'. Toz ben' Síriana' biyone', beena' le Naamán.

28Na' yog' ben'ka' lle' gana' chdop chllaggake' le bllaagake' daa wna Jesúza' ka'. 29Na' lii wzolla'tegake' bibejgake' Jesúza' yella', na' bche'gake'ne' to ga ze bdiñj xen wal, goklall'gake' lljachixgake'ne'. 30Per Jesúza' bicheje' ladje'ka' na' ziyaje'.

Bibej Jesúza' dii xiwaa yoo to ben'

(Mr. 1:21-28)

31Jesúza' wyaje' Capernaúma', sto yell daa llia gana' mbani Galileana', na' bli' bsedile' ben'ka' lla sabda', llana' chombaan ben' Israelka'. 32Na' bibangakile' ka chli' chsedi Jesúza', la' bli' bsedile' legake' lega ben' nap yel' wñabia'.

33Na' gana' chdop chllaggake', len to ben' yoo dii xiwaa na' bgosyaan le' zillj wal, chi'e:

34—¡Jwayi neto', Jesús, ben' Nazaret! ¿Abido' kwenche wlliyoo neton'? Nad' nombi'a li', na' neqid' nako' liizelozi ben' li ben' shao' che Chios.

35Na'ch bsheshlen Jesúza' dii xiwaa, golle'n:

—¡Llizə wzoa! ¡Bichej!

Na' chwiate ben'ka' bchix̄ btoł dii x̄iwaa beena', na' bichejan na' bikzə gayile' bi goki. ³⁶Na' yog' ben'ka' lle' na' bibangakile', na' che' l̄jwellgake':

—¿Naktekan nak cho'a xtill' beeni, lla? Ka ch̄neze' chillsh dii x̄iw'ka' yoo ben' daa napchgue' yel' w̄nabia' na' yel' wak.

³⁷Na' doxen na' wze dill' ka nak daa chon Jesúza'.

Biyon Jesúza' tobiin̄ che Simón Pédróna'

(Mt. 8:14-15; Mr. 1:29-31)

³⁸Na' biza' Jesúza' gana' chdop chllaggake' na' biyaje' lill Simónna'. Na' tobiin̄ che Simónna' bi shawee, yoochgue' dii l̄ana', na' w̄nabgakile' Jesúza' gaklene'ne'. ³⁹Na'ch wbig' Jesúza' kwite'na' gana' die' na' bsheshlene' dii l̄ana' na' bichejan. Na' lli biyaste noola' wzoloe' bene' dii weej wdaogake'.

Jesúza' biyone' ben' zan

(Mt. 8:16-17; Mr. 1:32-34)

⁴⁰Na' ka ba chxoa wbillá, ben'ka' lle' na' jwa'gake' lao Jesúza' ben'ka' chak wde wdeli yillwe'. Na' b̄xoa neena' to togake' na' biyagakile'. ⁴¹Na' bibeje' dii x̄iwaa yoo ben' zan, na' ka bichejgakan chosyaagakan zillj inleeb, che'gakan:

—Lin' nako' Xiiñ Chioza'.

Na'ch bsheshlen Jesúza' legakan. Bi bi'e latj inegakan l̄a' nezgakin len' nake' Crístoná, beena' chbez ben' Israelka' wsel' Chioza' inabi'e.

Wda Jesúza' bi'e Cho'a Xtill' Chioza' Galileana'

(Mr. 1:35-39)

⁴²Ka wyeeni', bchej Jesúza' yella' na' wyaje' ga kono lle'. Per ben' yellka' biyiljgake'ne', na' ka bllingake' kwite'na', goklall'gake' wzag'gake'ne' kwenche yigaanlene' legake'. ⁴³Na'ch goll Jesúza' legake':

—Lekzka' chiyal' chixje'id' ben'ka' lle' yell yoblə ka nak yel' w̄nabia' che Chioza', l̄a' daan bselee nad'.

⁴⁴Na' wda Jesúza' wdix̄ji'e cho'a xtill' Chioza' to to gana' chdop chllag ben' Israelka' choe'l̄willgake' Chioza'.

Wxengake' beḷ zan

(Mt. 4:18-22; Mr. 1:16-20)

5 ¹To shii bllin Jesúza' cho'a nisdó' che Genesareta' na' bllin beḷ zan wal axt bdakwyillgake'ne', daa cheengakile' wzenaggake' cho'a xtill' Chioza'. ²Na' ble'i Jesúza' chop barkw chi'gakan cho'a nisdó'na'. Ba bichej beḷ wxen belka' na' ba chiyibgake' yixj che'ka'. ³Na'ch wyoo Jesúza' loo barkw che Simónna', na' wnabile'ne' wllig' zilateen loo nisdó'na'. Na' wche' Jesúza' loo barkwa' na' wzoloe' bli' bsedile' beḷ'ka'. ⁴Na' ka biyoll bli' bsedile' legake', na'ch chi'e Simónna':

—Wyajlen barkwi gana' zitj na' wzal'le yixj chelena' kwenche senle belka'.

⁵Na'ch che' Simónna':

—Maestro, do yel ba bennto' llinna' na' ni tlish'b bi bdoḷinto', per shi kan' no', wzal'chnto' yixjki.

⁶Na' ka bzal'gake' yixj che'ka', wxenan beḷ zan inleeb. Na' ka nan yibejgake' yixja' wzolo chcheza'n. ⁷Na' blaa neeka' beḷ'ka' lle' loo barkwa' sto kwenche jaklengake' legake'. Na' ka bllin beḷ'ka', na'ch bissha'chagake' chopte barkwka' axt ba chakgakan ka dii kwe' yel. ⁸Ka ble'i Simón Pédróna' ka gok, bchek' xibe'na' lao Jesúza' na' chi'ene':

—Bikwasgach kwitii Xan', la' beḷ saaxyaz nad'.

⁹Golle'ne' ka' daa bibanile', na' ka'kzə beḷ'ka' lene' bibangakile' daa bdoḷ' beḷ zan inleeb. ¹⁰Na' lekzka' bibani Jacóbona' len Juanna' xiin Zebedewa', la' lengaken' nakgake' txen Simónna'. Na' che' Jesúza' Simónna':

—Bi illebo'. Kon ka chono' naa chbejo' beḷki loo nisi, ka'kzan gono' yibejo' beḷ' lao dii mala'.

¹¹Na' ka billinlengake' barkwka' cho'a nisdó'na', na'zə bkwaangake'n len xshinlaze'ka' na'ch janogake' Jesúza'.

Biyon Jesúza' to beḷ chake' yillwe' daa le lepra

(Mt. 8:1-4; Mr. 1:40-45)

¹²Na' shlak zoa Jesúza' to yell, bllin to beḷ lawe'na' chak doxen kwerp che'na' yillwe' daa le lepra. Na' ka ble'ile' Jesúza',

b̄chek' xibe'na' lawe'na' na' b̄chek' yichje'na' axt lo yona' na' got'yoile'ne', chi'ene':

—Xan', nezid' wak yikwaso' yillwe'ni chak' shi cheenilo'.

13 Na'ch Jesúza' b̄xoā neena' yichj beena', na' chi'ene':

—Cheenid'x. Na' naate yikwaso'n.

Na' kon ka golle' ka' lii biyakteyi beena'. 14 Na'ch che' Jesúza'ne':

—Kono yoo ka ba ben' cho'. Lete wyaj lao b̄xoza' kwenche ile'ile' ba biyakilo', na' jwa' daa chiya' l̄joo che Chioza' daa nllia dii Moiséza' bia' kwenche inezi ben' ba biyakilo'.

15 Na' la'kzi golle'ne' ka', zizikchli wzeyi che', na' ben' zan bdop bllaggake' kwenche bzenaggake' cho'a xtilleena' na' kwenche biyone' bitteza yillwe' dii chakgake'. 16 Per Jesúza' yooloe' chaje' ga kono ben' chak kwenche chjelwille' Chioza'.

Biyon Jesúza' to ben' net ni'a neena'

(Mt. 9:1-8; Mr. 2:1-12)

17 To lla ka chli' chsedi Jesúza', xonj fariseoka' na' ben'ka' chli' chsedi leya', na' ben'ka' za' yog' yellka' daa mbani Galileana' na'ch daa mbani Judeana' na' lekzka' ben' za' yell Jerusalénna', chi'gake' chzenaggake' dill' daa cho'e. Na' ye' wak che Chioza' wzoalenan Jesúza' kwenche gok biyone' ben'ka' bi shao'. 18 Na'ch bllin to chop ben' n̄lengake' to ben' net ni'a neena' n̄xoagake'ne' to lo daa. Goklall'gake' sho'lengake'ne' loo yoonā' kwenche l̄jwa'gake'ne' lao Jesúza', 19 per bi gok sho'lengake'ne' daa nyichachga ben'ka' loo yoonā'. Na'ch wyepgake' koll' yoonā'lə na' bkwasgake' dexka' kwenche gok b̄letjgake'ne' do daa che'na' ladj ben'ka' lle' na' kwenche blline' lao Jesúza'. 20 Na' ble'i Jesúza' le n̄xenilall'gake'ne', na'ch chi'e ben' we'na':

—Bish'dawaa, ba biyakxen saaxya cho'ka'.

21 Na'ch ben'ka' chli' chsedi leya' na' fariseoka' wza'lall'gake', chakgake': “¿Nora beeni chonz kwine' ka Chioza'? ¡La' toz Chiozan' chak chizi'xene' saaxya che ben'!”

22 Na' gokbe'i Jesúza' daa wza'lall'gake', na'ch golle' legake':

—¿Berache chza'lall'zle ka'? 23 ¿Achakile chyalljchid' ye' wak xench yep' beeni: “Ba bizi'xen' saaxya cho'na'”, ka daa

yepée: “Biyas na' bigoo nez”? 24 Na' wliid' le', nad', Ben' Bsel' Chioza', nap' ye! wñabia' yell-lioni kwenche yizi'xen' saaxya che ben'.

Na'ch golle' beena' net ni'a neena':

—Naa nia' li', biyas, bitob daa cho'na' na' biyaj lillo'na'.

25 Na' lii biyaste beena' chwiata ben'ka' lle' na', bitobe' daa che'na' bizee ziyaje' lill-le' choe'lawee Chioza'. 26 Na' yog'!ol ben'ka' bibangakile' na' be'la'ogake' Chioza', na' do chllebzgake' che'gake':

—Naanlla ba ble'icho dga chonan ka chibanicho.

Gox Jesúza' Levína'

(Mt. 9:9-13; Mr. 2:13-17)

27 Ka biza' Jesúza', na' ble'ile' to ben' wichixj lie' Leví, chi'e gana' chchixjgake'. Na' chi'ene':

—Da, dino nad'.

28 Na'ch lii wzolla'te Levína', wlej yichje' xshine'na' na' janoe' Jesúza'.

29 Na' Levína' bene' to lni xen che Jesúza' lille'na'. Na' wyaj ben' zan ben' wichixjka' na' zi ba! ben' yoblə wdaogake' txen. 30 Na' fariseoka' na' ben'ka' chli' chsedi leya' wzologake' chakdil-lengake' ben'ka' nak Jesúza' txen, che'gake':

—¿Berache cheej chaolenle ben' wichixjka' na' ben' malka'?

31 Na'ch che' Jesúza' legake':

—Beena' zoa shi'a shao' aga no wen rmech chyalljile', san beena' bi shawaan chyalljile'ne'. 32 Aga bid' ni che ben'ka' nak ben' li ben' shao', san bid' kwenche yep' ben' saaxyaka' chiyal' yiyaj yilengakile'.



*To ben' wichixj chi'e
gana' chchixje'.*

Wnabgakile' Jesúza' che wbasaa

(Mt. 9:14-17; Mr. 2:18-22)

33Na' wnabgakile' Jesúza', che'gake'ne':

—Ben'ka' nak Juanna' txen na' ben'ka' nak fariseoka' txen zekizezi choagake' wbas' na' choe'lwillgake' Chioza'. Na' ¿berache ben'ki naggake' li' txen bi choagake' wbas'?

34Na' chi'e legake':

—Kat' de to yel' wishagna', aga wak gonle byen ben'ka' chdop chllag soagake' wbasaa shlak zoalengake' bi'na' chshagna'. Na' ka'kzan ben'ki naggake' nad' txen, cheej chaogake' naa zoalen' legake'. 35Per wllin lla wkwas ben' nad' ladje'ka', kana'chan soagake' wbasaa.

36Na' lekzka' bzoe' sto jempl, chi'e legake':

—Ni to ben' bi chchogue' xa kobe'na' na' chideen lee xe' dii gola'. La' shi gone'n ka', na' wlliyee dii koba', na' dii gola' aga wnelebin lech' koba'. 37Na' ni kono chгаа vinona' daa zi chchejte to loo yid golə. La' shi no gon ka', vino koba' wchezaan yid gola' na' chopten kwiayi'. 38San vino koba' chiyal' shollan loo yid koba'. 39Na' lekzka' to ben' ba yooloe' cheeje' vino gola' aga weenile' yeeje' dii koba', daa chziachile' dii gola'.

Wdshjgake' do che trígona' lla sabda'

(Mt. 12:1-8; Mr. 2:23-28)

6 1To lla sabd, llana' chombaan ben' Israelka', wdelen Jesúza' ben'ka' naggake'ne' txen to ga naz ben' trígona', na' ben'ka' zejlangake'ne' wzolo wdshjgake' trígona' na' wxobgake'n wdaogake'n. 2Na' bal fariseoka' gollgake' legake':

—¿Biche chonzle daa bi chiyal' goncho llani chombaancho?

3Na'ch che' Jesúza' legake':

—¿Abin' wlable gana' cho'en dill' ka ben dii Davina' len ben'ka' naggake'ne' txen ka wdongake'? 4Wyo'e loo lill xlatj Chioza' na' wdoyoe' yetxtilka' daa naki che Chioza' daa toz bxozka' de lsens gaogake'. Na' lekzka' bi'en ben'ka' naggake'ne' txen.

5Na' lekzka' chi'e fariseoka':

—Nad', Ben' Bsel' Chioza' Yell-lioni, chnabi'a lao llani chombaancho.

Biyon Jesúza' to beṇ' lla sabda'

(Mt. 12:9-14; Mr. 3:1-6)

6Na' sto lla sabd, llana' chombaṇ beṇ' Israelka', wyaj Jesúza' gana' chdop chllaggake' choe'lwillgake' Chioza' na' wzoloe' chli' chsedile' legake'. Na' ladj beṇ'ka' len to beṇ' net nee de shlina'. 7Na' fariseoka' na' beṇ'ka' chli' chsedi leya' lle'gake' chwiayen'gake' shi wiyon Jesúza' beena' llana' chombaṅgake', kwenche gaogake' xya che'. 8Na' gokbe'i Jesúza' daa chza'lall'gake', na'ch golle' beena' net tḷaa neena':

—Wzolla' na' wze gchoḷa'.

Na'ch wzolla' beena', wzie' gchoḷa'. 9Na'ch goll Jesúza' beṇ'ka':

—Ni inabid' le': ¿Beran na leya' chiya' goncho lla sabdka'? ¿Agoncho dii wenna' anti goncho dii mala'? ¿Ayislacho beṇ' anti witchone'?

10Na'ch bwia Jesúza' legake', na' chi'e beena' net tḷaa neena':

—Bli noona'.

Na'ch bli neena' na' biyakin. 11Na' fariseoka' na' beṇ'ka' chli' chsedi leya' le bllaagake' na' choe'gake' dill' nak ka gongake' che Jesúza'.

Wlej Jesúza' postlka' shllin

(Mt. 10:1-4; Mr. 3:13-19)

12Na' wyaj Jesúza' to lo yaa kwenche jelwille' Chioza', na' do yel be'lwille'ne'. 13Ka wyeeni', goxe' beṇ'ka' nakgake'ne' txen na' ladj beṇ'ka' wleje' beṇ'ki shllin na' bsi'e legake' postl: 14Simónna' beena' bsi'e Pedro, len beṇ' bishee Andréza', na' Jacóbona', Juanna', Felípena', Bartoloména', 15Matewa', Tomáza', Jacobo xiin Alfewa', Simónna', beena' bsi'gake' Zelote, 16Judas, beṇ' bish' Jacóbona'^a na' Jud Scariota', beena' bene' Jesúza' lo na' beṇ' malka'.

Bli' bsemi Jesúza' beṇ' zan

(Mt. 4:23-25)

17Na'ch biyetjlen Jesúza' legake' lo yaana' na' billingake'

^a 6:16 Beṇ' bish' Jacóbona': beṇ'ka' nsemi nagake' chiya' inan xiin Jacóbona'.

to ga nak lesh'. Na' na' lle' beṇ' zan inleeb, beṇ' zaak doxen gana' mbani Judeana' na' yell Jerusalénna', na' beṇ' zaak cho'a nido'na' gana' mbani yell Tírona' na' yell Sidónna'. ¹⁸Wyajgake' kwit Jesúza' kwenche wzenaggake' xtilleena' na' yiyakgakile' bi yillwe' dii chakgake'. Na' lekzka' biyaki beṇ'ka' chsak'zi' dii xiw'ka' legake'. ¹⁹Yog'z beṇ' goklall'gake' idi'gake' Jesúza' daa ba nezgakile' chchej yeḷ' wak che'na' na' chiyaki yog' beṇ'.

Beṇ'ka' zoa mbalaz na' beṇ'ka' bi zoa mbalaz

(Mt. 5:1-12)

²⁰Na'ch bwia Jesúza' beṇ'ka' nakgake'ne' txen, na' chi'e legake':

—Chakomba le' nakle beṇ' yesh' daa chleble yeḷ' wṇabia' che Chioza'.

²¹'Chakomba le' chbiḷ chdonle naa; wllin lla yesh yeljile.

'Chakomba le' chbell-le naa; wllin lla yixill-le.

²²'Chakomba le' shi chakzbani beṇ' le', shi bi chongake' le' txen, shi biya dii nagake' le', na' shi chongakile' le' nakzi ka chongakile' to beṇ' wen dii mal ni cha', nad', Beṇ' Bsel' Chioza' Yell-lioni. ²³Li yibayi, na' li soa mbalaz kat' ba chongakile' le' ka', la' yabana' gaple to dii wen dii shao'. La' ka'kzə beni dii xoxxtoe'ka' beṇ'ka' wdixjee daa goll Chioza' legake' kani'yi.

²⁴'Nyesh'laz gak chele, le' nakle beṇ' wni'a, la'kzi le wen chak chele naa.

²⁵'Nyesh'laz gak chele, le' de dii cheej chaole naa, la' wllin lla ibiḷ idonle.

'Nyesh'laz gak chele, le' chytj chxill-le naa; wllin lla kwellyesh'le.

²⁶'Nyesh'laz gak chele, le' choe'la'o yog' beṇ' le', la' ka'kzə be'la'o dii xoxxto'leka' dii beṇ'ka' benzə ka chyixjee daa che' Chioza' legake'.

Chiyaḷ' gakicho beṇ'ka' chakzbani cho'

(Mt. 5:38-48; 7:12)

²⁷'Le' chzenagle naa, nia' le', li gaki beṇ'ka' chakzbani le'. Li gonigake' wen. ²⁸Li inabi Chioza' gone' ka gak wen che beṇ'ka' chyishj bia' blag' chele. Li inabi Chioza' gaklene' beṇ'ka' chiya dii

nagake' chele. ²⁹Shi no kap' xag'lena' tlaa, li wze daa zi shlaa. Na' shi no koyo xachel-lena', li we'tega len xkamislana'. ³⁰Nottezə ben' shi bi inabe' chele, li we'n. Na' ka', shi no ikaa bi de chele, bi yinabzilene'n. ³¹Li goni ben' kon ka cheenile gongakile' le'.

³²'Shi to ben'ka' nllagzile chakile, ¿garan de dii wenna' daa chonle? La' ka'klen chon ben' saaxyaka'. ³³Lekzka' shi to ben'ka' chonzi le' wen chiyonile wen, ¿garan de dii wenna' chonle? La' ka'klen chon ben' saaxyaka'. ³⁴Na' shi choe'le bi choe'le ben' daa nezile yigwee wzonna', ¿garan de dii wenna' daa chonle? La' ka'klen chon ben' ssaxyaka', choe'gake' bi choe'gake' daa nongake' lez wigoogake' wzon che'ka'. ³⁵Na' le', naalla, chiyal' gakile ben'ka' chakzbani le', na' gonle wen chegake'. Na' shi we'le dii we'le legake', bi gonle lez yiyongake'n. Shi ka' gonle, Chioza' yiyone' dii xench chele, na' inezi ben' nakle xiin Chios, beena' nak ben' choo ben' xen, la' le' chone' wen che ben'ka' bi choe' le' ye! choxken na' ben' wen dii malka'. ³⁶Chiyal' yiyeshii ljwell-le ka chiyeshii Xacho Chioza' yog' ben'.

Bi wwia wyile bi chon ben'

(Mt. 7:1-5)

³⁷'Bi wwia wyile bi chon ben', kwenche bi gon Chioza' xya chele. Bibi wtobile' ben', kwenche bi gaple dol' lao Chioza'. Li si'xen che ljwell-le, na' Chioza' si'xene' chele. ³⁸Li we' ben' bi chyaljile' na' Chioza' yiyone'n. Na' yiyonchle' dii xench, ka chon ben' chzanile' do yichj do lallee kat' bi wi'e, chzoayaa chzoalline'n. La' kon ka chonle chzanile' we'le ben' bi de chele, ka'kzan goni Chioza' le'.

³⁹Na' bzoa Jesúza' to jempl, chi'e legake':

—Nezicho bi gak to ben' lchol' wchi'e sto ben' lchol', la' choptegake' lljabixgake' to loo yech. ⁴⁰Na' beena' chsed bi gak ine': "Chonch' ka beena' chli' chsedile' nad'." Kat'ch yiyoll yido wsede', kana'chan gake' ka beena' bli' bsedile'ne'.

⁴¹¿Biche chwiazoz' bicha' yoo loo jalao bish' ljwello'na' na' bi chile'ilo' kwagaa yoo loo jalawo'na'? ⁴²Shi bi chle'ilo' kwagaa yoo loo jalawo'na', ¿nakra gono' yoo bish' ljwello'na': "Ben'shki yibej' bicha' yoo loo jalawo'na'?" ¿Ben' wxiye! Zigaate bwia cho'na' na' tech wwio' che' bish' ljwello'na'.

Daa chbia to yag chli'n bi yag daa

(Mt. 7:17-20; 12:33-35)

43' Biga zoa to yag wen na' kwiazan dii bi nak wen, ni biga zoa to yag dii bi nak wen kwiazan dii nak wen. 44Ka ile'icho daa chbia to yag, na' chnezicho bi yag daa. Yag yeshaa aga wbian yixwewa', na' lekzka' yag bisgaana' aga wbian uvana'. 45Ka'kzan beena' nak ben' wen, choe' dill' wen, la' loo yichjlall'do'enan' yoo dii wenna'. Na' beena' nak ben' mal, cho'e dill' dii nak mal, la' loo yichjlall'do'enan' yoo dii mala', la' yog' daa chnecho chchejan loo yichjlall'do'chona'.

Chop ben' bengake' twej yoo

(Mt. 7:24-27)

46' Berache nazle nad' "Xan, Xan'", na' bi chonle daa nia' le'? 47Ni inia' le' no zaklebi beena' chone' nad' txen na' chzenague' cha' na' chone' ka nia'. 48Zaklebile' beena' ben to yoo. Zigaate wdene' zitj wal na' wleke' leninna' lo yaja'. Ka wde yawa' na' wyoon le'inna', aga bizoyin yisheen daa, la' chi'cha leninna' lo yaja'. 49Na' beena' cheni cho'a xtillaana' na' bi chone' ka nia', zaklebile' beena' ben lille'na' lo yona' na' bibi lenin wleke'. Na' ka wde yawa' wyoon le'inna', lii billeeten na' wliayi'tekkan.

Biyon Jesúza' xmos xan soldadka'

(Mt. 8:5-13)

7 1Ka biyoll be'len Jesúza' ben'ka' dill', biyaje' Capernaúma'. 2Na' yella' zoa to ben' Roma ben' chnabi'e to guioa soldad, na' zoa to xmose' lille'na', beena' le chakile', na' chake' to yillwe' dii chonan ka witan le'. 3Na' ka beni xan soldadka' choe'gake' xtill' Jesúza', na'ch bselee bal ben' golka' chnabia' Israela' kwenche ljet'yogakile'ne' ljayene' beena' bi shao'. 4Na' ka blin ben' golka' kwit Jesúza', got'yogakile'ne', che'gake':

—Xan soldadka' chidolee gakleno'ne', 5la' le chakile' cho' ben' Israel na' len' bene' yooná' gana' chdi'anto' choe'lwillnto' Chioza'.

6Na'ch wyajlen Jesúza' legake'. Na' ka ba zoa yillingake' lille'na', xan soldadka' bselee bal ben' nllaguile' kwenche jellgake' Jesúza' dill'ki:

—Xan', bi sio' wneyi yido', la' bi chidolaa shoo loo lillii. ⁷Daan bi biyaxjid' yid' kwin' yidtil' li'. La'ch' to chop cho'a dill' shel' ino' na' yiyakile'. ⁸La' zoa no chnabia' nad', na' lekzka' chnabi'a soldad cha'ka'. Na' kat' chep' toe': “Wyaj ni”, na' chaje'. Na' kat' chep' stoe': “Da ni”, na' chide'. Na' kat' chep' xmosaa: “Ben dga”, na' chone'n.

⁹Na' ka beni Jesúza' xtill' beena' na' bibanile', na' biyechje' bwie' ben'ka' zjanogake'ne', na' chi'e legake':

—Dii li, ni to ben' Israel bin' illag' ben' gonlilall'likze' nad' ka chonlilall' beeni nad'.

¹⁰Na'ch ziyaj ben'ka' bsel' xan soldadka', na' ka billingake' lille'na' ble'gakile' ba biyaki xmose'na'.

Bisban Jesúza' xiin to nool wizeb bi' ba wit

¹¹Ka wde, na' wyaj Jesúza' sto yell dii le Naín kon ben'ka' nakgake'ne' txen na' lench zan ben' yoblə. ¹²Na' ka bllingake' cho'a yella', ble'gakile' zjakwash' ben'ka' to bi' wet. Na' bi'na' wit nakb' bi' tlish', na' xna'baa nake' noolə wizeb. Na' ben' zan ben' yellka' zjakwash'gake'b'. ¹³Na' ka ble'i Xancho Jesúza' noola', na' biyeshile'ne', chi'ene':

—Bi kwello'.

¹⁴Na'ch jabigee bexee gana' xoa bi' weta', na' wlez ben'ka' nllengake'b'. Na' golle' bi' weta':

—Bi' xkwid', nia' li', jbiyas!

¹⁵Na' bi' weta' lii bibanteb' na' bibe'b' na' wzolo chineb', na' biyon Jesúza'b' lo na' xna'baa. ¹⁶Na' ka ble'i ben'ka' daa bene', yog'lolze' bbleb na' wzologake' choe'la'ogake' Chioza', nagake':

—Ladjchoni ba bla' to ben' zakii ben' chyixjee daa che' Chioza'ne'.

Na' lekzka' nagake':

—Chiozan' ba blee kwenche gaklene' cho' nakcho yell che'.

¹⁷Na' doxen gana' mbani Judeana' na' yellka' lliia gaozə wnezgakile' daa ben Jesúza'.

Ben'ka' bsel' Juanna' lao Jesúza'

(Mt. 11:2-19)

¹⁸Na' ben'ka' nongake' Juanna' txen jayellgake'ne' yog' diika'

chon Jesúza'. Na'ch Juanna' wñie' chope' 19na' bselee legake' gana' zoa Jesúza' kwenche janabgakile'ne' shi leyen'en' beena' llia bia' yid wa shi chiya' kwezgake' sto ben' yoblə. 20Na' ka bllin ben'ka' bse' Juanna' kwit Jesúza', che'gake'ne':

—Juanna', beena' chchoa ben' nisa', bselee neto' kwenche zidnabinto' li' shi li'yen'kzan nako' Cristona', beena' chbeznto' wsel' Chioza' kwenche inabi'e, wa shi chiya' kweznto' stoe'.

21Na' shlak zegake' na', biyon Jesúza' ben' zan ben' chak yillwe', na' lekzka' bibeje' dii xiw'ka' yoo ben', na' bene' ka ble'i ben' zan ben' lcholka'. 22Na'ch che' Jesúza' ben'ka' bse' Juanna':

—Li yiyaj na' li lljayell Juanna' daa ba ben ble'ile. Li lljayelle' ben' lcholka' chle'gakile', na' ben'ka' bi chak sa' chza'gake', na' ben'ka' chak yillwe'na' daa le lepra chiyakgakile', na' ben' kwelka' chengakile', na' chiban ben' wetka', na' chyixje'id' ben' yesh'ka' dill' wen dill' kob che Chioza'. 23Chakomba beena' chajle' cha' na' bi chakchoplallee.

24Na' ka biza' ben'ka' bse' Juanna', Jesúza' bi'e xtill' Juanna' lao ben'ka' lle' na', chi'e:

—¿Nakra nak beena' jawiale latja' gana' bibi chashj chleb? ¿Anake' to ben' chakchoplallii che dill'ka' cho'e? 25Na' shi bi nake' ka', ¿nakran nak beena' jawiale, shka'? ¿Ato ben' nakwe' lech' dii zakii? La' nezczile ben'ka' nakw lech' dii zakii, na' naptegake' bittezə dii chzelall'gake', zoagake' lill ben' wñabia'ka', aga zoagake' latja' gana' bibi chashj chleb. 26Na' ¿nakran nak beena' jawiale, shka'? ¿Ato ben' chyixjee daa che' Chioza'ne'? Dii li kan' chone', na' chontechle' ka to ben' chyixjee daa che' Chioza'ne'. 27La' che beenin cho'e Cho'a Xtill' Chioza' dill' gana' nan:

Wselaa beena' kwialo lawo'na',
na' chixji'e xtilloona' kwenche soa ben' wzenaggake'
cho' kat' illino'.

28Na' nia' le', lao yog'lo'lte ben' yell-lioni, ni to konon' ichej ben' zak'teche' ka Juanna'. Per nottezə beena' choe' latj inabia' Chioza' loo yichjlall'do'ena', zak'teche' ka Juanna'.

29Na' yog'lo' ben'ka' bchoa Juanna' nisa', no ben' wıchixjka' na' zan ben' yoblə, ka bengakile' daa wna Jesúza', gokbe'gakile' dill' li dill' shao' nak cho'a xtill' Chioza'. 30Na' fariseoka' na'

ben'ka' chli' chsedi leya' bi goongakile' wchoa Juanna' legake' nisa', ni bi goklall'gake' gon Chioza' dii wenna' cheenile' gone' chegake'. ³¹Na'ch goll Xancho Jesúsza' legake':

—¿Bi ka wsaklebid' le' mbanle naa? ¿No ka inia' nakle? ³²Nakle ka bi'do'ka' chbe' gana' chak yaana' na' chosyaagakb' che' ljuwellb': “Bkwellnto' bbleja' na' bi byaale, na' beinto' dii chon nyesh', na' ni bi wchell-le.” ³³La' bid Juan wchoa nisa', na' bi chawe' yetxtil ni bi cheeje' vino, na' nale che': “Dii xiwaan yo'e.” ³⁴Na'ch bid' nad', Ben' Bsel' Chioza' Yell-lioni, na' chle'ile cheej chaw', na' nale cha': “Le ben' waoxat nak beeni na' cheejtie', na' nllagteile' ben' saaxyaka' na' ben' wixhixjka'.” ³⁵Per yel' sin' che Chioza' chli'lawin ka nsa' che ben'ka' chzenaggake' cheyin.

Jesúza' wyaje' lill Simónna', beena' nak fariseo

³⁶To fariseo wnie' Jesúsza' kwenche gaogake' lille'na'. Ka blline' na' wchi'e cho'a mesa'. ³⁷Na' to noolə wda zoa yella', ka wnezile' zjtao Jesúsza' lill farisewa', na'ch wyaje' noxee to lmet de yaj xochi na' yollan set zix. ³⁸De chbellzile' jabigüee xni'a Jesúsza' na' bisbisile' ni'ena' nis xchell che'na'. Na' bisbillile'n yish' yichje'na', na' bnope'n na' bwazje'n set zixa'. ³⁹Na' farisewa', beena' wnie' Jesúsza' lille'na', ka ble'ile' ka chon noola', na' gokile': “Shel'ka' dii li nak beeni to ben' chyixjee daa che' Chioza'ne', wakbe'ile' nan nooli chox' ni'ena' nake' ben' saaxya.” ⁴⁰Na'ch che' Jesúsza' farisewa':

—Simón, de to dii cheenid' inia' li'.

Na' che' Simónna':

—Wna, Maestro.

⁴¹Na'ch che' Jesúsza':

—Chop ben' chbag'gake' mech che to ben' chon yichjin. Toe' chbaguee gay' guiyoa mech plat^b, na' stoe' chbaguee shiyonan. ⁴²Na' ni toe' bi bllelgakile'n yiyixjgake'n. Na'ch xan mecha' benxenlallee daa chal'gake' che'. Wnashki nad', ¿no ben'ka' chop gakchile'ne'?

⁴³Na'ch che' Simónna':

b 7:41 *Mech plat*: dill' griegona' nan *denario*, na' nakan to mech dii zak' che shlla llin.



*Daa gok lall beñ' Israelka' yo bill, wche'chgan bishtena',
na' kat' bllin beñ' lille'ka', wdibgake' ñi'eka' kwenche
biyakshao'lallee. Na' beñ'ka' bibi zakiin wdibgake' ñi'eka'.*

—Chakid' beena' chbag' dii xench.

Na' che' Jesúza'ne':

—Lekzilo', kan' nakan.

44Na'ch bwia Jesúza' noola' na' chi'e Simónna':

—Bwiakachi nooli. Ka wyo'a loo lillo'ni bi beño' nisa' kwenche
chib ñi'ani, per nooli ba wdibile' nis xchell che'na' ñi'ani na'
bisbillile'n yish' yichje'na'. 45Bi bnopo' nad', per nooli kon ka
wyo'a chnoptezi chnope' ñi'ani. 46Bi wdebo' yichjii set, per nooli
ba bwazje' set zixa' ñi'ani. 47Daan nia' li', la'kzi dii zan saaxya
ba ben nooli, ba biyakxengakan daa le chakchgaile' nad'. Na'
beena' lat'zə biyakxen che', lekzka' lat'chga chakile' nad'.

48Na'ch golle' noola':

—Ba biyakxen saaxya cho'ka'.

49Na' beñ'ka' chi'lengake' Jesúza' txen wzologake' che'
ljwellgake':

—¿Nora beeni, lla, axt saaxyaka' chizi'xene'?

50 Na' Jesúza' chi'e noola':

—Daa chonlilalloo nad', ba bilo' lao ye! zak'zi'na'. Biyaj mbalaz.

Noolka' goklengake' Jesúza'

8 1 Ka wde dga, wda Jesúza' zan yell xen na' zan yelldo', chyixji'e dill' koba' nan Chioza' chñabi'e loo yichjall'do' beñ'ka' chzenag che'. Na' postl che'ka' shllin chdalengake'ne' txen. 2 Na' lekzka' len ba! noolka' ba biyone'. Ba!e' bibeje' dii xiw'ka' wyoogake', na' zi ba!e' gokgake' yillwe' na' biyone' legake'. Na' ladje'ka' len Maríana', noola' nsi'gake' Magdalena, beena' bibej Jesúza' gall dii xiw'ka'. 3 Na' lekzka' len noola' le Juana, xool Chúzana', beena' ngoo lo nee chap chwie' lill Heródeza'. Na' len Susánana', na' zanch noolka' beñ'ka' jano Jesúza' na' bchingake' dii de chegake' kwenche goklengake'ne'.

Jempl che to beñ' goz goon

(Mt. 13:1-9; Mr. 4:1-9)

4 Beñ' zan bllesh to to yell jawiagake' Jesúza', na' ka bdop beñ' zan wal na'ch bseesile' legake' to jempl, chi'e:

5—To beñ' goz goon wzee zeje' goza'. Na' ka zej chzalee binna', balan bxop cho'a neza' na' blej bshoshj beñ' len, na' bllin byinka' wdaogakban. 6 Na' zi balan bxop ladj yajka' gana' bitek chi' yona', na' ka bla'gakan to wbillzgakan, la' aga bi gop' de gana' bxopan. 7 Na' zi balan bxop ladj yag yesh'ka', na' ka bla'gakan aga be' yag yesh'ka' latj igolgakan. 8 Na' zi balan bxop lo yo wenna', na' le bgolgakan na' axt do to guiyoa wej wllia to ton.



To beñ' goz goon wzee zeje' goza'. Lc. 8:5a

Na' ka biyoll bseese jemplá, na'ch wñie' zilljə chi'e:
—Le' chenile dga nia', li sen wñeyi.

Bzajonii Jesúza' biçhe chzoe' jemplka'

(Mt. 13:10-17; Mr. 4:10-12)

⁹Na'ch wñab ben'ka' nakgake'ne' txen bi zejin jemplá daa bseese. ¹⁰Na' che' Jesúza' legake':

—Chioza' cho'e latj inezile daa kono ñezkzi, ka chñabi'e loo yichjlall'do' ben'ka' chzenaggake' che'. Na' ben'ka' sto chseesid' legake' shga! jempl, la' la'kzi chle'gakile' bin chon', kon chongake' ka ben' bi chle'i. Na' la'kzi chengakile' bin nia', aga chajni'gakile'n.

Bzajonii Jesúza' bi zeji jempl che ben' goz goona'

(Mt. 13:18-23; Mr. 4:13-20)

¹¹'Kin zeji jempl che ben' goz goona': cho'a xtill' Chioza' nakan ka binna' daa goze'. ¹²Na' zoa ben' chzenaggake' cho'a xtill' Chioza', na' lii ze'te dii xiwaa chikwasan daa kwenche bi shajle'gake' na' kwiayi'gake'. Chak chegake' ka gok che binna' daa bxop cho'a neza'. ¹³Na' zoa ben' chibagakile' chzenaggake' cho'a xtill' Chioza' na' chlebgake'n, per kat' chak bi chak chegake' na' chbej yichjgake'n. Chak chegake' ka gok che binna' bi bde loinna' daa bxopan lo yaja'. ¹⁴Na' zoa ben' chzenague' cho'a xtill' Chioza', per chi'ch yichjgake' daa chak chegake' na' che yel' wni'ana', na' che bichlə dii chzelall'gake', na' bi chakchagake' lo xnez Chioza'. Chak chegake' ka gok che binna' bxop ladj yag yesh'ka'. ¹⁵Na' zoa ben' chzenaggake' cho'a xtill' Chioza' do yichj do lall'gake' na' chongake' ka nan, na' chzo chzakgakile' bittezə dii chak chegake'. Ben'kin chak chegake' ka gok che binna' bxop lo yo wenna' daa le wllia.

Jempl che to kandil

(Mr. 4:21-25)

¹⁶'Biga zoa to ben' chxene' kandila' na' chdose'n to dii wkwashaan daa wa chzoe'n xan xlague'na', san chzoe'n sibə kwenche ile'i ben'ka' sho' loo yoona'. ¹⁷Na' lekzka' yog'lo!te dii ngash' naa, wllin lla yila' lawin, na' daa kono nezi naa, wllin lla inezi benaan.

18'Li wzenag dga nia' le' naa. Beena' chzenag zizikchli shajni'chile', na' beena' bi chzenag, daa ba bzenague' lat', yog'l_olan yiyal_l-lallee.

Xna' Jesúza' len ben' bisheeka'

(Mt. 12:46-50; Mr. 3:31-35)

19Na'ch bllin xna' Jesúza' len ben' bisheeka' gana' zoe', na' bi gok ibig'gake' kwite'na' daa lle' ben' zan. 20Na' wbig' to ben' golle' Jesúza':

—Xnoona' len ben' bishooka' lle'gake' lesh' chyoonaa' na' cheengakile' wshaljlengake' li'.

21Na' goll Jesúza':

—Ben'ka' chzenaggake' cho'a xtill' Chioza' na' chongake' ka nan, legaken' nakgake' xna' na' ben' bishaa.

Jesúza' bkweze' to be' wal lo nisdona'

(Mt. 8:23-27; Mr. 4:35-41)

22To lla wyoo Jesúza' to loo barkw len ben'ka' nakgake'ne' txen na' golle' legake':

—Techo shlaalə nisdoni.

Na'ch wza'gake'. 23Na' shlak ngoo barkwa' nez, wtes Jesúza'. Na'ch wze to be' wal lo nisdona' na' wzolo chas chat' nisa' na' biyollan loo barkwa', na' zi lat'zə nan kwe'n yel. 24Na' jasangake' Jesúza', che'gake'ne':

—¡Maestro! ¡Maestro! ¡Ba chbe'cho yel!

Na' wyas Jesúza' na' bsheshlene' be'na' len nisdona'. Na' wlezgakan, bich bi gok. 25Na'ch golle' legake':

—¿Abi chonlilall'kzle nad'?

Na' legake' le chllebgake' na' le chibangakile' na' che' ljwellgake':

—¿Nora beeni lla?, axt be'na' na' nisdona' chzenaggakan che'.

Bibej Jesúza' dii xiwaa yoo to ben' Gadara

(Mt. 8:28-34; Mr. 5:1-20)

26Na'ch bllingake' yell-lío che ben' Gadáraka', daa llia shlaa nisdona' ndil yell-lío che Galileana'. 27Ka bichej Jesúza' loo barkwa' jabig' to ben' Gadara kwite'na'. Ba wlla yo'e dii xiw'ka',

na' bich bi xalaane' nakw, ni bich zoe' lille', san kapsanta' noni lille'. 28Na' ka ble'ile' Jesúza', besyee na' jachek' xibe' lawe'na', na' zillj inlleb chi'e:

—Jwayiz nad', Jesús Xiin Chios, ben' nak liizelozi ben' choo ben' xen. Ben goklen bi wsak'zi'o nad'.

29Gollan ka' daa ba chon Jesúza' byen yichejan. Ba wlla chnabi'an le' na' la'kzi chchejgake' ni'a neena' gdenna', lobe' chchogue'n. Na' dii xiwaa chtadon le' na' chjsoe' ga kono ben' lle'. 30Na' che' Jesúza':

—¿Bin lio'?

Na' chi'e:

—Legiónan lia'.

Golle' ka', la' zanannan' yo'e. 31Na' got'yogakin Jesúza' bi wseleegakan gana' kwiayi'gakan. 32Na' gaozə zoa to yaa gana' lle' kush zan chaogakb. Na' dii xiw'ka' wzeyidgakan wñabgakin Jesúza' wi'e latj yiyoogakan kushka', na' bi'e latj. 33Na'ch bichej dii xiw'ka' yoo beena' na' biyoogakan kushka'. Na' lii goklleshtegakib na' jabixgakb to cho'a bdiñj na' jshoogakb loo nisa' na' witgakb.

34Na' ben'ka' chap kushka' ka ble'gakile' daa gok, biyajdogake' jazengakile'n ben'ka' lle' yella' na' ben'ka' lle' lyixaa. 35Na'ch bllesh ben'ka' jawiagake' daa gok. Na' ka bllingake' kwit Jesúza', na' chi' beena' wyoo dii xiw'ka' kwite'na'. Ba biyakw xalaane'na' na' ba biyeen biyeeniile'. Na' bllebgake'. 36Na' ben'ka' ble'gakile' daa gok, gollgake' ben'ka' zi' bllin nakan gok biyaki beena' wyoo dii xiw'ka'. 37Na' yog'lo ben' Gadáraka' got'yogakile' Jesúza' yizee lalle'ka' daa le chllebgake' ka bene'. Na' biyo'e loo barkwa' ziyaje'. 38Na' beena' bichej dii xiw'ka' got'yoile' Jesúza' wi'e latj shajlene'ne'. Per Jesúza' chi'ene':

39—Biyaj lillo'na' na' jaye' dill' ka nak dii wen dii shawaa daa ba ben Chioza' cho'.

Na'ch biyaj beena' jayee dill' doxen yella' ka nak dii wen dii shawaa daa ben Jesúza' che'.

Biyon Jesúza' noola' bexee xe'na' na' lekzka' xiin Jairona'

(Mt. 9:18-26; Mr. 5:21-43)

40Ka billin Jesúza' shlaa nisdona', le chiba chizaki ben'ka' lle'

na', la' yog'zgake'n chbezgake' le'. 41 Na'ch bllin to ben' le Jairo, nake' to ben'ka' chgoo xnezi cheyi diika' chon ben' Israelka' gana' chdop chllaggake' choe'lwillgake' Chioza'. Na' b'chek' xibe'na' lao Jesúza' na' got'yoile'ne' shaje' lille'na', 42 daa ba chakshwet bi' nool che'na'. Nakb' to bi' tlish' tyaj, na' ka do shllin yizib'. Na' shlak zej Jesúza' ben' zan janogake'ne' axt bdakwyillgake'ne'.

43 Na' ladj ben'ka' zjano Jesúza' len to noolə ba gok shllin yiz chzoe' wbaana'. Na' ba blliyee yog' dii de che' daa chajtezi chaje' lao ben' wen rmechka', na' ni to kono gok yiyon le'. 44 Na'ch wbiguee koll' Jesúza' beḡee xe'na', na' katena' lii biyakteile'.

45 Na'ch goll Jesúza' ben'ka' zjano le':

—¿No beena' ba beḡ' nad'?

Na' ni to kono b'cheb. Na'ch goll Pédrone'ne':

—Maestro, ben'kin chdakwyillgake' li' na' chllig'gake' li' to ki to ka'lə. ¿Bi'che nazo': "Non ba beḡ' nad'?"

46 Na' che' Jesúza' legake':

—Nochodan' ba beḡ' nad', la' gokbe'teid' b'chey ye'l' wak cha'na'.

47 Na' noola', ka gokbe'ile' aga wak wkwashee, do chllebze' jachek' xibe'na' lao Jesúza'. Na' lao yog'lo' ben'ka' lle' na', golle' bi'che beḡ'ze' xe'na' na' daa beḡeen lii biyakteile'. 48 Na'ch goll Jesúza'ne':

—Xiin', daa chonlilalloo nadaan biyakilo'. Biyaj mbalaz.

49 Ni choe'telə Jesúza' dill' ka bllin to ben' wzee lill Jairona', na' jelle'ne':

—Ba wit bi' cho'na'. Bich gonilo' Maestroni zed.

50 Na' ka beni Jesúza', na' golle' Jairona':

—Bi illebo'. Wyajle' cha', na' wiyakkzi bi' cho'na'.

51 Na' ka bllingake' lille'na', aga be' Jesúza' latj sho' ben' yoblə, lete Pédrone', Jacóbona', Juanna' na' xaxna' bi' weta'zə.

52 Yog'lo' ben'ka' lle' lill Jairona' chbellgake' daa ba wit bi'do'na'. Na' goll Jesúza' legake':

—Bi kwell-le, aga witbaan, cheszbaan.

53 Na' bxill-ləgake' che', la' nezgakile' ba witbaan. 54 Na'ch beḡ' Jesúza' na' bi' wetdo'na' na' wnie' zilljə, chi'e:

—Biyas, bi'do'.

55 Na'ch bibam' na' lii biyasteb'. Na' goll Jesúza' legake' we'gake' dii gaob'. 56 Na' xaxna'baa le bibangakile', na' che' Jesúza' legake' ni to kono ye'gake' daa gok.

Ben'ka' shllin jtixje'gake' cho'a xtill' Chioza'

(Mt. 10:5-15; Mr. 6:7-13)

9 ¹Na' bitop Jesúza' ben'ka' shllin, na' bi'e legake' yel' wak na' yel' wñabia' kwenche yibejgake' yog'lol' dii xiw'ka' yoo ben' na' yiyongake' ben' che'i yillwe'. ²Na' bselee legake' kwenche llje'gake' dill' ka nak yel' wñabia' che Chioza', na' yiyongake' ben'ka' bi shao'. ³Na' chi'e legake':

—To ka chazlen li shaj. Bi gox'le yag bar, bi wa'zle yixj ga koo xshinlazle, bi wa'le dii gaole, ni mech, na' ni zi shkwe' xale. ⁴Na' yooná' gana' illinle, na'tezə soale ax̄t ka illinch lla yiza'le. ⁵Na' yella' gana' bi wlebgake' le', kat' yiza'le, yishible bishtena' lla ni'aleka' kwenche gakbe'gakile' aga wenan chongake' bi chlebgake' cho'a xtill' Chioza'.

⁶Na'ch wza' ben'ka' nakgake'ne' txen na' wyajgake' to to yell wdixje'gake' dill' wen dill' kob che Chioza' na' biyongake' ben'ka' bi shao'.

Wit Juanna', beena' bchoa ben' nisa'

(Mt. 14:1-12; Mr. 6:14-29)

⁷Heródeza', beena' wñabia' gana' mbani Galileana', benile' yog' daa chon Jesúza'. Na' chakile' nora beena', la' bal' ben' nagake' dii Juan wichoa nisan' ba bibane' dii yoblə. ⁸Na' zi bale' nagake' Elíazan' ba bila' dii yoblə. Na' zi bale' nagake' nochod' dii ben'ka' wdixjee daa goll Chioza' legake' kani'yin ba biban ladj ben' wetka'. ⁹Na' Heródeza' wne':

—Nad' ben' mandad wchog yen dii Juanna'. ¿Noraz beena' chenzid' nagake' chiya dii chone', lla?

Na' le goklall' Heródeza' ile'ile' Jesúza'.

Jesúza' bwawe' gayaa mil ben'

(Mt. 14:13-21; Mr. 6:30-44; Jn. 6:1-14)

¹⁰Na' ka billin postlka' shllin, na' gollgake' Jesúza' yog'lol' diika' jengake'. Na'ch bchi'e to lezgake' yella' le Betsaida. ¹¹Na' ka wñezi ben'ka' ba zej Jesúza', na'ch wloogake' nez zjanogake'ne' na' ka bllingake' lawe'na', blebe' legake' na' bzajniile' legake' ka nak yel' wñabia' che Chioza', na' biyone' ben'ka' bi shao'.

12Na' ka ba wle', ben'ka' shllin jabig'gake' kwit Jesúza' na' gollgake'ne':

—Goll ben'ki yiyajgake' yellka' wa no ranshdo'ka' llia gaozə lljadiljgake' dii gaogake' na' ga guesgake', la' ga ni zoacho bikzə bi de.

13Na' che' Jesúza' legake':

—Len', li we' dii gaogake'.

Na'ch che'gake'ne':

—Gay'lish'tgui yetxtilki napcho na' zi chopchga bel, lechozə shi willxi'chnto' che yoguee.

14Gollgake'ne' ka' la' ka do gayaa mil ben' byoka' lle' na'. Na'ch che' Jesúza' ben'ka' shllin:

—Li ye'gake' kwe' shiyon wejgake'.

15Na' bzoagake' xtillee na' wlekgake' ben'ka'. 16Na'ch bex' Jesúza' yetxtilka' gay' na' belka' chop. Na' blis jalawe'na' yabana' bi'e Chioza' ye' choxken, na' bcoxje'n na' bi'en ben'ka' nakgake'ne' txen na'ch be'gake' che che ben'ka'. 17Na' yog'gake' wdao ka beljgakile', na' diika' bichoonan bitopgake'n biyakten shllin xet'.

Pédrona' bi'e dill' nan Jesúza'n beena' wlej Chioza' inabi'e

(Mt. 16:13-19; Mr. 8:27-29)

18To shii ka choe'llwill Jesúza' Chioza', na' lle' ben'ka' nakgake'ne' txen, na' wnable' legake':

—¿Non na ben'ka' nak'?

19Na' che'gake'ne':

—Bale' nagake' nako' dii Juan wichoa nisa', na' zi bale' nagake' nako' Elíaza', na' zi bale' nagake' nako' to ben' wdixjee daa goll Chioza'ne' kani'yi, na' ba bibane' ladj ben' wetka'.

20Na'ch chi'e legake':

—Shera le', ¿nora nale nak'?

Na'ch che' Pédróna'ne':

—Lin' Crístona', beena' ncheb Chioza' wselee.

21Na'ch goll Jesúza' legake' ni to kono ye'gake' ka'.

Goll Jesúza' postl che'ka' wit ben' le'

(Mt. 16:20-28; Mr. 8:30-9:1)

22Na' chi'e legake':

—Kon ka nchogbia' cha', nad', Ben' Bsel' Chioza' Yell-lioni,

biya dii w̄chi' wsak'gake' nad'. Na' beṅ' golka' chṅabia' wzoagake' nad' ka'lə na' ka'kzə b̄xozka' chṅabia' na' beṅ'ka' chli' chsedi leya'. Na' chonan byen witgake' nad', na' ka gak shoṅ lla yiban' ladj beṅ' wetka'.

²³Na'ch golle' yog'l̄ole':

—Shi no cheeni gon nad' txen, chiya'l' wsanlall' kwine' na' izanile' ye'l' mban che'na' yen ile'ile' bittez ni cha', na' gone' ka chazlallaa. ²⁴La' beena' bi chzani ye'l' mban che'na' yen ile'ile' bittez ni cha', beenan' kwiayi'. San beena' chzani ye'l' mban che'na' ni cha', beenan' gat' to ye'l' mban che' zejli kani. ²⁵Bibi zjanayin gap beṅ' yog'l̄ol' daa de yell-lioni, shi le' kwiayee. ²⁶Nottezə beṅ' chiyii chido'i nad' na' che cho'a xtilaana', ka'kz nad', Beṅ' Bsel' Chioza' Yell-lioni, yiyii yido'id' le' kat' yiyed' kon balaan xen cha'na', na' che Xa' Chioza' na' che anjl che'ka'. ²⁷Na' dii li nia' le', ba-le lle'le ni, ni mbanle kat' wli' Chioza' ye'l' wṅabia' che'na'.

Jesúza' biyake' nlla'lə

(Mt. 17:1-8; Mr. 9:2-8)

²⁸Ka gok do to xman wna Jesúza' ka', na'ch wyaje' to lo yaa kwenche jelwille' Chioza' na' b̄chi'e Pédrona', Juanna' na' Jacóbona'. ²⁹Na' shlak choe'l̄wille' Chioza', biyak cho'alawe'na' nlla'lə, na' biyak xe'na' xtil axt chey cheeni'n. ³⁰Na' gokxe chop beṅ' bshaljengake'ne', toe' dii Moiséza' na' beena' sto Elíaza'. ³¹Na' ye'l' chey cheeni'na' nechjan legake'. Na' chshaljengake'ne' che ka nak ye'l' wita' ile'ile' Jerusalénna'. ³²Na' Pédrona' len Juanna' na' Jacóbona' le chakxwesgake', per bendiplall'gake' bi wtesgake', na'ch ble'gakile' ye'l' chey cheeni' che Jesúza' na' che beṅ'ka' zi chop bllin kwite'na'. ³³Na' ka ba chikwas dii Moiséza' na' Elíaza' kwit Jesúza', Pédrona' golle' Jesúza':

—Maestro, ¡le wen zoacho nizə! Gonnto' shoṅə ransh, to cho', to che dii Moiséza' na' sto che Elíaza'.

Na' ni bi gokbe'i Pédrona' bin golle'. ³⁴Na' ni choetie' dill', ka wze to bej gana' lle'gake' na' bkwashaan legake'. Na' le bllebake' ka gokbe'gakile' ba yoogake' loo beja'. ³⁵Na' loo beja' bengakile' shii Chioza', chi'e legake':

—Beenin xiīnaa, na' le chakidee. Li wzenag che'.

36Na' ka wde goll Chioza' legake' ka', na' ble'gakile' stozə Jesúza' ze. Na' ni to kono gollgake' daa ben ble'gakile'.

Biyon Jesúza' to bi' wew' yoo dii xiwaa

(Mt. 17:14-21; Mr. 9:14-29)

37Betiyo, ka biyetjgake' lo yaana', ben' zan wal jatilgake' legake'. 38Na'ch ladj ben'ka' wne to ben' byo zillj, chi'e Jesúza':

—Maestro, ben goklen bwiagach bi' cha'ni, la' tlish' tyajchgabaan zoa. 39Dii xiwaa choxa'n leb' na' tokonganz chosyaab', na' chonan ka chazb' shon axt chbia bllin' cho'abaa. Na' chiya dii chonin leb', na' aga cheenin wसान leb'. 40Ba got'yoid' ben'ki nakgake' li' txe*n* yibejgachgake' dii xiwaa yoob', na' bi gokgake' yibejgake'n.

41Na'ch che' Jesúza':

—¿Zi'tegalə chelena', le' ben' mal na' ben' bi chajle'! ¿Zi ka'k'tek chiya' soalen' le'? Na' ¿zi ka'k'tek chiya' soid' le'? Da diwa' bi' cho'na' ni.

42Na' ka zej bi'na' kwit Jesúza' na' wchoon dii xiwaa leb' lo yona' na' wyazb' shona' sto shii. Na'ch bsheshlen Jesúza' dii xiwaa na' bichejan, na' biyakib'. Na' biyone'b' lall' na' xabaa. 43Na' yog' ben'ka' lle' na' bibangakile' daa ble'gakile' ye'l' wak xen che Chioza'.

Sto shii wdixjee Jesúza' witgake'ne'

(Mt. 17:22-23; Mr. 9:30-32)

Na' shlak chibani yog' ben'ka' ble'i daa ben Jesúza', na' golle' ben'ka' nakgake'ne' txe*n*:

44—Li wzeyen' nagle dga inia' le': gongake' nad', Ben' Bse'l' Chioza' Yell-lioni, lall' na' ben'ka' chakzi' chakzbani nad'.

45Na' bi wyajni'gakile' bin golle', la' ni ngashaan lawe'ka' kwenche bi shajni'gakile'n. Na' bllibgake' inabgake'ne' bi zej*n* daa golle' legake'.

¿Noran zak'chi?

(Mt. 18:1-5; Mr. 9:33-37)

46Na' wzolo chakdil-len ljwellgake' nogaken' nak ben' zak'chi. 47Ka gokbe'i Jesúza' daa chza'lall'gake', na'ch wdoyoe' to bi'do'

na' bzie'b' kwite'na'. 48Na' chi'e legake':

—Nottezə beŋ' wlebe' laa to bi'do'zə ka bi'do'ni daa chonlilallee nad', nad'kzan chlebe'. Na' beena' chlebe' nad', lekzka' chlebe' Chioza', beena' bsel' nad'. Na' beena' chaki bibi zakee lao yog'le, len' nake' beŋ' zak'chi ladjlena'.

Beena' bi chakile' cho' zi', txenkzan nake' cho'

(Mr. 9:38-40)

49Na'ch goll Juanna'ne':

—Maestro, ba ble'into' to beŋ' chzetje' lio'na' kwenche chibeje' dii xiw'ka' yoo beŋ'. Na' blonnto' gone' ka', la' bi nake' cho' txen.

50Na' che' Jesúza' legake':

—Bi wllonle gone' ka', la' beena' bi chakile' cho' zi', txenkzan nake' cho'.

Jesúza' bsheshlene' Jacóbona' len Juanna'

51Na' ka ba zoa yiyaj Jesúza' yabana', na'ch btoblallee yiyaje' Jerusalénna'. 52Na' bselee beŋ' wllialozegagake' na' wyajgake' to yell daa mbani Samáriana' jtiljgake' gana' yigaane'. 53Na' beŋ' Samáriaka' bi blebgake'ne' daa nezgakile' Jerusalénna'lan yiyaje'. 54Na' chop beŋ'ka' nakgake'ne' txen, Jacóbona' len Juanna', ka ble'gakile' ka ben beŋ' Samáriaka', na' che'gake' Jesúza':

—Xan', ¿acheenilo' inabinto' Chioza' wselee yi'na' kwenche sheytega beŋ'ki?

55Na' biyechj Jesúza' bsheshlene' legake', chi'e:

—Aga nezele non chnabia' yichjlall'do'lena' nazle ka'. 56Nad', Beŋ' Bsel' Chioza' Yell-lioni, aga zaa kwenche wlliyaa yel' mban che beŋ', san zaa kwenche yisla' yel' mban che'kan'.

Na'ch biyajgake' yell yoblə.

Beŋ'ka' goklall' Iljano Jesúza'

(Mt. 8:19-22)

57Na' ka zejgake' tneza', to beŋ' chi'e Jesúza':

—Xan', cheenid' sa'len' li' gattezə shajo'.

58Na' che' Jesúza'ne':

—Zoa yech ga chiyoo bez'ka', na' byindo'ka' non lilldo'gakk, san nad', Beŋ' Bsel' Chioza' Yell-lioni, biga de yigaan'.

59 Na'ch che' Jesúza' sto beṅ':

—Da dino nad'.

Na' beena' chi'ene':

—Xan', ben goklen be' latj zigaate lljakwashaa xa'na'.

60 Na'ch che' Jesúza'ne':


—Bibi gakilo', wikwash'kzə ljuwell beṅ' wetka'. San li', jtixje'i beṅ' ka nak ye! wṅabia' che Chioza'.

61 Na'ch sto beṅ' yoblə chizi'e Jesúza':

—Xan', cheenid' sa'len' li' per zigaate be' latj lljaḷaach' dill' bish' ljuwell'ka'.

62 Na' che' Jesúza'ne':

—To beṅ' chwaane' goon, aga wak wwie' gozkoll'la. Na' ka'kzan nakan che beena' noe' nad', shi bi nchoglallee aga wak gone' ka cheeni Chioza'.




To beṅ' chwaane' goon, aga wak wwie' gozkoll'la. Lc. 9:62

Jesúza' bselee guiyon shllin beṅ' jtixje'gake' cho'a xtilleena'

10 ¹Na' ka wde dga, Jesúza' wleje' zi guiyon shi beṅ'^c na' bselee chop weje' wllialogake' lawe'na' kwenche llje'gake' cho'a xtilleena' yellka' gana' llia bia' shaje'. ²Na' golle' legake':

^c 10:1 Guiyon shi beṅ': baḷ yishka' nyoj de dill' griegona' nan guiyon shllin.



*Li shajshki naa, nad' chselaa le' ka xildo'
ba zej ladj ba znia. Lc 10:3*

—Dii li nia' le', dii xen wal daa yizi' yilaple de, na' to choptgui wen llinka' zoa. Na' li inabi Chioza', beena' nak xan llinna' wsel'stoe' wen llinka' kwenche yizi' yilapgake'n. ³Li shajshki naa, nad' chselaa le' ka xil'do' ba zej ladj ba znia. ⁴Bi wa'le ga koo xshinlazle, ni mech, ni zi shkwe' xel-le; na' bi shazile wwaple ben' chiox tneza'. ⁵Na' ka sho'le to lill ben', zigaate wwaplene' chiox, ye'lene': “Soashgale mbalaz, le' zoale yooni.” ⁶Na' shi zoa ben' cheenile' soe' mbalaz, na' ye'l' mbalaza' yigaanlenan le'. Na' shi bi cheenile', na' yibiilenan le'. ⁷Na' yoonaa' gana' illinle na'tezə yigaanle na' yeej gaole kon bi gongake' le', la' to wen llin chiyal' ikaa laxje'. Na' bi lljsoale to to yoo. ⁸Kat' illinle to yell ga wlebgake' le', yeej gaotezle bittezə dii gongake' le'. ⁹Na' yiyonle ben'ka' bi shao' yella', na' ye'le legake': “Ye'l' wñabia' che Chioza' ba bla'n laoleni.” ¹⁰Na' shi illinle to yell ga bi wlebgake' le', li yide lyell, li ye'gake': ¹¹“Axt bishte che yell cheleni wllia ni'anto'ni chibibnto'n kwenche gakbe'ile aga wenan chonle bi chleble cho'a xtill' Chioza'. Na' li koosha yichjle dga inanto' le', ye'l' wñabia' che Chioza'n ba bla'n laoleni.” ¹²Na' nia' le', ben'ka' lle' yellka' gana' bi wlebgake' le', dii xench nak ye'l' zak'zi'na' ile'gakile' aga ka ben' yell Sodómaka' llana' wchoglo Chioza' che ben'.

Ben'ka' bi bzenag xtill' Jesúsza'

(Mt. 11:20-24)

¹³'iNyesh'laz gak chele, le' ben' yell Corazín na' le' ben' yell Betsaida! La' shel' gok ye'l' wakka' yell Tírona' na' Sidónna' ka

diika' ba gok ladjlena', kana'telja biyaj bilengakile' saaxya che'ka', na' ba wche'gake' bwazjgake' dena' yichjlaogake' na' gokwgake' lech' zeshaa, kwenche wli'gake' nan ba biyaj bilengakile' daa chongake', shel'ka'. ¹⁴Kat' illin lla wchoglo Chioza' che ben', yel' zi' xench ile'ile aga ka ben' yell Tíroka' na' ben' yell Sidonka'. ¹⁵Na' le' ben' yell Capernaúm, bi gonle lez yillinle yabana', la' Chioza' wzalee le' gana' sak'zi'le.

¹⁶Na'ch che' Jesúza' ben'ka' bselee:

—Ben'ka' chzenaggake' chele, cha'kzan chzenaggake'. Na' ben'ka' bi chlebgake' le', nad'kzan bi chlebgake'. Na' beena' bi chlebe' nad', lekzka' bi chlebe' Chioza', beena' bsel' nad'.

Billin ben'ka' guiyon shi

¹⁷Na' ben'ka' guiyon shi^d le chibagakile' ka billingake' kwit Jesúza', na' che'gake'ne':

—Xan', ax̄t dii xiw'ka' chilleshgakan ka chzetjnto' lio'na'.

¹⁸Na'ch che' Jesúza' legake':

—Ble'id' Satanáza' daa chn̄abia' dii xiw'ka' bxopan yabana' ka chxop to yi' wziw'. ¹⁹Nad' ba ben' le' yel' waka' kwenche la'kzi gad' no bel z̄nia wa no bex̄joni' le' aga bi gakile', na' wlej wshoshjtele yog' daa chon dii xiwaa. ²⁰Per bi yibaile daa chisheshle dii xiw'ka', san li yibayi daa ba da' lelená' lee libra' de yabana'.

Jesúza' bibaile'

(Mt. 11:25-27; 13:16-17)

²¹Na' katena' Espíritu Sántona' bene' ka bibachgayi Jesúza', na' wne':

—Xa, li' nako' Xan yabana' na' yell-lioni, na' choe'lawaa li' daa ba bliilo' ben'ka' bibi chajni' daa bi bliilo' ben' sin'ka' na' ben'ka' nteyi. Kan' ba wyazlalloo gono', Xa.

²²Xa'na' ba none' lall' na' yog'te dii de. Na' ni to kono nezi noyen'an' nak' nad' Xiine'; toz Xa'na' nezile'n. Na' ni to kono nezi noyen'an' nak' Xa'na'; toz nad' Xiine' nezid', na' chon' ka inezi ben'ka' cheenid' inezgakile'n.

²³Na'ch biyechje' bwie' ben'ka' nakgake'ne' txen, chi'e legake':

^d 10:17 Guiyon shi ben': ba_l yishka' nyoj de dill' griegona' nan guiyon shllin.

—Chakomba ben'ka' chle'gakile' diika' chle'ile naa. ²⁴Nia' le' ka', la' zan ben'ka' wdixjee daa goll Chioza' legake' na' zan ben' wñabia'ka' goklall'gake' ile'gakile' diiki chle'ile naa, na' bi ble'gakile'n. Goklall'gake' yengakile' dga chenile naa, na' bi bengakile'n.

To ben' Samaria bene' to dii wen

²⁵Na'ch wbig' to ben' chli' chsedi leya' wñabile' Jesúza' kwenchezə inezile' shi wak yillii Jesúza' xtilleena', na' wñabile'ne':

—Maestro, ¿bin chiya! gon' kwenche gat' to yel' mban cha' zejli kani?

²⁶Na'ch che' Jesúza'ne':

—¿Bin na leya' chiya! goncho? ¿Bi na daa chlabo'?

²⁷Na'ch beena' chli' chsedi leya' chi'e:

—“Chiya! gakicho Xancho Chioza' do yichj do lall'cho, do ka nak fuerz chchona', na' axt ga zeelo chajniicho; na' gaki bish' ljwellcho ka chaki kwincho.”

²⁸Na'ch che' Jesúza'ne':

—Kayen'nan nakan ka ba wno'. Shi gono' ka nan, na' gat' to yel' mban cho' zejli kani.

²⁹Na' beena' bi goklall' wñit kwine', na'ch chi'ene':

—¿Noran bish' ljwell'?

³⁰Na'ch che' Jesúza'ne':

—To ben' ziyo'e nez daa ziza' Jerusalénna' daa ziyaj Jericólə, na' bchej wbanka' tneza' wlangake' yog'te diika' zino'e axt len xe'na' daa nakwe' goljgake', na' bet wdingake'ne', sto chdoaze' bengake', na' bixonjgake'. ³¹Na' shintk gok ka' ka wde to bəoz lo neza'. Na' ka ble'ile' beena' de na', to wdeze' ka'lə. ³²Na' lekzka' wde to ben' nake' xiin dia che dii Levína'. Na' ka ble'ile' chtoł beena' na', lekzka' to wdeze' ka'lə. ³³Na' sto ben' Samaria lekzka' zeje' tneza' ka ble'ile' beena' chtoł na', na' biyeshile'ne'. ³⁴Na' jabigee kwite'na', na'ch bllie' lo we'na' set na'ch vino, na' bcheje'n. Na' bilepe'ne' koll' bayix' che'na', biçhi'ene' to yoo gana' wdape'ne'. ³⁵Na' betiyo, ka ba zoa yiza' ben' Samáriana', wleje' chop mech plat'e, na' bi'en xan yoona'

é 10:35 *Mech plat*: dill' griegona' nan *denario*, na' nakan to mech dii zak' che shlla llin.

kwenche gap wwie'ne' zan lla, na' chi'ene': "Wdap bwiagach beeni, na' shi bi gaki mechi chkwaan', na' yiyixja'n kat' zizaa dii yoblə." 36Na' ¿nora ben'ki shon chakilo' beni bish' ljuwell beena' wlan ben' wbanka'?

37Na' beena' chli' chsedi leya' chi'ene':

—Beena' biyeshile'ne'.

Na' che' Jesúza'ne':

—Lekzka' li', kan' chiyal' gono'.

Jesúza' jawie' Mártana' na' Maríana'

38Na' shlak ngoo Jesúza' nez, blline' to yelldo' na' to noolə le Marta blebe'ne' lille'na'. 39Na' zoa to ben' bil Mártana' lie' María, na' Maríana' wchi'e lao Jesúza' chzenague' dillaa cho'e. 40Na' Mártana', dechga daa gone' na' wzeche' wneyi cheyin, na'ch wyaje' kwit Jesúza', chi'ene':

—Xan', goll-lat' ben' bila'ni gaklene' nad'. Toz' ndakw' yog' mandadka'.

41Na' che' Jesúza'ne':

—Marta, Marta, chi'chga yichjo' na' zechgo' wneyi cheyi diika' gono'. 42Per toz daa de nakan dii llialloch na' Maríani ba wleje'n, na' kono gak yikaan lawe'na'.

Bli' Jesúza' nak we'lwillgake' Chioza'

(Mt. 6:9-15; 7:7-11)

11 1Shlin choe'lwill Jesúza' Chioza' to latj, na' ka biyoll be'lwille'ne', to beena' nake'ne' txen golle'ne':

—Xan', bli'yi neto' nakan chiyal' we'lwillnto' Chioza', ka ben Juanna' bli' bsdile' ben'ka' bengake'ne' txen.

2Na'ch che' Jesúza' legake':

—Kat' we'lwill-le Chioza' kin inale:

Xanto' Chios, ben' zoa yaba,

we'la'oshga yog'lo' ben' li'.

Na' inabia'gacho' loo yichjlall'do' yog'lo' ben'

kwenche gak lo yell-lioni ka chazlaloo, kon ka chak yabana'.

3Ka nak daa chono' cheej chaonto' yog' lla, bengachan naanlla.

4Wxi'xen chento', ka chon neto' chzi'xennto' bittezə dii choni ben' neto'.

Bi we'gacho' latj ibixnto' gonnto' daa bi nak wen, san bislagach neto' lo ni'a na' dii mala'.

5Na'ch che' Jesúza' legake':

—Inatezcho shi zoa to ben' nllaguile na' do chel shajle lille'na' na' ye'lene': “Ben' bish'dawaa, ben' shloll nad' shon yetxtil, 6la' ba bla' lilla'na' to ben' nllaguid', zee zit', na' bikzə bi de cha' wshabidee.” 7Na'ch beena' yoo loolə lii inatie' le': “Bi gonzilo' nad' zed, ba nsejl' lillii na' ba delen' bi' cha'ki. Aga wak chas' gon' daa chyalljilo'.” 8Na' nia' le', la'kzi nllagteile'ne', bi chase' wi'ene' daa chnabile'ne'. San shi seyide' inabe'n, chen ki cheenile' chase' wi'e yog' daa chyalljile. 9Daan nia' le': Li inabi Chioza' bin cheenile na' gone'n. Li yiyiljan na' willelkzilen. Li wtankw lee puerta', na' wsaljke'n. 10La' beena' chnabile' to bi chnabile' ben', cho'ene'n; na' beena' chiyilje' bi chiyilje', chillelkzile'n; na' beena' chtankwe' to lee puert, na' chsajkzgabe'n.

11'Ka chak chele le' nakle ben' chisgol chischoo bi'do', ka inabi xiinlena' le' yetxtila', aga we'leb' to yaj. Wa shi inabib' le' to bel' gaob', aga we'leb' to bel' znia. 12Wa shi inabib' le' to llit gaob', aga we'leb' to bexjoni'. 13Le' naktele ben' mal, chak we'le xiinleka' daa nak dii wen. ¡Na' Xacho Chioza' zoa yabana' nakteche' ben' wench! Na' wi'e Espíritu Santo che'na' soe' loo yichjlall'do' yog' ben' inabe'ne'.

Nagake' Jesúza' chibeje' dii xiw'ka' kon yel' wak che Bezlona'
(Mt. 12:22-30; Mr. 3:19-27)

14Jesúza' chibeje' to dii xiw' yoo to ben' bi chak inie', na' ka bichejan na'ch gok binie'. Na' ben'ka' lle' na', bibangakile' daa bene'. 15Na' bale' che'gake':

—Kon yel' wak che Bezlona', daa chnabia' dii xiw'kan', chibeji beeni dii xiw'ka'.

16Na' zi bale' wnabgakile'ne' gone' to yel' wak dii ile'gakile' kwenche wli'n shi Chioza'kzan bseleene'. 17Na' ba nezli Jesúza' daa chza'lall'gake', na'ch chi'e legake':

—Shi ben'ka' lle' to yell gaggake' choplə na' til-len ljwellgake', na' kwiayi' yella', shi naa. Na' lekzka' shi ben'ka' lle' toz yoo til-len ljwellgake', aga ssha soagake' toz. ¹⁸Na' ka'kzə Satanáza' na' dii xiw'ka' yoo lo na'yin, shi gaggakan choplə na' kwiayi' ye! wñabia' cheyinna'. Nia' le' ka' daa nale ye! wak che Bezlonan^f chibejid' dii xiw'ka' yoo ben'. ¹⁹Shi chibej' dii xiwaa yoo ben' kon ye! wak che Bezlona',^g ¿sheralə ben'ka' nakle txen? ¿Alezkka' lennan' chibejlengake' dii xiwaa yoo ben'? Daa bi nakan ka', chli'n nakllejilen. ²⁰Na' daa chibej' dii xiwaa yoo ben' kon ye! wak che Chioza', lennan' chli'n ba bla' ye! wñabia' che Chioza' ladjeni.

²¹'Kat' to ben' wal nape' dii gonile' zña na' chape' lille'na', aga no gak lljtoyo dii de che'. ²²Per shi illin sto ben' walch til-lene'ne', na' gone'ne' gan, na'ch yigoyoe' yog' daa none' lez wñaiaile', na' kwantie' yog' daa yoo loo lille'na' na' wi'e lat' wej che ben'ka' naggake'ne' txen.

²³'Beena' bi nake' nad' txen, chakzbanile' nad'. Na' beena' bi chaklen kwenche wzenag ben' cho'a xtill' Chioza', len' chsej chillone' wzenaggake'n.

Chillin dii xiwaa sto shii gana' bichejan

(Mt. 12:43-45)

²⁴'Kat' chichej to dii xiw' dii yoo ben', na' chjadan ga bibi dekhə na' chyiljan gana' yizi'lalliin. Na' shi bi chllelin gana' yizi'lalliin na'ch chakin: “Yiyaachkz' dii yoblə gana' bichejkz'.” ²⁵Na' ka chillinan gana' bichejan, nakan ka to loo yoo dii nxi nloa na' nakan xochi. ²⁶Na'ch chza'n chjxi'n zi gall dii xiw'ka' daa nakch dii malch aga ka len, na' yogaan choogakan beena'. Na' chaktechlə mal che beena' aga ka gok che' dii nech.

Chakomba beena' chzenag cho'a xtill' Chioza'

²⁷Na' shlak che' Jesúsza' ka', to noolə zie' ladj ben'ka' lle' na' wñie' zilljə, chi'e:

—¡Chakomba noola' wxane' li' na' bwall bxope' li'!

²⁸Na' che' Jesúsza'ne':

—¡Mbalazch ben'ka' chzenaggake' cho'a xtill' Chioza' na' chongake' ka nan!

Ben'ka' bi chajle' che Jesúza' wñabgake' wli'e to yel' wak

(Mt. 12:38-42; Mr. 8:12)

29Na' bdi'a bllagch ben'ka' kwit Jesúza' na' golle' legake':

—Le' zoale ñaa, nxinj yichjlall'do'leka'. Chñable wliid' le' to yel' wak, na' aga wliid' le' daa cheenile. Lete ile'ile to dii nak ka yel' waka' daa ben Chioza' che dii Jonáza'. 30Daa gok che Jonáza' bli'n yel' wak che Chioza' lao ben' Níniveka'. Kakzə nad', Ben' Bsel' Chioza' Yell-lioni, wli'a yel' wak che Chioza' laolena', le' zoale ñaa. 31Na' llana' wchoglo Chioza' che ben', na' yiban noola' wñabia' do lli'lə, na' gawe' xya chele lao Chioza', le' zoale ñaa, ine' chiya' sak'zi'le. La' noola', zit' wal wzee bidzenague' dill' sin'na' daa be' dii Salomónna', na' nad' zoa' ni, nak' ben' zak'chi ka dii Salomónna', na' bi chzenagle cha'. 32Na' lekzka' llana' wchoglo Chioza' che ben', na' yiban ben' Níniveka' na' gaogake' xya chele lao Chioza', le' zoale ñaa, inagake' chiya' sak'zi'le. La' legake' biyaj bileni saaxya che'ka' ka be'len Jonáza' legake' cho'a xtill' Chioza', na' nad' zoa' ni, nak' ben' zak'chi ka dii Jonáza', na' bi chzenagle cha'.

Jalaochona' nakan ka to yi' che kwerp chechona'

(Mt. 5:15; 6:22-23)

33Na' lekzka' chi'e legake':

—Biga zoa ben' chxene' to kandil na' chzoe'n to ga ngash' wa wdoseen to dii wkwashaan len, san chzoe'n sibə kwenche ile'i ben'ka' sho' loo yooná'. 34Jalawo'ka' nakan ka to yi' che kwerp cho'na'. Shi jalawo'na' nakan wen, doxen kwerp cho'na' zoan lo beeni'na'. San shi bi chle'i jalawo'na', kwerp cho'na' zoan lo yel chola'. 35Na' bsak' wze wñeyi kwenche ki lwaa to' lo beeni'na', tazo' lo yel cho'la'lə. 36Shi doxen kwerp cho'na' yoon beeni', na' ni to dii shgasj shchol bi yoon, na' ile'ilo' kwasloj ka chle'ilo' kat' ze to yi' chzeeni'n doxen.

Jesúza' chsheshlene' fariseoka' na' beṅ'ka' chli' chsedi leya'

(Mt. 23:1-36; Mr. 12:38-40; Lc. 20:45-47)

37 Na' ka biyoll be' Jesúza' dillaa, na' bche' to fariseo le' lltawe' lille'na'. Na' wyoo Jesúza' lille'na' na' wchi'e cho'a mesa'. 38 Na' farisewa' bibanile' ka ble'ile' bi bina' Jesúza' ka yoologake' chongake' ka zi' gaogake'. 39 Na'ch che' Xancho Jesúza'ne':

—Le' fariseo nakle ka xig' yeen dii nyib xise' tcho'a tlawin na' lo'inna' besjan. Chaki beṅ' le beṅ' wen nakle, len le' chibaile chkaale bi de che beṅ' na' chibaile chonle bichlā dii mal. 40 Le' beṅ' bi nteyi! ¿Abi chakbe'ile Chioza', beena' ben kwerp chechoni, lekze'n bene' yichjlall'do'choni? 41 Li izani bi de chele, li we'n beṅ' bibi de che', na'ch yixi' yiyech yichjlall'do'lena'.

42 Nyesh'laz gak chele, le' fariseo! Choe'le Chioza' lat' wej^h no yixwej, no kwanirod na' bichlā yix' kwan dii mbekle. Na' bi chonle daa nak shlichā na' bi chakteile' Chioza'. La' daayen'an llialloch gonle per lekzka' bi wsanle kwejle daa chṅab Chioza'.

43 Nyesh'laz gak chele, le' fariseo! Le chibaile kwe'le gana' chbe' beṅ'ka' zakii gana' chdop chllagcho choe'lwillcho Chioza', na' cheenile yog' beṅ' kwee le' balaan ga lle' lla' beṅ'.

44 Nyesh'laz gak chele, daa nakle beṅ' wxiye'! Nakle ka to ba che beṅ' wet dii bi nla' lawinna' dii bi chle'i beṅ' na' chaj chdegake' lawinna', ni bi chakbe'gakile' bin naki loolā.

45 Na'ch to beena' chli' chsedi leya' golle' Jesúza':

—Maestro, daa no' ka' len neto' chzoazi'yoo.

46 Na' goll Jesúza':

—Le' Lekzka' nyesh'laz gak chele, le' chli' chsedile leya'! Dii zan dii che'le beṅ' chiyal' gongake', na' nakan ka to yoa' xen dii chwa'le legake' dii kono soyi, na' le' bikz bi chda na'le kwenche gakenle legake'.

47 Nyesh'laz gak chele! Le' chonshao'zle cho'a ba che dii beṅ'ka' wdixjee daa goll Chioza' legake', beṅ'ka' bet dii xoxzto'leka'. 48 Na' daa chonle ka' zevin chonle txen dii xoxzto'leka' ka nak daa bengake'. La' legaken' betgake' beṅ'ka', na' le' chonshao'le cho'a ba che'ka'.

h 11:42 Lat' wej: literalmente la décima parte.

49'Na' daan, lo ye| sin' che Chioza' wne': "Wselaa ben' chixjee daa yepee na' len ben' wi'e cho'a xtilaana', na' bale' witgake' na' zi bale' biya dii gongakile'ne'." 50Na' le' zoale naa, lenle ile'ile ka ye| zi'na' ile'i ben'ka' blalj xchen dii ben'ka' wdixjee daa goll Chioza' legake', wzolozan ka wxw wzil yell-lioni. 51Le' zoale naa, lenle chido|le sak'zi'le ni che ye| wit che dii Abela' axt dii Zacaríaza', beena' betgake' cho'a yoodo'na' kwit gana' chzeygake' bayix'ka'.

52'Nyesh'laz gak chele, le' chli' chsedile leya'! La' nazle chsedile ben' che Chioza', per ni le' bi cheenile wzenagle daa nan, na' chllontele shajni ben'ka' chzenagan.

53Na' ka goll Jesúza' ka', ben'ka' chli' chsedi leya' na' fariseoka' zizikli bllaagake' na' wzologake' chongakile'ne' zed wal wñabgakile'ne' chiya dii nak lalj, 54goklall'gake' we' Jesúza' dill' dii wchixa'n le'.

Dill' wxiye' che fariseoka' zaklebin levadúrana'

12 1Na'ch bdop bllag ben' zan inleeb gana' zoa Jesúza' axt chdakw ljwellgake', na' wzoloe' zigaate be'lene' ben'ka' nakgake'ne' txen dill', chi'e:

—Wsak'gale bi shajle'le dill' wxiye' che fariseoka' daa zaklebi levadúrana'. 2La' daa kono nezi naa, wllin lla inezi beñaan, na' yog'lol' daa ngash' naa, wllin lla ila' lawin. 3Na' yog' daa chakile kono beni daa wnale, wllin lla inezgakile'n. Na' daa wnale ka yoole loolə nsejshoshle yooná, axt gosya'i ben' wzie'n dill'.

Beena' chiya| illebecho

(Mt. 10:26-31)

4'Le' nllaguid', nia' le' bi illeble ben'ka' witgake' le', la' kachokzan zeelo gak gongakile' le'. 5Per ni inia' le' non chiya| illeble: li illebe Chioza', la' ka yiyoll yikee ye| mban chelena' lekzka' nape' ye| wñabia' wzalee le' lo yi' gabi|a'. Len', li illebe.

6'Nezicho wak si'cho gay' byindo' kon chop sintabdo'. La'kzi aga bitek zak'gakb, ni tob bi mbej yichj Chioza'. 7Na' ka'kzə le', axt to to yish' yichjlana' mbab. Na' bi illeble, la' zak'chle aga ka zan byindo'ka'.

Ben'ka' ch̄chēbgake' nakgake' Crístona' txen

(Mt. 10:32-33; 12:32; 10:19-20)

8'Na' nia' le', beena' w̄chēb lao ben' nake' nad' txen, lēkzka' nad', Ben' Bsel' Chioza' Yell-lioni, wi'a dill' lao yog'lōl̄ anj̄l̄ chē Chioza', yēpgakee beeni nake' nad' txen. 9San beena' bi w̄chēb nake' nad' txen, lēkzka' nad', wi'a dill' lao yog'lōl̄ anj̄l̄ chē Chioza', yēpgakee beeni bi nake' nad' txen.

10'Na' beena' biz gon in̄a ch̄a', nad', Ben' Bsel' Chioza' Yell-lioni, wizi'xen Chioza' chē', san beena' in̄e zban chē Espírítu Sántona', aga wizi'xen Chioza' chē'.

11'Kat' l̄ljwa'gake' le' lao ben'ka' ch̄n̄abia' gana' ch̄dop chllagcho choe'l̄will-cho Chioza', wa lao ben' ch̄chogbia' chē ben' wa lao joschis, bi sele w̄neyi nakl̄a yilliile cho'a xtill' ben'ka' wa bin in̄ale. 12La' kat' in̄ele, Espírítu Sántona'kzan wzajniile' le' daa chiya'l̄ in̄ale.

Dii nxolla' nsa' yel' wni'ana'

13Na' ladj ben'ka' ndop nllag w̄ne to ben', golle' Jesúsza':

—Maestro, gollgach ben' bishaana' gone' daa chidol' ikaa chē dii xantona'.

14Na' che' Jesúsza'ne':

—¿Nora bzoa nad' ladjleni ka to ben' chon yel' joschis chē ben' wa ben' chl̄aa bi dii de chē ben'?

15Na' lēkzka' chi'e:

—Li wsak' kwenchē bi selall'le gat'ch bi gat' chēle, la' aga dii kan' llialo lo yel' mban chelena'.

16Na'ch bzoe' to jempl, chi'e legake':

—Wzoa to ben' wni'a na' dii zan bizi' bilape' lo yell-lío chē'na'.

17Na'ch chakile': “¿Nakra ka gona'n n̄aa? Biga de kooshawaa dga bizi' bilap'.” 18Na'ch wne': “Ba n̄ezid' bi gon!. Yichin̄j' yoonaa gana' chgooshawaa daa chizi' chilap' na' yiyona'n dii xench, na' kooshawaa daa bizi' bilap' na' bichl̄a dii de ch̄a'.” 19Na'ch zan yiz yizia' banez chē daa ngooshawaa, na' yizi'lallaa na' yeej gaw', na' soa' mbalaz.” 20Na' goll Chioza'ne': “Li, ben' bi nteyi, naanlle' gueto' na' daa ngooshawoo, nola chēyi gakan.” 21Kan' gak chē beena' chtop chshag yel' wni'ana', na' bibi zakee lao Chioza'.

Chioza' chap chwie' ben'ka' nak xiine'

(Mt. 6:25-34)

22Ka wde dga, Jesúza' golle' ben'ka' nakgake'ne' txen:

—Naa nia' le': Bi sele wneyi che daa yeej gaole, ni bi sele wneyi che xalaanlena'. 23La' zak'techlə yel' mban chelena' aga ka daa yeej gaole, na' zak'tech xkwerplena' aga ka xalaanlena'. 24Li wwiakachi bechjka', la'kzi bi chaz chaangakb na' bibi chizi' chilapgakb, ni bi zoa ga chgooshao'gakb dii gaogakb, len chweej chwaokz Chioza' legakb. Na' le', naa, zak'techle aga ka bado'ka' ze lo llazə. 25Ni tole bi gak yischoochle yel' mban chelena' ni zi tgor la'kzi nall inleeb selen wneyi. 26Shi dga nak diido'zə bi chak gonlen, ¿berache zezle wneyi che bichlə dii yoblə?

27Li wwiakachi ka chgol yejdo'ka', len aga bi llin chongakan ni bi cholgakan do. Na' nia' le', ni Salomónna', beena' wdapchga yel' shao'ka', bi bllin gak xe'na' xochi ka yejdo'ka'. 28Shi Chioza' none' xochi yejdo'ka' ze lyixaa, la'kzi xtitchgan mbanan na'ch wtop ben' len wlli'en lo yi'na', ¿alechlin ki gone' chele, la'kzi bitek chajle'le gaklene' le'? 29Na' daan bi setekle wneyi ga sa' daa yeej gaole. 30La' ben'ka' bi nonlilall'gake' Chioza' to daazə chinogake'. Per le', Chioza' nake' Xale, na' nezile' chyalljilen. 31Li se wneyi wzenagle che Chioza' kwenche inabi'e le', na' gonkze' yog' daa chyalljile.

Yel' shao' daa de yabana'

(Mt. 6:19-21)

32Bi illeble. La'kzi bi nyanle, Xacho Chioza', yel' ben' wen che'na', chaklallee yillinle inabia'lenlene' gana' chnabi'e. 33Li wit' wde bi de chele, na' li gaklen ben' bibi de cheyin. Shi ka' gonle, na' gat' yel' shao' chele dii bi te cheyin yabana' gana' bi gak kwan wbanna'n, ni bi iteban. 34Na' gana' de yel' shao' chelena', na'kzan se yichjlall'do'lena' wneyi.

Chiyal' se kwascho ka yiyed Jesúza'

35-36Na' lekzka' chi'e legake':

—Li gaktó ka wen llinka', ben'ka' chbezgake' xane'ka' yilline' daa zeje' to ga chak wishagna'. Na' toshiizi chi'gake' chbezgake'ne'

na' nox'tegake' yi' che'ka' kwenche kate wtankwe' lee puerta' lii wsaljtegake'n. ³⁷Chakomba wen llinka' chbezgake' kat' yillin xane'ka', la' dii li nia' le', kwine' kweke' legake' cho'a mesa' na' wi'e dii gaogake'. ³⁸Chakomba ben'ka' chbezgake' yillin xane'ka' la'kzi yilline! do chel wa do zbalzə. ³⁹Na' chiya! shajniile dga, shel'ka' to xan yoo inezile' bi gor illin wbanna' lille'na', wbe'noe'ne' na' bi wi'e latj sho'e lille'na' kwane'. ⁴⁰Ka'kzan le' chiya! sele wneyi toshiizi kwezle nad', Ben' Bsel' Chioza' Yell-lioni, la' tokonganə yiyed'.

Wen llinna' chon wen na' beena' bi chon wen

(Mt. 24:45-51)

⁴¹Na'ch wnabi Pédrona' Jesúza', chi'ene':

—Xan!, ¿ato neto'zan no' ka', anti che yog' benaan no' ka'?

⁴²Na'ch goll Xancho Jesúza':

—¿Nakra chakile chon to wen llin wen, ben' nezi nak gone' llinna', shi xane'na' gone' lall' nee yog'te ben'ka' zoa loo yoo lille'na' kwenche wweej wwawe' legake' gor cheyin? ⁴³Chakomba wen llinna' chilalile' chone' daa nak lall' nee ka yillin xane'na'. ⁴⁴Dii li nia' le', xane'na' gone' lall' nee yog'lol dii de che'. ⁴⁵Na' shi wen llinna' gakile: “Akza naa yila' xan'na'”, na'ch soloe' gonile' zban wen llinka' sto, ka nool ka ben' byo, na' soloe' yeej gawe' na' sollile'. ⁴⁶Na' tokonganzi yillin xane'na' llana' bi none' lez, na' wdie'ne' to yel' zi' wal kon ka ba nchogloe' gak che ben'ka' bi chongake' daa chiya! gongake'.

⁴⁷Ben' wen llinna' nezi bin cheeni xane'na' gone', na' bi chone'n ni bi zie'n wneyi, na' wit chinchga xane'na' le'. ⁴⁸Per beena' bi nezi bin cheeni xane'na' gone', na' chone' dii chonan ka wsak'zi' xane'na'ne', agalə wsak'zi'teke'ne'. La' beena' be'lenyenee dill' nakan gone', chonan byen gonyenee ka bzajniile'ne'. Na' beena' ba bene' lall' nee gone' dii zan dii cheenile' gone', chonan byen gone' yog'lolte diika' bene' lall' nee.

Gak ben' choplə ni che Jesúza'

(Mt. 10:34-36)

⁴⁹Daa bid' yell-lioni nakan ka inacho yin' bidxen'. Na' cheenchgaid' shel' naate ba chal'ninan. ⁵⁰Biya dii yen ile'id',

na' le ba chakyeshid' axt ni illini llana'. ⁵¹ ¿Achakile bid' yell-lioni kwenche gon' ka soalen ljwell ben' mbalaz? Aga kan', san daa bid' illaa ljwellgake' na' gaggake' choplə. ⁵² La' naa, shi to yoo lle' gayee, na' gaggake' choplə, shone' til-lengake' ben'ka' chop, na' ben'ka' zi chop til-lengake' ben'ka' zi shonə. ⁵³ Xa bi' byona' til-lene'b', na' leb' til-lem' xabaa. Na' xna' bi' noola' til-lene'b', na' leb' til-lem' xna'baa. Na' noola' til-lene' xoolille'na', na' xoolille'na' til-lene' le'.

Bi chajni'gakile' bi zejin daa chon Jesúza'

(Mt. 16:1-4; Mr. 8:11-13)

⁵⁴ Na' lekzka' che' Jesúza' ben'ka' lle' na':

—Kat' chle'ile ziza' beja' gana' chxoalə wbillə, lii natele: “Wakə yeja’”, na' kayen' chak. ⁵⁵ Na' kat' chde be'na' daa za' lli'lə, na' nale: “Le zey'chga yizak”, na' kayen' chak. ⁵⁶ ¿Le' ben' wxiye! Kat' chle'ile bin chak xan yabana' na' lo yell-lioni nezile beran gak. ¿Bi'che bi chakbe'ile bin zeji daa chon Chioza' llaki zoacho naa?

Chiyal' yiyoe'xencho ben'ka' chao xya checho

(Mt. 5:25-26)

⁵⁷ ¿Bi'che ki chiyilje to kwizle daa nak dii li dii shao'? ⁵⁸ Shi no chao xya chele na' wchi'e le' lao joschiska', li gon byen yiyoe'xenlene' tneza'. La' shi lljwee le' lao beena' chchogbia' che ben', na' le' gone' le' lo na' beena' wseje' le' lillyana'. ⁵⁹ Na' nia' le', aga wichejle lillyana' axt ki chixjle doxen daa chiyal' chixjle.

Chiyal' yiyaj yilenicho dii malka' choncho

13 ¹ Na' lo llana'tezə bllin bal' ben' lao Jesúza' gollgake'ne' ka ben Pilátona' bene' mandad betgake' bal' ben' Galiléaka' ka chitgake' bayix'ka' choe'la'ogake' Chioza'. Na' xchene'ka' biyakan toz kon xchen bayix'ka' betgake'. ² Na' che' Jesúza' legake':

—¿Achakile ben' Galiléaka' betgake' nakchgake' ben' malch aga ka nochlə ben' wlall che'ka'? ³ Nia' le' bi nakan ka'. Shi le' bi yiyaj yilenile dii malka' chonle, lekzka' yog'le kwiayi'. ⁴ Shera

ben' Jerusalénka' shin'shonə, ben'ka' wit daa bdakwgake' yoo siba' daa zoa Siloéna', ¿achakile' napchgake' dol' aga ka ben' wllal che'ka'? ⁵Nia' le' bi nakan ka'. Na' shi le' bi yiyaj yilenile dii malka' chonle, lekzka' yog'le kwiayi'.

Jempl che yag yixwewa' daa bi wllia

⁶Na'ch bzoa Jesúza' to jempl, chi'e ben'ka':

—To ben' zoa to yag yixwew lo yell-lío che'na' gana' naze' yag uvaka', na' wyaje' jawie' shi llian yixwewa', na' ka blline' ni tlish' bi llian. ⁷Na'ch chi'e beena' chap yell-lío che'na': “Ba gok shon yiz chidwia' shi llian yixwewa', na' ni to bibi chbian. Bchogchoklan, la' nlanchozkan yell-lioni.” ⁸Na' beena' chape' yell-lío che'na' chi'e: “Xan', zi' zoashkin zi' twiz na' wcheen' xaninna' na' wllan ben'na'. ⁹Shera shicholə wbian. Na' shi bi wlliakzan, na' wchogo'n.”

Biyon Jesúza' to noolə llana' chombaan ben' Israelka'

¹⁰Na' to lla sabd, llana' chombaan ben' Israelka', chli' chsedi Jesúza' ben'ka' chdop chllag gana' choe'llwillgake' Chioza'. ¹¹Na' len to noolə ba gok shin'shon yiz nlew dii xiwaa le', na' bichkzə gok yizie' shli. ¹²Na' ka ble'i Jesúza'ne' wnie'ne' na' golle'ne':

—Noolə, ba bikwas yillwe' cho'na'.

¹³Na'ch bxoə neena' koll' noola' na' katena' lii bizetie' shlichə, na' wzoloe' choe'lawee Chioza'. ¹⁴Na' beena' chgoo xnezi cheyi diika' chongake' gana' chdop chllaggake' blee daa biyon Jesúza' noola' llana' chombaangake', na'ch chi'e ben'ka' lle' na':

—De xop lla goncho llinna', na' bittezə llaka' yidle kwenche yiyakile, na' bi gonle lez yiyakile' llani chombaanchə.

¹⁵Na'ch che' Xancho Jesúza' legake':

—Le' ben' wxiye', ¿abi wsell-le goon cheleka' wa burr cheleka' lljaweejlegakb nisa' llani chombaanchə? ¹⁶Nooli nake' xiin dia che dii Abrahama', na' ba gok shin'shon yiz Satanáza' daa chnabia' dii xiw'ka' nonan le' ka ben' ncheje'. ¿Ana' chakile bi nakan wen biyonee llani chombaanchə?

¹⁷Na' ka goll Jesúza' ka', yog' ben'ka' chakzbangakile'ne' biyii bido'gakile', na' yog' ben'ka' sto bibagakile' daa ble'gakile' ye'l wakka' chone'.

Jempl che sa mostásana'*(Mt. 13:31-32; Mr. 4:30-32)*

18 Na'ch wna Jesúza':

—¿Nakra ka nak yel' wñabia' che Chioza', Ila? Na' ¿bera ka wsaklebida'n? 19 Zaklebin sa mostásana' daa goz to beñ' lo yell-lío che'na', na' ka bla'n na' bgolan gokan to yag xen na' axt byiñdo'ka' ben lillbka' lo xozinna'.

Jempl che levadúrana'*(Mt. 13:33)*

20 Na' lekzka' chize' Jesúza':

—Dga sto wsaklebida'n yel' wñabia' che Chioza'. 21 Zaklebin levadúrana' daa chchix to noolə shona rob yezj kwenche yisgolan kwa che yetxtila'.

Chiyal' sho'cho puertdo'naz*(Mt. 7:13-14, 21-23)*

22 Shlak ziyaj Jesúza' Jerusalénna', bidie' yell yelka' na' yelldo'ka' na' bli' bsedile' beñ'. 23 Na' bchej to beñ' wñabile'ne', chi'ene':

—Maestro, ¿ato chopchga beñ' yila bi kwiayi'gake'?

Na'ch che' Jesúza'ne':

24—Li gon byen sho'le cho'a puert daa nak diido'zə kwenche soalenle Chioza'. La' beñ' zan gaklall'gake' sho'gake'n, na' bi gak sho'gake'. 25 Na' ka solla' xan yooná' wseje' puertá', na' le', igaanle cho'a puertá' wtankwle le'inna' na' ye'lene': "Beñ'do', bsaljgach kwenche sho'nto'." Na' xan yooná' ine' le': "Bi nombi'a le' ni bi nezid' ga beñ' le'." 26 Na'ch ye'lene': "Weej wdaolennto' li' txen, na' bli' bsedilo' neto' yell chento'na'." 27 Na'ch ine' le': "Bi nombi'a le', ni bi nezid' ga beñ' le'. Li ljayaak do na'lə yog'lol-le le' beñ' wen dii mal." 28 Na' kwelchgale axt gaoxaxj leylena' daa le gakshejlall'le ka ile'ile dii Abrahama', dii Isaaca', dii Jacoba' na' yog' dii beñ'ka' wdixjee daa goll Chioza' legake' lle'gake' yabana' gana' chñabia' Chioza', na' le', bi gok yiyoole. 29 Na' wde wdeli beñ' lle' zbii zkaan yell-lioni yillingake' yabana' gana' chñabia' Chioza' na' kwe'gake' gaogake'. 30 Na' bal beñ'

bi nak ben' zakii naa gakgake' ben' zakii, na' ben'ka' nak ben' zakii naa bich gakgake' ben' zakii.

Wchell Jesúza' ni che ben' Jerusalénka'

(Mt. 23:37-39)

31 Na' lo llana'tezə bllin bał fariseoka' kwit Jesúza' na' che'gake'ne':

—Biyaj gan yoblə. Cheeni Heródeza' wite' li'.

32 Na' che' Jesúza' legake':

—Li yiyaj na' li lljayell ben' wxiye'na': “Nin soa' to chop shon lla kwenche yibej' dii xiw'ka' yoo ben' na' yiyon' ben' bi shao', na' sheelo diika' chon'.” **33** Chonan byen kooch' nez naa, wxə len willj kwenche yiyaa Jerusalénna' gana' chitgake' ben'ka' chyixjee daa che' Chioza', la' agagan' witgake' legake' gan yoblə.

34 Le' ben' Jerusalén, chitle ben'ka' chidtxjee daa che' Chioza' legake', na' yaja' chitile ben'ka' chselee choe'gake' cho'a xtilleena'! Dii zan shii goklallaa yitop' le' ka chon jeda' chiyellb xiindobka' xan xilba', na' le' bi goonile'. **35** Li koo yichjle dga inia' le', Chioza' kwej yichje' gani zoale. Na' nia' le', aga wle'chile nad' ax̄t kat'ch illin lla inale: “jGaklenshga Xancho Chioza' beeni ba bselee!”

Jesúza' biyone' to ben' yo'e yi

14 ¹To lla sabd, llana' chombaan ben' Israelka', wyaj Jesúza' jtawe' lill to fariseo, ben' chnabia', na' fariseoka' sto chinał' chinogake'ne'. ²Na' lawe'na' ze to ben' yo'e yi. ³Na'ch Jesúza' wnable' fariseoka' na' ben'ka' chli' chsedi leya', chi'e legake':

—¿Ade lsens yiyoncho to ben' bi shao' llani chombaancho, anti bi den?

⁴Na' legake' bikzə bi gollgake'ne'. Na'ch Jesúza' bexee beena' yoo yina' na' biyone'ne', na' golle'ne':

—Wak yiyajo'.

⁵Na'ch chi'e fariseoka':

—Shi to burr chele wa to goon chele ixopb to loo yech to lla chombaancho, ¿abi yibejleb katena' la'kzi nakan llana' chombaancho?

⁶Na' bikz bi billet-lall'gake' ye'gake'ne'.

Ben'ka' chaxgake' to ga chak wishagna'

7Na' ble'i Jesúza' ka chon ben'ka' wdaolene' lill farisewa', wche'gake' gana' chbe' ben'ka' zakii. Na'ch bseese to jempl, chi'e legake':

8—Kat' no gax le' to ga chak wishagna', bi kwe'le gana' chbe' ben'ka' zakii. La' shera shi ila' ben' zak'chi ka le', 9na' beena' goxe' le' ine': “Wzolla' kwenche kwe' beeni gani chi'o.” Na'ch do chido'zile yizolla'le na' lljache'le xanteyin. 10Na' bi gonle ka'. San kat' no gax le', chiyal' lljche'le xanteyin kwenche kat' ila' beena' goxe' le' na' ine': “Bish'dawaa, nilə wda kwi'o gani zak'chi.” Na' ka' sho'le balaan lao ben'ka' chi'lenle cho'a mesa'. 11La' beena' chon kwine' ben' choo ben' xen, Chioza' gone'ne' ben' bibi zakii; na' beena' chakile' bibi zakee, Chioza' gone'ne' ben' choo ben' xen.

12Na' lekzka' che' Jesúza' beena' goxe'ne' lille'na':

—Kat' cheenilo' wwawo' ben', bi gaxo' ben' zoalenzo' wen, no ben' bishoo, no ben' dialla cho', ni no ben' wlill cho', ben' nake' ben' wni'a, la' legake' lekzka' wak yigoogake' wzonna' yiwaogake' li' ka beno' chegake'. 13Aga kan' gono', san byi ben' yesh', ben' net ni'a nee, ben' bi chak sa' wen na' ben' lchol. Ben'kan' chiyal' gaxo', 14na'ch so' mbalaz. La' ben'kan' aga wak yigoogake' wzon cho', san Chiozan' yigwee wzon cho'na' llana' kat' yisbane' ben' wenka' ladj ben' wetka'.

Jempl che to ben' ben to lni xen

15Na' to beena' chi'lene' Jesúza' cho'a mesa', ka benile' wne' ka', na' chi'ene':

—¡Chakomba ben'ka' lljadaogake' gana' chnabia' Chioza'!

16Na'ch che' Jesúza'ne':

—Wzoa to ben' bene' to lni xen, na' goxe' ben' zan kwenche shajgake' lille'na' lljtaogake'. 17Na' ka go! gaogake', bselee to wen llin che'na' jelle' ben'ka' ba bye': “Li dagach, la' ba gok daa gaocho.” 18Na' yog' ben'ka' janie' wzologake' chche'gake' dill'. Toe' golle'ne': “Zi' bizi'a lat' yell-lio na' chonan byen lljawia'n. Ye'gacho'ne' si'xene' bi gak yid'.” 19Na' beena' sto chi'ene': “Zi' bizi'a gay' kwe' goon na' chonan byen wwia' shi

wak gaangakb. Ye'gacho'ne' si'xene' bi gak yid'." 20Na' beena' sto chi'ene': "Zi' bshagna', na' bi gak yid'." 21Na'ch biza' wen llinna' jayelle' xane'na' yog' daa goll be'ka' le'. Na'ch blaa xane'na' na' chi'e wen llin che'na': "Lobe' jta lyell na' bche' kon no be' yillago', no be' yesh', no be' net ni'a nee, no be' lchol, na' no be' bi chak sa' wen." 22Na' ka jasane' be'ka' jatope', na'ch chi'e xane'na': "Xan', ba ben' ka wno', na' ni dech latj sho' be'." 23Na'ch che' xane'na': "Wyaj do yawi nezka' na' ben byen yid be'ka' yillago' kwenche yilla' loo lilla'ni. 24Na' nia' le', ka nak be'ka' bya' dii nech, ni toe' bi gaogake' daa ba bsini'a."

Ye' zak'zi'na' yen ile'icho ni che Jesucristona'

25Ben' zan zjanogake' Jesúza', na'ch biyechje' chi'e legake':

26—Shi nole cheeni gake nad' txen, chiya' gachile nad' aga ka xaxna'le, xool-le, xiinle, be' bish'le, be' zanle, na' axt ye' mban chelena'. Shi bi gake' nad', aga wak gake nad' txen. 27Na' lekzka' beena' bi chzanile' ye' mban che'na', gak bitteza dii gak che', kwenche gone' daa chazlallaa, aga wak gake' nad' txen. 28Shi nole cheenile gonle to yoo sib wal, zigaate chiya' wwiale ka'k' gaki na' shi waki xmechlena' sheeloin. 29La' shi ba wlekwle leninna' na' tena' bich bi de wzeeloin, na' yog' be'ka' ile'gakile' bi biyollan wxillgakile' le'. 30Na' inagake': "Kon wdishj beena' len yoon'a' na' bi goki xmeche'na' wzeeloe'n." 31Na' ka'kz to be' wñabia', shi cheenile' til-lene' sto wñabia' yoblə, na' lekzka' chiya' wsakee shi wzo' shi mil be'ka' nape' til-lengake' beena' nap galja mil be'. 32Na' shi gake'ile' bi soi be'ka' nape', na' zi' illinlə be' wñabia'na' sto, wselee to chop be' lljellgake'ne': "Bizə tilcho." 33Na' ka' le', shi bi choonlall'le yog' dii de chele, aga wakə gake nad' txen.

Kat' bich zxi' zedaa

(Mt. 5:13; Mr. 9:50)

34'Zedaa nakan dii wen, na' shi bich zxi'n aga wakch yiyonchon zxi' dii yoblə kwenche wchinchon. 35Ni bi gak wchinchon lwa' ben', san choonchon. Na' le' chenile dga nia', li sen wneyi.

Jempl che xilaa wnit

(Mt. 18:10-14)

15 ¹Yog' ben' wichixjka' na' ben' saaxyaka' jabig'gake' kwit Jesúza' kwenche bzenaggake' dillaa cho'e. ²Na' fariseoka' na' ben'ka' chli' chsedi leya' wzologake' biz chon chnagake' che Jesúza', che'gake':

—Chlebtezə beeni ben' saaxyaka' na' chaolenteze' legake'.

³Na'ch bzoa Jesúza' to jempl, golle' legake':

⁴—Shi tole nable to guioa xil' na' nit tob, na' wkwaanle baka' taplalj twalj lyixaa na' lljadiljle bana' wnit, na' axt kon ka yillelb gonle. ⁵Na' ka yillelb, yibaile yixoaleb yaaxizlena'. ⁶Na' ka yillinle lill-lena' wtope ben'ka' nllaguile na' ben' wllill cheleka', na' ye'le legake': “Li yibaleni nad', la' ba billeg xil' cha'na' bana' wnit.” ⁷Na' nia' le', ka'kzan chibayi Chioza' len anjl che'ka' yabana' kat' to ben' wen dii mal chiyajile' saaxya che'na' aga ka taplalj twalj ben'ka' bi chonan byen yiyajgakile'.

Jempl che mecha' wnit

⁸Wa shi to noolə de shi mech plat che' na' nit ton, na' wxene' yi' che'na' na' wloe' loo lille'na' na' yiyilje'n axt ki yillelile'n. ⁹Na' ka yillelile'n na' wtope' noolka' nllaguile' na' ben' wllill che'ka', na' yee legake': “Li yibaleni nad', la' ba billeg mech cha'na' daa wnit.” ¹⁰Na' nia' le', ka'kzan chibayi Chioza' len anjl che'ka' kat' chiyaj chileni to ben' saaxya.

Jempl che bi'na' benditj xmech xabaa

¹¹Na' lekzka' che' Jesúza' legake':

—To ben' wzoa chop xiine', ¹²na' bi' neshaa gollb' xabaa: “Xa, bla daa de cho' na' ben' nad' daa chiya' ikaa.” Na'ch bla xabaa daa de che' na' bi'en legakb'. ¹³Na' aga wlla, biyit' bide bi' neshaa daa bi'eb', na' mecha' daa bex'b' cheyin wyajlema'n to yell zit' na' jenditjba'n na' jem' kon daa nazan cheb'. ¹⁴Na' ka biyoll benditj xmechbaa wche' to wbin xen yella' gana' chdab', na'ch wzolo chdeb' wbinna'. ¹⁵Na' wyajb' janabb' llinna' gom' lao to ben' yella' gana' chdab', na' beena' bseleeb' lyixaa gana' nlee kushka' kwenche jtapb' legakb'. ¹⁶Na' daa le chdom'

goklall'b' gaob' daa chao kushka', na' ni len bi be'gake'b'. 17Na' gokib': "Ben' zan wen llin che xa'na' lle' na' chichoonzan dii cheej chaogake', na' nad', ba chetid' wbinni. 18Ba ziyaachoklō kwit xa'na' na' yepee: Xadawaa, ba bxinj' blen' lao Chioza' na' lawo'na'. 19Bich chidoḷaa gak' xiino', san beni nad' ka nottezə wen llin cho'ki." 20Na'ch biza'b' ziyajb' lill xabaa.

'Na' zi dii xench yillim' lillbaa ble'i xabaa leb' na' biyesh'lallile'b'. Na'ch zejdoe' jatile'b' na' wdele'b' na' bnope'b'. 21Na'ch che'b' xabaa: "Xadawaa, ba bxinj' blen' lao Chioza' na' lawo'na', bich chidoḷaa gak' xiino'." 22Na' xabaa chi'e wen llin che'ka': "Lobe'zə li lljlej tgot lech' daa liizelozi nakch na' li wwakwba'n, na' lekzka' li wllin to niy xbemaa na' li wllin yel ni'abaa. 23Na' li lljxi' me'do'na' mbejchlawin, li witb kwenche gaochob na' goncho to lni, 24la' xiindawaani gok cheb' ka bi' ba wit, na' naa ba bila'b' mbam'. Gok cheb' ka bi' wnit, na' naa ba billelb'." Na'ch wzologake' bengake' lnina'.

25'Na' ka wzolo lnina', xiine' bi' necha' chdab' lyixaa. Na' ka billim' gaozə lillbaa, benib' chkwel wikwellka' na' chakte wiyaana'. 26Na'ch wneb' to wen llinka' na' wṇabibee bin chak lillbaa. 27Na' wen llinna' chi'e: "Bi' bishoonan' ba bila', na' ben xo'na' mandad betgake' me'do'na' mbejchlawin daa bila'b' shi'a shao'." 28Na' xiine' bi' necha' bllaab' na' bi goonib' yiyoob'. Na'ch bchej xabaa got'yoile'b' kwenche yiyoob'. 29Na'ch che'b' xabaa: "Nezkzilo' ba gok zan yiz chon' yog' daa no', na' ni shlin bin' chishj' cho'a xtilloona'. Na' bigan' gono' nad' la'ch' to shibdo' kwenche wit'b yeej gaolem' bi'ka' nllaguid'. 30Na' naa bila' xiino'ni biyit' bideb' yog' daa bi'ob' na' benditjb' xmecho'na' kon noolə wdaka', na' ba betzo' me'do'na', bana' le nak, ni cheb'." 31Na'ch che' xabaa: "Xiindawaa, li' zoaleno' nad' toshiizi, na' yog' bi' de cha' chekzo' daa. 32Per chonan byen naa yibaicho na' goncho lnini, la' ba bila' bi' bishooni. Ba gok cheb' ka bi' ba wit, na' naa ba bila'b' mbam'; gok cheb' ka bi' wnit, na' naa ba billelb'."

**Jempl che wen llinna',
beena' beditj daa de che xane'na'**

16 ¹Na' lekzka' goll Jesúza' ben'ka' nakgake'ne' txen:
—Wzoa to ben' wni'a nape' to wen llin che', na' bene' lo nee yog' dii de che'. Na' wyaj bał ben' jellgake'ne': “Le chonditj beena' daa beno' lo nee.” ²Na'ch wne xane'na' le', chi'ene': “Ba benid' ka nagake' chono', na' chiyal' yidio' kwent diika' ngoo lo no', la' bich gon' xshino'na'.” ³Na'ch chaki wen llinna': “¿Nakra gona'n naa, bich gon' xan'na' llinna' gon'? Bi soid' gon' llin wal, na' chido'id' yep' ben' yiyesh'gakile' nad' gongake' lat' wej xmech'. ⁴Ba nejid' nak gon' kwenche wleb ben' nad' lille'ka' kat' bich gat' llin cha'na'.” ⁵Na'ch goxe' to to ben'ka' chal'gake' che xane'na', na' ben' necha' wnable'ne', chi'ene': “¿Ka'k' chaloo che xan'na'?” ⁶Na' beena' chi'e: “Chalaa to guyoa medidⁱ set.” Na'ch chi'ene': “Ni de yisha', lobe'zə wche' na' bda'n shiyonzannan' chaloo.” ⁷Na' ka wde, wnable' beena' sto, chi'ene': “¿Shera li? ¿Ka'k' chaloo?” Na' beena' chi'ene': “Chalaa to guyoa gush trigo.” Na'ch chi'ene': “Ni de yisha' na' bda'n taplalj gushzannan' chaloo.” ⁸Na' xan wen llinna' be'lawee wen llin mal che'na' daa biyiljlallee naklan gone'n. La' ben'ka' zech wneyi che daa chak lo yell-lioni, chiyiljall'chgake' nak soalen ljwellgake' wen kwenche ile'shii ljwellgake', aga ka ben'ka' ba yoo beeni' che Chioza' loo yichjlall'do'eka'.

⁹Na' nia' le', li wchin yel' shawaa de chele yell-lioni kwenche gакlenle ben', na' kat' ba wde che yel' shawaa, Chioza' wlebe' le' soalenlene' zejli kañi.

¹⁰Na' beena' chon ka chiyal' kon lat' daa nak lall' nee, ka'kzan gone' shi bichlə dii xench koo lall' nee. Na' beena' bi chon ka chiyal' kon daa nak lall' nee, ka'kzə gone' shi bitekchlə dii xench koo lall' nee. ¹¹Shi bi chonle ka chiyal' kon yel' shawaa de yell-lioni, bi gonzle lez ikaale yel' shawaa de yabana'. ¹²Na' shi bi chonle ka chiyal' kon yel' shawaa nak lall' na'le yell-lioni, ¿nakra gon Chioza' gone' le' yel' shawaa daa gaki chele?

16:6 Medid: to to medidki gokan ka do 37 litr.

13'Aga ga zoa to beṇ' wlane' xshin chop beṇ', la' wakzbanile' beena' to, na' gakchile' beena' sto, wa gone' xshin beena' to do lallee na' xshin beena' sto gone'n nakzi. Aga wak gonle ka cheeni Chioza' shi le chzelall'le yel' wni'ana'.

14'Na' fariseoka' le chzelall'gake' mecha', na' ka bengakile' dillaa choe' Jesúza', bxillgakile'ne'. 15'Na'ch che' Jesúza' legake':

—La'kzi nale nakle beṇ' wen, Chioza' nezile' nakan nak yichjlall'do'lena'. La' daa chaki beṇ' yell-lioni nakan dii lliarote, leyen'lannan' chakzbani Chioza'.

Leya' na' yel' wṇabia' che Chioza'

16'Na' lekzka' che' Jesúza':

—Leya' na' daa bli' bsemi dii beṇ'ka' wdixjee daa goll Chioza' legake', legakannan' wṇabia'gakan axt ka bllin lla bid Juanna'. Na' ka bid Juanna', wzolo chzenag beṇ' dill' wen dill' kob che yel' wṇabia' che Chioza', na' chongake' to dii byen kwenche inabi'e loo yichjlall'do'eka'.

17'Dii li nia' le', lobech te che yabana' len yell-lioni, aga ka daa gonz shcho'a daa na leya'.

Bi chiya' yilaa beṇ'ka' nshagna'

(Mt. 19:1-12; Mr. 10:1-12)

18'Shi to beṇ' byo yilee xoolena' na' yikee noolə yoblə, chone' ka chon beena' zoate nool che'na' na' chdalene' noolə yoblə. Na' beena' yikee noola' bilaa beṇ' che'na' le', lekzka' chone' ka chon beena' zoalente nool che'na' na' chdalene' noolə yoblə.

Beṇ' wni'ana' na' Lázarona'

19'Na' chize' Jesúza' beṇ'ka':

—Wzoa to beṇ' wni'a na' chakwe' shgal' lech' dii wen na' yog' lla chaoshawe'. 20'Na' lekzka' wzoa to beṇ' yesh' wlie' Lázaros, na' llii we'na' doxen kwerp che'na'. Na' tlii chjchi'e cho'a yoo che beṇ' wni'ana', 21'gokile' gawe' la'ch' blaaka' chxop xan mes che'na', na' axt bekw'ka' chleegakb we'na' llii'. 22'Na' bllin lla wit beṇ' yeshaa, na' biche' anjl che Chioza'ne' kwenche jazoalene' dii Abrahama'. Na' lekzka' wit

ben' wni'ana' na' bkwash'gake'ne'. ²³Na' dii ben' wni'ana' chdezi'chgue' gana' lle' ben' wetka', na' blis jalawe'na' na' zit'lə ble'ile' dii Lázaroná' chi'e kwit dii Abrahama'. ²⁴Na'ch wnie' zilljə chi'e: “Xadawaa Abraham, biyesh'gachi nad' na' bsel' Lázaroná' kwenche wleejlat' xbene'na' loo nisa' na' yidshone'n lo lollaani, la' le chllaglochgan' lo yi'ni.” ²⁵Na' Abrahama' chi'ene': “Xiin, jadini ka mbalaz gok cho' shlak wbano' yell-liona', na' Lázaroni aga bi dii wen gok che'. Na' naa chizi'e banez ni, na' li' chzak'zi'o. ²⁶Na' ziznakan sto, ze to bdiñj xen gcho'li, na' aga wak te ben'ki yidgake' gana' lle'le, na' ben'ka' lle' na' aga wak tegake' yidgake' gani zoanto.” ²⁷Na'ch che' ben' wnia'na'ne': “Chñabid' li' shka', xadawaa Abraham, ben goklen bsel'gach Lázaroná' lill xa'na' ²⁸gana' zoa zi gay' ben' bishaaka', llje'lene' legake' dill' kwenche bi lengake' yiyedgake' gani de yel' zak'zi'ni.” ²⁹Na' Abrahama' chi'ene': “Napkzgake' daa bzej dii Moiséza' na' daa bzej dii ben'ka' wdixjee daa goll Chioza'. ¡Na' chiyal' wzenaggake'n!” ³⁰Na' che' ben' wnia'na'ne': “Aga wakan, xadawaa Abraham, san shel' to ben' ba wit yibane' na' yiyaje' lljaye'lene' legake' dill', na' wiyaj wilengakile' saaxya che'ka'.” ³¹Na' che' Abrahama'ne': “Shi bi chzenaggake' daa bzej dii Moiséza' na' daa bzej dii ben'ka' wdixjee daa goll Chioza', lezkka' aga wyajle'gake' la'kzi yiban to ben' wet.”

Bi goncho ka ixop ben' yoblə gone' dii mala'

(Mt. 18:6-7, 21-22; Mr. 9:42)

17

¹Na'ch che' Jesúsá' ben'ka' nakgake'ne' txen: —Bia'kzə de dii gon ka ixop ben' gone' dii mala', per ñyesh'laz gak che beena' wchixe' ben' yoblə gone' dii mala'! ²Wenlan shel' wwal'gake' yene'na' to yaj che molin na' lljaza'gake'ne' loo nisdona' aga ka daa wchixe' to ben'ki chajle'gake' cha'. ³Daan, li' wsak'.

'Shi to bish' lljwell-le gone' mal chele, li' wsheshlene', na' shi yiyajile' daa bene' chele, li' yizi'xen che'. ⁴La'kzi ax't gall shii shlla gone' bi gone' chele, na' gall shiite ine' le': “Chiyajid' daa ben' cho'”, chiyal' yizi'xenle che'.

Daa gak gon to beṅ' chajle'

5Na'ch goll postlka' Xancho Jesús'a:

—Goklen neto' gonlilall'chnto' Chioza'.

6Na'ch che' Xancho Jesús'a legake':

—Shel' ye'l' chajle' chelena' nakan la'ch' ka nak sa mostásana', daa nak diido'zə, wak ye'le yag xen wala': “Blall'shki, na' jsoa loo niso' na'lə”, na' gon yaga' daa ye'len, shel'ka'.

Daa chiyal' gon to wen llin

7'Shi nole zoa to wen llin chele na' zizee lyixaa jawaane' goonna' wa jtapeeb, aga we'lene': “Biyoo, na' wche' kwenche gawo'.” 8Aga we'lene' ka', san ye'l-lene': “Bsini'a daa gaw' xshe'na', na' wze wneyi kwenche wdio' daa yeej gaw', na'techlə yeej gawo'.” 9Na' ni bi we'lene' ye'l' choxken daa ba bene' daa che'lene' gone'. 10Lekzka' le', kat' ba biyoll benle yog' daa non Chioza' mandad gonle, chiyal' inale: “Neto' bi chizo chizakinto' gonnto' yog'lolten, shinchga bizointo' ba bennto' daa chonan byen gonnto'.”

Biyon Jesús'a shi beṅ' chak yillwe' daa le lepra

11Na' shlak zjada Jesús'a Jerusalenna', wdie' gana' ndil yell-lioka' mbani Samariana' na' Galileana'. 12Na' ka blline' to cho'a yelldo', bllesh shi beṅ' chakgake' yillwe' daa le lepra kwenche lljatilgake'ne', na' de zit'lə wzegake' 13besyaagake' zilljə, che'gake'ne':

—¡Jesús, Maestro, biyesh'lall'gachi neto'!

14Na' ka ble'i Jesús'a legake', na' golle':


—Li shaj lao bxo'zka' kwenche ile'gakile' le'.

Na' shlak zejgake' bigaa yillwe' che'ka'. 15Na'ch toe' bibi'e ka gokbe'ile' ba biyakile', na'ch ax̄t chosya'ile' choe'lawee Chioza'. 16Na' b'chek' xibe'na' lao Jesús'a na' bdose' lo yona' kwenche bi'ene' ye'l' choxken. Na' beena' ben ka' nake' beṅ' Samaria. 17Na'ch che' Jesús'a:

—¿Aaga shigaken' biyaki? ¿Garaṅ beṅ'ka' zi ga? 18 ¿Atochga beṅ' zitiin bibi'e choe'lawee Chioza'?

19Na'ch che' Jesús'a beena':

—Bizolla' na' biyaj. Ba biyakilo' daa wyajli'o cha'.



Llana' zizaa, shi to beṇ' llie' yichj lille'na' na' xshinlaze'na' den loo yoo che'na', bi yiyetjze' kwenche lljaleje'n. Lc. 17:31

Yel' wṇabia' che Chioza'

(Mt. 24:23-28, 36-41)

²⁰Na'ch wṇabi fariseoka' Jesúza' batran solo inṇabia' Chioza' lo yell-lioni. Na' chi'e legake':

—Ka nak yel' wṇabia' che Chioza', aga nakan ka to dii ile'tekzicho. ²¹Aga no ina: “Ni chṇabia' Chioza'”, wa “Na' chṇabi'e”, la' ladjlenikzan ba bla' yel' wṇabia' che'na'.

²²Na'ch chi'e beṇ'ka' nakgake'ne' txen:

—Wllin lla kat' gaklall'le la'ch' zi shlla ile'chile inṇabi'a, nad', Beṇ' Bsel' Chioza' Yell-lioni, na' aga wle'chile nad'. ²³Na' ichej beṇ' ine': “Ni zoe'”, wa “Na' zoe'.” Na' bi shajle, ni bi gonle beṇ'ka' txen. ²⁴La' ka chak kat' chep yes, chzeeni'n doxen xan yabana', ka'kzan gak llana' kat' zizaa, nad', Beṇ' Bsel' Chioza' Yell-lioni. ²⁵Na' chonan byen zigaate biya daa yen ile'id', na' beṇ'ki zoa naa wzoagake' nad' ka'lə. ²⁶Kon ka gok kana' wzoa dii Noéna', ka'kzan gak kat' ba zoa illin lla yiyed' dii yoblə, nad', Beṇ' Bsel' Chioza' Yell-lioni. ²⁷Kana' wzoa dii Noéna', beṇ' yell-lioka' cheej chaogake', chshagna'gake', na'

choe'gake' yel' wishagna' che xiine'ka' bllinte llana' wyoo dii Noéna' loo barkwa'. Na' wzolo chak yejsiwaa yell-lioni axt billa'cha lawinna' nisa', na' blliyai'n yog'lole'. ²⁸Na' lekzka' wizak kana' wzoa dii Lota'. Cheej chaogake', chiya'o chidegake' bi de chegake', na' chaz chaangake', na' chon lillgake'. ²⁹Per ka bchej dii Lota' yell Sodómana', Chioza' bletje' yi'na' xan yabana' nchixan daa ne' azufre na' betan yog' ben' yell Sodómaka'. ³⁰Na' ka'kzan gak llana' kat' yiyed', nad', Ben' Bsel' Chioza' Yell-lioni.

³¹'Llana' zizaa, shi to ben' llie' yichj lille'na' na' xshinlaze'na' den loo yoo che'na', bi yiyetjze' kwenche lljaleje'n. Na' shi to ben' zeje' lyixaa, bi yiyajze' lille'na'. ³²Li lljadini ka gok che dii xool Lota'. ³³Beena' bi chsanlall' yel' mban che'na', beenan' kwiayi'; san beena' chsanlall' yel' mban che'na', beenan' gat' to yel' mban che' zejli kaní.

³⁴'Na' nia' le', lle'na' kat' zizaa, chop ben' die' toz blag, toe' yichi'a na' stoe' yigaan. ³⁵Na' gana' lle' chop noolə chotgake', toe' yichi'a na' stoe' yigaan. ³⁶Na' chop ben' byo chongake' llin lyixaa, toe' yichi'a na' beena' sto yigaane'.

³⁷Na'ch wñabgakile'ne':

—¿Garan gak dga, Xan'?

Na' chi'e legake':

—Gana' de ba weta', nan' chdop chllag llodka'.

Jempl che to nool wizeb na' to ben' wen yel' joschis

18 ¹Na' bzoa Jesúza' to jempl kwenche bli' bsedile' legake' bi lljshyagakile' we'llwillgake' Chioza'. ²Chi'e legake':

—Wzoa to ben' wen yel' joschis to yell, na' bi chall chllebe' Chioza', ni bibi chakile' shi bi chiyoolallii ben' ka chone'. ³Na' yella' wzoa to noolə wizeb na' chajtezi chaje' lawe'na', chi'ene': “Bensha yel' joschis cha'ni.” ⁴Na' ssha ba gok chaje' lawe'na' na' bikzə chone' bin chi'ene', na' bllin lla kat' chakile': “La'kzi bi chall chlleb' Chioza' na' ni bibi chakid' shi bi chiyoolallii ben' ka chon', ⁵gonch' yel' joschis che nooli kwenche bich yidyembeguile' nad'.”

⁶Na' Xancho Jesúza' chi'e legake':

—Li wzenag ka ben ben' wen yel' joschisa', beena' bi chall chlleb' Chioza'. ⁷¿Achakile' Chioza' bi gaklene' ben'ka' ba wleje'

nakgake' lall' nee, beṅ'ka' choe'lwillgake'ne' ka waḷ ka tella? ¿Awwlaile' gaklene' legake'? ⁸Bi nakan ka', san nia' le' katena' gaklene' legake'. Per kat' zizaa, nad', Beṅ' Bseḷ' Chioza' Yell-lioni, ¿alle'ch beṅ' nonḷilall' nad' yell-lioni, lla?

Jempl che to fariseo na' to beṅ' wiḷixj

⁹Na' bzoa Jesúza' sto jempl che beṅ'ka' chakgakile' nakgake' beṅ' wen lao Chioza' na' chongakile' beṅ' yoblə nakzi. Na' wne':

¹⁰—Chop beṅ' wyajgake' yoodo'na' kwenche je'lwillgake' Chioza'. Toe' nake' fariseo na' beena' sto nake' beṅ' wiḷixj. ¹¹Na' farisewa' zie' chshalj chshon che kwine', chi'e: “Chios cha', choḷkeno' bi chon' ka chon beṅ' yoblə, bi chzi' chban', bi nak' beṅ' wen dii mal, agagan' kwey yichj' nool cha'na' kwenche soalen' nool yoblə, na' ni bi chon' ka chon beṅ' wiḷixji. ¹²Chop shii to xman chzoa' wbas', na' lawi yog' daa chon' gan chbej' daa chidoḷoo ikoo.” ¹³Na' beṅ' wiḷixja', zit'lə wzie' na' ni bi biyaxjile' wḷis lawe'na' wwie' yabana', san chballee cho'a lcho'ena' chi'e: “¿Chios cha', biyesh'gachi nad' daa nak' beṅ' saaxya!” ¹⁴Na' nia' le', Chioza' bzenague' che beṅ' wiḷixja' na' bizee biyaje' lille'na' ba biyakxen saaxya che'na'. San bi bzenague' che farisewa'. La' beena' chon kwine' beṅ' choo beṅ' xen, Chioza' gone'ne' beṅ' bibi zakii. Na' beena' chakile' bibi zakee, Chioza' gone'ne' beṅ' choo beṅ' xen.

Benleey Jesúza' bi'do'ka'

(Mt. 19:13-15; Mr. 10:13-16)

¹⁵Na' lekzka' beṅ' zan jwa' bi'do' che'ka' lao Jesúza' kwenche bḷoa neena' yichjb'ka' na' wṅabile' Chioza' gaklene'gakb'. Na' ka ble'i beṅ'ka' nakgake'ne' txen, bsheshlengake' legake'. ¹⁶Na' Jesúza' goxe' bi'do'ka', na' chi'e beṅ'ka' nakgake'ne' txen:

—Li we' latj yid bi'do'ki lawa'ni, bi wllonle, la' Chioza' chṅabi'e loo yichjlall'do' beṅ'ka' nak ka legakb'. ¹⁷Dii li nia' le', beena' bi yiyak yichjlall'do'ena' ka che bi'do'ki kwenche inabia' Chioza' le', bi yilline' gana' zoa Chioza'.

ḷ 18:12 Daa chidoḷoo ikoo: literalmente la décima parte.

**To beṇ' zakii beṇ' nak beṇ' wni'a be'lene'
Jesúza' dill'**

(Mt. 19:16-30; Mr. 10:17-31)

18 To beṇ' zakii wṇabile' Jesúza', chi'ene':

—Maestro, li' nako' beṇ' wen. Wna nad' beran chiyal' gon' kwenche gat' to yel' mban cha' zejli kani.

19 Na'ch che' Jesúza'ne':

—¿Berache nazo' nad' beṇ' wen? Toz Chioza' nake' beṇ' wen.

20 Ba nezkzilo' daa nllia Chioza' bia' goncho: “Bi soaleno' nool bi nak nool cho', bi wito' beṇ', bi kwano', bi chiljlaloo bizə gon ino' che beṇ', na' wdap balaan xaxnoo.”

21 Na'ch che' beena'ne':

—Kana' naktia' bi' xkwid' chon' yog' diika'.

22 Na'ch ka beni Jesúza' ka goll beena'ne', na' chi'ene':

—Stozə daa chyalj gono': jayet' jade yog' daa de cho' na' be'n beṇ' yesh'ka'. Na' shi gono' ka', na' gat' to yel' shao' cho' yabana'. Na' da, dino' nad'.

23 Na' ka beni beena' ka goll Jesúza'ne', le gokyeshile', la' beṇ' wni'a nleban'. 24 Na' ka ble'i Jesúza' le gokyeshile', na' chi'e':

—¿Lallj inleeb chonan che beṇ' wni'aka' we'gake' latj inabia' Chioza' legake'! 25 Lobe'ch te to kamey xan yeshaa aga ka to beṇ' wni'a yiyo'e yabana'.

26 Na' beṇ'ka' beni, gollgake'ne':

—¿Noran yila shka'?

27 Na'ch che' Jesúza' legake':

—Daa bi chak gon benecha', Chioza' chak gone'n.

28 Na'ch che' Pédrona' Jesúza':

—Xan', ba wlej yichjnto' yog' dii de chento' kwenche naknto' li' txen.

29 Na'ch che' Jesúza' legake':

—Dii li nia' le', nottezə beṇ' ba bzanile' no lille', no xaxnee, no beṇ' bishee, no beṇ' zane', no xiñ xoolé' kwenche cho'e latj chnabia' Chioza'ne', 30 Chioza'kzə wi'e dii zak'chi che' yell-lioni aga ka diika' wlej yichje', na' ka yilline' yabana' wi'ene' to yel' mban zejli kani.

De wyoŋ shii wdixjee Jesúza' guete'

(Mt. 20:17-19; Mr. 10:32-34)

31 Na'ch wlej Jesúza' ben'ka' shllin ka'lə, ben'ka' nakgake'ne' txen, chi'e legake':

—Dga ziyajcho Jerusalénna' naa, yillinin daa bzej dii ben'ka' wdixjee daa goll Chioza' kani'yi daa gak cha', nad', Ben' Bsel' Chioza' Yell-lioni. 32 La' gongake' nad' lo na' ben'ka' bi nombia' Chioza', na' gonlegake' cha', biya dii inagake' nad', na' wlla' xeneeka' nad'. 33 Na' wit chingake' nad' na'tech witgake' nad', na' yiyon lla yiban' ladj ben' wetka'.

34 Na' ben'ka' nakgake'ne' txen ni lat' bi wyajni'gakile' daa golle' legake', na' ni bi wnezgakile' berache chi'e legake' ka', la' daa golle' legake' nakan dii bi gak shajni'gakile'.

Biyon Jesúza' to ben' lchoj yell Jericóna'

(Mt. 20:29-34; Mr. 10:46-52)

35 Na' ka ba chllin Jesúza' yell Jericóna', na' chi' to ben' lchoj cho'a neza' chnabile' ben' yiyesh'lall'gakile'ne' we'gake' lat' wej xmeche'. 36 Na' ka benile' chde ben' zan na'ch wnabe' bin chak. 37 Na' gollgake'ne':

—Jesús, ben' Nazaretan', chda ni.

38 Na'ch besyee, chi'e:

—jJesús, Xiin dia che dii Daví, biyesh'lall'gachi nad'!

39 Na' ben'ka' llialo lao Jesúza' chsheshlengake'ne' kwenche kwi'e llizə, na' zizikchlə chosyee, chi'e:

—jXiin dia che dii Daví, biyesh'lall'gachi nad'!

40 Na'ch wlez Jesúza' na' bene' mandad lljxi'gake'ne'. Na' ka bllin ben' lchoja' lawe'na' na'ch wnabile'ne':

41 —jBeran cheenilo' gon' cho'?

Na'ch che' ben' lchoja'ne':

—Xan', cheenid' ile'id'.

42 Na'ch che' Jesúza'ne':

—Daa ba chonlilaloo nad' na' ile'ilo'.

43 Na' katena' lii bile'teile', na'ch janoe' Jesúza' choe'lawee Chioza'. Na' yog' ben'ka' ble'i daa ben Jesúza' be'la'ogake' Chioza'.

Jesúza' na' Zaquewa'

19 ¹Na'ch bllin Jesúza' yell Jericóna' na' wdie' gchol yella'. ²Na' yella' zoa to ben' wni'a lie' Zaqueo, na' ngoo lall' nee xonj wichixjka'. ³Na' goklallee ile'ile' Jesúza', per bi gok ile'ile'ne' daa nake' ben' b'chekwdo' na' daa zejlen Jesúza' ben' zan. ⁴Na'ch wllialodoe' lawe'ka' na' wyepe' to lo yag xen kwenche ile'ile'ne' ka tie'. ⁵Na' ka bllin Jesúza' xan yaga', na' blis lawe'na' chi'ene':

—Zaqueo, btalaloo biyetj, la' lillo'nan' yigaana' naa.

⁶Na'ch biyetjdo Zaquewa' chibaile' bichi'e Jesúza' lille'na'. ⁷Na' ka ble'i ben'ka' lle' na' ka gok, yog'ze' wzolo biz chon chnagake' che', che'gake':

—Yigaanxgale' lill ben' saaxyani, na.

⁸Na'ch wzolla Zaquewa' na' chi'e Xancho Jesúza':

—Xan', cheenid' wi'a gashjə daa de cha' ben' yesh'ka', na' yog' ben'ka' ba b'chixj' dii xench, yiyoe'gakee taplə ka daa ba wlan' chegake'.

⁹Na'ch che' Jesúza'ne':

—Naaanlla ba bisla Chioza' ben'ki zoa loo yooni kwenche bi kwiayi'gake', daa len Zaquewi nake' xiin dia che dii Abrahama'. ¹⁰La' ka nak' nad', Ben' Bsel' Chioza' Yell-lioni, bid' kwenche yiyilj' na' yisla' ben'ka' yoo nez daa wlliyi'n legake'.

Jempl che beena' bkwaanlen wen llin che'ka' mech

¹¹Shlak chzenag ben'ka' daa che' Jesúza', bseesile' legake' to jempl, daa ba zoa illine' Jerusalenna' na' legake' gogkakile' daa nake' ben' bsel' Chioza' lii solotie' inabi'e. ¹²Na'ch chi'e legake':

—To ben' zakii bcheje' wyaje' to yell zit' wal kwenche lljalane' yel' wnabia' che lalle'na', na' ka yilline' inabi'e. ¹³Na' ka zi' see, wnie' shi wen llin che'ka' na' bi'e legake' twej mech dii zak' dii xen na' chi'e legake': “Ni de mechi, li gonlenan delgens shlak bi soa.” ¹⁴Na' ben' wlall che'ka' le chakzbangakile'ne', na' ka wde wzee bsel'gake' xonj ben' wyajgake' lao beena' we' lsens inabi'e kwenche jellgake'ne': “Bi cheeninto' inabia' beeni neto'.” ¹⁵Per bia'kzə gok lo nee inabi'e, na' biyaje' lalle'na'. Na' ka billine' goxe' ben'ka' bkwaanlene' mecha' kwenche inezile' ka'k' wej

ben mecha' gan daa bkwaanlene' to toe'. ¹⁶Na' ka bllin beñ' necha' lawe'na' na' chi'ene': "Xan', xmecho'na' bkwaan'leno' nad' bena'n gan shin." ¹⁷Na'ch beñ' wñabia'na' chi'ene': "Wenkzan beno'. Daa beno' ka chiya! kon lat' mecha' bkwaanlen' li, wzoa' li' inabi'o shi yell." ¹⁸Na' ka bllin beena' sto lawe'na' na' chi'ene': "Xan', xmecho'na' bkwaan'leno' nad' bena'n gan गयाan." ¹⁹Na' lekzka' chi'e beena': "Wzoa' li' inabi'o gay' yell." ²⁰Na'ch bllin stoe' lawe'na' na' chi'ene': "Xan', ni de xmecho'na' bkwaan'leno' nad'. Bllall'tipteza'n to lech' na' wlooshawaan ²¹daa blleb' li, la' le beñ' zña nako'. Chkaatezo' dii bi naki cho', na' chizi' chilaptezo' dii goz goon beñ' yoblə." ²²Na'ch che' beñ' wñabia'na' le': "Bikzbi yejni'alallii beno'. Kon ka ba wno' ka'kzan gak cho'. Nezi'lo' nak' beñ' zña, na' chkaatez' dii bi naki cha' na' chizi' chilap' dii goz goon beñ' yoblə. ²³Na' daa nezi'lo' ka' chon', ¿berache ki bi'o xmecha' gon yichjin kwence yikaan naa ba biyed'?" ²⁴Na'ch chi'e beñ'ka' lle' na': "Li yikaa mecha' daa bi'ane' na' li we'n beena' bene' gan shin." ²⁵Na'ch che' beñ'ka'ne': "Xan', ba napkzə beena' shin." ²⁶Na' che' beñ' wñabia'na' legake': "Nia' le', beena' chonlene' llin daa yoo lo nee, wakch lall' nee dii xench; san beena' bi chonlene' llin daa yoo lo nee, axt daa ngoo lo nee lat' yidoyo. ²⁷Na' ka nak beñ'ka' chakzbangakile' nad', beñ'ka' bi cheengakile' inabi'a, li lljxi'gake' ni na' li witgake' ile'teid'."

Billin Jesúza' Jerusalénna'

(Mt. 21:1-11; Mr. 11:1-11; Jn 12:12-19)

²⁸Na' ka wde wna Jesúza' ka', na'ch bigoolene' nez beñ'ka' nakgake'ne' txen ziyajgake' Jerusalénna'. ²⁹Na' ka billingake' xni'a yaa daa le Yaa Olivos, gaozə yellka' le Betfagé na' Betania, na'ch bselee chop beñ'ka' nakgake'ne' txen, ³⁰na' chi'e legake':

—Li shaj yella' Ili' na', na' ka illinle ile'ile to burr chbando', ba konon' kwia, da'b yag. Na' wsell-leb wche'leb nilə. ³¹Na' shi no inaz le': "¿Berache chsellzleb?", na' ye'lene': "Xanchonan' chyalljile'b."

³²Na'ch wyaj beñ'ka' bselee, na' ka bllingake' ble'gakile' to burr chbando' da'b yag, kon kayen' goll Jesúza' legake'. ³³Na' ka chsellgake' burra' na'ch che' xama' legake':

—¿Berache chsell-leb?

34Na'ch che'gake'ne':

—Xanchonan' chyalljile'b.

35Na'ch bche'gake'b jwa'gake'b lao Jesúza' na' bxoagake' xe'ka' koll'ba' na' blligake' Jesúza' koll'ba'. 36Na' shlak zej Jesúza' llie' burra', chshilj xa ben'ka' tlo neza'. 37Na' ka ba chillingake' gaozə gana' chiyetj nez daa ziza' Yaa Olívoza', yog'lol ben'ka' nakgake'ne' txen chosyaagake' daa chibagakile' na' choe'la'ogake' Chioza' daa ble'gakile' yog' yel' wakka' bene'. 38Na'ch nagake':

—¿Gaklenshga Xancho Chioza' beeni ba bselee inabi'e! ¡Li da, we'la'ocho Chioza' zoa yabana' daa bene' ka zoalenchone' mbalaz!

39Na' bal fariseoka' len ladj ben'ka' no Jesúza', che'gake'ne':

—Maestro, goll ben'ki nakgake' li' txen soagake' llizə.

40Na' che' Jesúza' legake':

—Nia' le', shi ben'ki soagake' llizə, na' yaj kilə solo gosyaagakan we'la'ogakan nad'.

41Na' ka billine' gaozə yell Jerusalénna', gokyeshile' ka ble'ile'n na' wchelle' che ben'ka' zoa na'. 42Na' chie':

—¿Shel'ka' naanlla gakbe'ile nakan gonle kwenche soale mbalaz! Per ngashaan laolena' na' aga wakbe'kzile. 43Wllin lla ila' ben'ka' chakzbangakile' le' na' wzechjgake' yelli leej na' kono gak sho' ichej. 44Na' ni sto yaj che lill-leka' bich yikwaangake' koll' ljwellin, na' witgake' le' len xiinleka', la' bi gokbe'ile ka bla' Chioza' ladjleni.

Bishesh Jesúza' ben'ka' chit' chde lesh' chyoodo'na'

(Mt. 21:12-17; Mr. 11:15-19; Jn 2:13-22)

45Na'ch ka bllin Jesúza' cho'a yoodo'na' na' bisheshe' ben'ka' chit' chde. 46Na' chie' legake':

—Cho'a Xtill' Chioza' nan: “Lilla'na' nakan ga choe'lwill ben' nad'”, na' le' naa ba nonzlen ka to ga chdop chllag wban.

47Na' yog' lla bli' bsemi Jesúza' ben' gana' zoa yoodo'na', na' bxoza' chnabia' na' ben'ka' chli' chsemi leya' na' nochlə ben' wnabia' che ben' Israelka' la'kzi biyiljall'gake' naklə gongake' kwenche witgake'ne' 48bikzə bi gok gongake', la' yog'zə ben' chibagakile' chzenaggake' dill'ka' cho'e.

Yel' wñabia' che Jesúza'

(Mt. 21:23-27; Mr. 11:27-33)

20 ¹Na' bllin to lla, shlak chli' chsedi Jesúza' ben'ka' lesh' chyoodo'na' na' chyixje'ile' legake' dill' wen dill' kob che Chioza', bllin b̄xozka' chñabia' na' ben'ka' chli' chsedi leya' len ben' golka' chñabia'. ²Na' che'gake'ne':

—Wnashki neto', ¿bi yel' wñabia' napo' chono' diiki? Na' ¿nora ben' li' yel' wñabia'ni?

³Na'ch che' Jesúza' legake':

—Lekzka' nad' de to dii inabid' le', li inashki nad': ⁴¿Noran bsel' Juanna' kwenche bidchoe' ben' nisa'? ¿AChiozan' bseleene'? ¿Anti ben' yell-liona'zan bseleene', lla?

⁵Na'ch wzologake' choe'len ljwellgake' dill', che'gake':

—¿Nakra ka ye'chone', lla? Shi ye'chone' Chioza' bseleene', lobe' ine' cho': “¿Berache ki wyajle'le che', shka'?” ⁶Na' shi yize'chone' nozə ben' bseleene', yog' ben'ki wlligake' cho' yaj witgake' cho', la' yog'gake' chajle'gake' Juanna' bi'e dill' daa goll Chioza'ne'.

⁷Na'ch gollgake' Jesúza':

—Bi nezinto' no bsel' beena'.

⁸Na'ch che' Jesúza' legake':

—Lekzka' nad' aga wnia' le' noran ben' nad' yel' wñabia'na' kwenche chon' diiki.

Jempl che wen llin malka'

(Mt. 21:33-44; Mr. 12:1-11)

⁹Na' Jesúza' bseese to jempl lao ben'ka' lle' na':

—To ben' bilee yag uva, na' bene'n lall' na' ben'ka' gap wwian, na' wzee wyaje' ssha gan yoblə. ¹⁰Na' ka bizi' bilap ben'ka' uvana', xaninna' bselee to wen llin che' kwenche ljelle' ben'ka' nak lall' na'gake' yag uvaka' we'gake'ne' daa chidolee yikee. Na' ben'ka' chapgake' yag uvaka' bex'gake'ne' bet wdingake'ne', na'tech bilaggake'ne' to ka' che'. ¹¹Na'ch bselee sto wen llin che'na'. Na' lekzka' bet wdingake'ne', na' biya dii bengakile'ne', na' bizlaggake'ne' to ka' che'. ¹²Na'ch de wyon shii, bizselee wen llin yoblə, na' lekzka' bengake'ne' bido we'zi, na' bizlaggake'ne'.

13 Na'ch chaki xan yag uvaka: "¿Nakra ka gona'n? Wsel'shkid' bi' cha'ni, bi'ni le chakid'. Shera shicholə wzenaggake' cheb'." 14 Na' ka ble'i ben'ka' chap yag uvaka' xiine'na', na'ch che' ljwelle': "Bi'nin yigaanlem' yell-lioni. Li da witchob' kwenche yigaanlenchon." 15 Na' wlejkake'b' gana' lle' yag uvaka' na' betgake'b'.

Na'ch wñabi Jesúza' ben'ka' chzenag:

—¿Nakra ka chakile goni xan yag uvaka' ben'ka', lla? 16 Ba naktan shaje' na' ljete' ben'ka' chap yag uva che'na' na' yiyone' yell-lío che'na' lall' na' ben' yoblə.

Na' ka beni ben'ka' wne' ka', na' wnagake':

—¿Bat we' Chioza' latj gak ka'!

17 Na' bwia Jesúza' legake', chi'e:

—¿Beran zejin Cho'a Xtill' Chioza' gana' na:

Yaja' daa bi wyoolall' wen yooka',

leyen'lannan' yaja' daa ba nchejcha yoon'a?

18 Nottezə ben' lljchaze' lawinna' kwiayee, na' shi idakwan ben', axt wshoshjan le'.

Jañabgakile' Jesúza' shi chiyal' chixjkake'

daa chñab beena' chñabia' Rómana'

(Mt. 21:45-46; 22:15-22; Mr. 12:12-17)

19 Na' bxoza' chñabia' na' ben'ka' chli' chsedi leya' goklall'gake' gox'gake' Jesúza' ka biyoll' golle' ka', la' gokbe'gakile' chezgaken' wñie' daa bi chajle'gake' che'. Per bllebgake' ben'ka' ndop nllag na'. 20 Na'ch bsel'gake' to chop ben' wiwia wiya, na' bentezgake' ka ben' cheenchgayi wzenag che'. Per aga do lall'gaken' wyajgake', san kwenchezə kwejyelgakile' Jesúzan' na' lljadaogake' xya che' lao beena' chñabia' gana' mbani Judeana'.

21 Na' wñabgakile'ne':

—Maestro, nezinto' daa no' na' daa chli'o nakan dii li, na' aga chwio' nak nak ben', shi nake' ben' zakii wa shi bi nake'. Nezinto' chli'o nez li che Chioza' kon ka nakan. 22 Wnashki neto': ¿Achiyal' chixjcho daa chñab Césara', beena' chñabia', anti bi chiyal' chixjchon?

23 Na' gokbe'i Jesúza' aga do lall'gaken' wñabgakile'ne', na'ch chi'e:

24—Li wli'shkayi nad' to mech. ¿Nora cho'alawin na' no leyin da'n?

Na' che'gake'ne':

—Che Césaran', beena' chñabia' Rómana'.

25 Na'ch chi'e:

—Na'len, li we' Césara' daa naki che', na' lekzka' li we' Chioza' daa naki che'.

26 Na' ni shcho'a dill' daa bi'e lao ben'ka' bi gok wchingake'n kwenche gaogake' xya che'. Na' bibangakile' ka golle' legake' na' bibe'gake' llizæ.

Wnabgakile' Jesúza' nak gak kat' yiban ben' wetka'

(Mt. 22:23-33; Mr. 12:18-27)

27 Ka wde dga, bllin bal saduceoka' lao Jesúza', ben'ka' bi chajle' daa yiban ben' wetka'. Na'ch che'gake' Jesúza':

28—Maestro, leya' bzej dii Moiséza' nan: shi to ben' byo guete' na' igaan xoolena' wizeb na' kono xiingake' wzoa, ben' bish' ben' weta' chiya' yikee nool wizeba' kwenche soa xiin dia che dii ben' bisheena'. 29 Ki gok to shii, wzoa gall bish' ben', na' ben' necha' bshagnee, na' wite' na' kono xiine' wzoa. 30 Na' ben' wchopina' bikee noola', na' lekzka' wite' na' kono xiine' wzoa. 31 Na' ben' wyonina', lekzka' bizkee noola', na' wizete' na' kono xiine' wzoa. Na' lekzka' ben'ka' zi tap bizkaagake' noola' na' witgake', na' ni to ben'ka' gall bi wzoa xiingake' kon noola'. 32 Na' ka bllin lla lekzka' wit noola'. 33 Na' kat' yiban ben' wetka', ¿norayen'en' gak ben' che', lla?, la' galltien' wzoalene'.

34 Na'ch che' Jesúza' legake':

—Ben'ka' lle' yell-lioni naa chkaa ljwellgake', na' lekzka' choe' ye' wishagna' che xiine'ka'. 35 San ben'ka' ina Chioza' zak'gake' yiyajgake' gana' zoe' ka yibangake' ladj ben' wetka', aga ka'chan gongake'. La' koch no wshagna' gana' zoa Chioza', 36 ni koch no guet, san soagake' ka zoa anjlka'. Na' gakgake' xiin Chios daa ba bisbane' legake' ladj ben' wetka'. 37 Kwin dii Moiséza' bzeje' kwenche inezicho yiban ben' wetka' kana' bzeje' che yag yeshaa daa ble'ile' chal'nin. Na' wne' Xancho Chioza' nake' Chios che Abrahama', Isaaca' na' Jacoba'. 38 Na' Chioza' aga nake' Chios che ben' wet, san nake' Chios che ben'

de yel' mban cheyin. La' yog'lol ben' n̄x̄enilallii Chioza', dekzə yel' mban chegake'.

39 Na'ch baḷ ben'ka' chli' chsedi leya' gollgake'ne':

—Maestro, ka ba wneyenoon nakan.

40 Na' bich bi biyaxjchgakile' in̄abchgakile'ne'.

Crístona' nake' xiin dia che dii Davina'

(Mt. 22:41-46; Mr. 12:35-37)

41 Na' che' Jesúza' legake':

—¿Berache nazə ben' Crístona' nake' xiin dia che dii Davina'?,

42 len kwin dii Davinan' bzeje' lee libr che Sálmoka' gana' na:

X̄ancho Chioza' golle' X̄an'na':

“Wche' kwit' de sh̄li ni

43 shlak wzoa' x̄ni'ona' ben'ka' chakzbani li'.”

44 ¿Berache chakzile Crístona' nake' xiin dia che dii Davina', len kwin Davina' golle'ne': “X̄an'”?

Jesúza' wne' nan ben'ka' chli' chsedi leya' chongake' mal

(Mt. 23:1-36; Mr. 12:38-40; Lc. 11:37-54)

45 Na' shlak chzenag yog' ben'ka' lle' na', Jesúza' golle' ben'ka' nakgake'ne' txen:

46 —Li wsak' bi gonle ka chon ben'ki chli' chsedi leya'.

Le chibagakile' gon xe'ka' dii ton, na' cheengakile' yog'zə ben' gapgake' legake' balaan ladj lkwe' ben'. Na' gana' chdop chllagcho choe'lwillcho Chioza' chbagakile' kwe'gake' gana' chbe' ben'ka' zakii, na' ka'kzə chongake' ga de yel' waw.

47 Na' lekzka' chkaatezgake' lill nool wizebka', na' chongake' ka chshaljlen Chioza' ssha n̄leb kwenche gaki ben' le wen chongake'. Na' daa chongake' ka', ba nakten ile'gakile' yel' zak'zi' wala'.

Daa bzani to nool wizeb, bi'en Chioza'

(Mr. 12:41-44)

21 1 Na' ble'i Jesúza' ka chgoo ben' wni'aka' mecha' gana' chgoo ben' mech che yoodo'na'. 2 Na' lekzka' ble'ile' to nool yesh', ben' wizeb, wlo'e chop sintabdo'. 3 Na' goll Jesúza' legake':

—Dii li nia' le', la'kzi nool wizebi nake' ben' yesh', ba be'che' dii xench aga ka yog'te ben'ka'. ⁴La' yog'gake' choe'gake' daa chichoonan che'ka', na' le', naktie' ben' yesh', wlo'e doxen daa nape', la'kzi chyaljile'n.

Jesúza' chi'e wllin to lla kwiayi' yoodo'na'

(Mt. 24:1-2; Mr. 13:1-2)

⁵Na' bal ben'ka' choe'gake' xtill' yoodo'na' ka xochi nak yajka' nongakile'n na' diika' bzani ben' be'gake'n yoodo'na'. Na'ch che' Jesúza' legake':

⁶—Ka nak diiki chwiale naa, wllin lla kwiayi' yogaan, ni sto yaj bich kwia koll' ljwellin.

Diika' gak kat' ba zoa te che yell-lioni

(Mt. 24:3-28; Mr. 13:3-23)

⁷Na'ch wñabgakile' Jesúza', che'gake'ne':

—Maestro, ¿batran gak dga ba wno'? ¿Bera ka ile'into' gak kwenche inezinto' nan ba zoa gaoshosh gakan?

⁸Na'ch che' Jesúza' legake':

—Li wsak' bi we'le latj no siye' le'. La' ben' zan zi ichej gonzgake' ka nad', na' inazgake': “Nadaan Crístona”, na' lekzka' inazgake': “Ba bllin lla kwiayi' yell-lioni.” Bi gonle legake' txen. ⁹Na' ka yenile chak no wdil wa chtop chshag ljwell ben' kwenche soshi'y'gake' ben' wñabia'ka', bi illeble. Chonan byen zigaate gak diiki, per aga lii tete che yell-lioni kat' ba chakgakan.

¹⁰Na'ch golle' legake':

—Ganga kwe' wdila' na' til yell kon yell. ¹¹Na' gak no bedxo' wal, na' gat' wbin, na' biya yillwe' kwe' lo yell-lioni, na' biya dii gak xan yabana' dii wwall wsheban ben'.

¹²Na' ka zi gak diiki, gox'gake' le' na' biya dii gongakile' le'. Na' ljwa'gake' le' gana' chdop chllagcho choe'lwill-cho Chioza' na' yiya yiyljgake' le' na' koogake' le' lillya, na' ljwa'gake' le' lao ben' wñabia' xenka' na' lao ben' wñabia'ka' sto ni cha'. ¹³Na' kat' gak chele ka', na'chlə gat' latj we'le cho'a xtilaana' lawe'ka'. ¹⁴Na' bi sezle wñeyi naklə inale kat' ljsele lao ben' wñabia'ka', ¹⁵la' nad'kzan wzajniid' le' nakan inale na' gon' le' yel' sin'na' kwenche ni to ben'ka' chakzbangakile' le' bi sogakile' inagake'

bi nakan ka nale. ¹⁶Na' no xaxna'tezle, no ben' bish'le, no dialla chele, na' no ben' zoalenle wen gongake' le' lo na' ben' wñabia'ka', na' witgake' bal-le. ¹⁷Na' axt yog'zə ben' gaksbangakile' le' daa nonlilall'le nad'. ¹⁸Per li koo yichjle, Chioza' gaklene' le' na' ni tlish' yish' yichjlēna' bi kwiayi'. ¹⁹Na' shi sechale lawi daa yen ile'ile na' bi gachoplall'le, na'chan gat' to ye'l' mban chele dii bi te cheyin.

²⁰Na' kat' ile'ile nechj soldadka' Jerusalēni, kanan' inezile nan ba zoa kwiayi'n. ²¹Na'ch ben'ka' lle' gani mbani Judeani, chiyal' wxonjgake' lljakwash'gake' do yaa yaoka', na' ben'ka' lle' yelli, chiyal' wxonjgake', na' ben'ka' zej lyixaa, bichoklə yiyedgake' yelli. ²²La' kanan' gon Chioza' ye'l' zi' che yog'ze' kwēche yillinin doxen ka na Cho'a Xtilleena'. ²³iNyesh'laz wal gach che noolka' noa' na' noolka' chwall' chxop llana' gach diiki! La' dii xen daa yen ile'i ben' Israelki. ²⁴Balgake' guet lo wdila' na' zi bale' wche'gake' pres yell zit'ka'. Na' ben' zit'ka' wlej wshoshjgake' yell Jerusalēni axt kat'ch illin lla yiyoll yido ka llia bia' gongake'.

Kat'ka' yiyed Jesúza'

(Mt. 24:29-35, 42-44; Mr. 13:24-37)

²⁵Na' lo wbilla', lo bewaa na'ch lo beljka' gach dii gonan ka yibani ben'. Na' ben'ka' lle' yell-lioni gakshejlall'gake' na' illebgake' kat' gon nisdona' sshag wal daa so' kwe'n. ²⁶Na' axt ichol-lall' ben' daa chllebgake' kwiayi'lengake' yell-lioni, la' axt yog' diika' llia xan yabana' inibgakan. ²⁷Na'ch ile'gakile' nad', Ben' Bsel' Chioza' Yell-lioni, zizaa to lo bej kon ye'l' wak xen na' balaan xen. ²⁸Na' kat' solo gach diiki, li wtipch lall'le, la' ba zoa gaoshosh yidsla' len'.

²⁹Na' lekzka' bsees' Jesúza' to jempl chi'e:

—Li wwiakachi yag yixwewa' wa bichlə yag. ³⁰Kat' chle'ile ba chibia xlaguiinka', chakbe'ile ba zoa yiyoo la'o linna'. ³¹Ka'kzə, kat' ile'ile ba chak diiki ba wnia', chiyal' inezile ba zoa gao wli' Chioza' ye'l' wñabia' che'na'.

³²Dii li nia' le', aga ba wit ben'ka' zoa naa kat' gach yog' diiki. ³³Yabana' na' yell-lioni te chegakin, san cho'a xtillaana' aga wde bi gach ka nan.

³⁴Li wsak' bi we'le latj sho' diika' wxinjan yichjlall'do'lena'. Bi wlanzle yel' weezo, na' bi sezle wneyi bi chak chele. Li wsak' kwenche aga sha chel-le chon llana' zizaa. ³⁵La' tokonganzan gak diiki yen ile'i yog'te ben'ka' lle' doxen yell-lioni. ³⁶Na' le', li se wneyi, li inabi Chioza' toshiizi gaklene' le' kwenche yilale lao yog' diiki llia bia' gak, na' kwenche bi gall illeble sele lawa'na', nad', Ben' Bsel' Chioza' Yell-lioni.

³⁷Na' Jesúza' bli' bsdile' ben' yog' lla yoodo'na', na' ka chal, chjagaane' lo Yaa Olívoza'. ³⁸Na' yog' zil yog' ben' chajgake' yoodo'na' chjazenaggake' daa chli' chsedile'.

Wloogake' xnezin witgake' Jesúza'

(Mt. 26:1-5, 14-16; Mr. 14:1-2, 10-11; Jn. 11:45-53)

22 ¹Ba zoa gaozə lni Paskwa' kat' chaogake' yetxtil daa bi nchix levadúrana'. ²Na' bxozka' chnabia' len ben'ka' chli' chsedi leya' chiyiljall'gake' naklə gongake' witgake' Jesúza' ka kono gakbe'i, la' bllebgake' shi bi goni ben' wlall che'ka' legake'.

³Na'ch xan dii xiw'ka' daa le Satanás wyoon loo yichjlall'do' Jud Scariota', beena' nak txen ben'ka' shllin. ⁴Na' wyaje' lao bxozka' chnabia' len lao ben'ka' ngoo lall' na' ben'ka' chap yoodo'na', na' bi'e dill' nakan gone' Jesúza' lall' na'gake'. ⁵Na' le bibagakile' na' bchebgake' we'gake'ne' mech. ⁶Na'ch bchebe' gone'ne' lall' na'gake'. Na' wzolo chinoe' batan gat' latj kat' kono ben' lle' gone' Jesúza' lall' na'gake'.

Lle'na' zeelo wdaolengake' Jesúza'

(Mt. 26:17-29; Mr. 14:12-25;

Jn. 13:21-30; 1 Co. 11:23-26)

⁷Na' bllin llana' chsini'agake' che lnina', llana' chzolo chaogake' yetxtil daa bi' nchix levadúrana' na' chitgake' to xil'do', bana' gaogake' lle' Paskwa'. ⁸Na'ch wlej Jesúza' Pédrona' len Juanna' na' chi'e legake':

—Li ljasini'a daa gaocho lni Paskwi.

⁹Na'ch che'gake'ne':

—¿Garan cheenilo' ljasini'anto'n?

¹⁰Na' che' Jesúza' legake':

—Ka sho'le Jerusalénna', na' ile'ile to beṇ' byo zino'e to chee nis, na' li lljanoe' axt yooná' gana' yilline'. ¹¹Na' ye'le xan yooná': “Maestrona' chṇabile' li: ¿Garan zoa yooná' wyoone' gana' gaolene' beṇ'ka' nakgake'ne' txen lle' Paskwi?” ¹²Na' wliile' le' to yoo xen dii llia shkwiana' cha'lə ga ba nonshao'tie'. Nan' wsini'ale daa gaocho xshe'na'.

¹³Na' wloogake' nez zejgake', na' kon kayen' golle' legake' gok. Na' bsini'agake' daa wdaogake' lle' lṇi Paskwa'.

¹⁴Na' ka goḷ' gaogake' xshe'na', Jesúza' wche'lene' postl che'ka' cho'a mesa'. ¹⁵Na'ch chi'e legake':

—Ba goklall'chga' yeej gaolen' le' lṇi Paskwi naa bin' witgake' nad'. ¹⁶Na' ba nia' le', zeelo naa cheej chaw' dga. Bichga yeej gawa'n axt ki illin llana' wli' Chioza' yeḷ' wṇabia' xen che'na', kana'ch yeej gawa'n dii yoblə.

¹⁷Na' beṇee kopa' na' bi'e Chioza' yeḷ' choḵken, na' chi'e:

—Li gox' dga, li yeejan lat' wej. ¹⁸Na' nia' le', bichga yeej' nis uvani axt ki illin lla wli' Chioza' yeḷ' wṇabia' xen che'na'.

¹⁹Na'ch beṇee yetxtila' na' bi'e yeḷ' choḵken Chioza'. Na' bxoxje'n bi'en legake' kwenche wdaogake'n, na' chi'e:

—Dgan kwerp cha'ni, chzanlallidaan ni chele. Kin gonle kwenche lljadinile nad'.

²⁰Na' lekzka' bene' ka wde wdaogake' xshe'na', beṇee kopa' sto shii, na'ch chi'e:

—Dga yoll loo kopi zejín xchen'na' daa laljə ni chele daa gonan ka gakli dii koba' bcheb Chioza' gone'.

²¹'Na' naa, beena' gone' nad' lo na' beṇ'ka' chakzi'gakile' nad' chi'lene' nad' cho'a mesi. ²²La' ba bllin lla gak ka nak daa llia bia' gak cha', nad', Beṇ' Bsel' Chioza' Yell-lioni, per ṇyesh'laz gak che beena' gone' nad' lo na' beṇ' malka'!

²³Na'ch beṇ'ka' nakgake'ne' txen wzologake' chṇabi ljwellgake' noen' gone'ne' lo na' beṇ'ka'.

Gokgued beṇ'ka' nak Jesúza' txen nogaken' zak'chi

²⁴Na' lekzka' chakdi-len ljwellgake' nogaken' nak beṇ' zak'chi. ²⁵Na' che' Jesúza' legake':

—Zoa beṇ' wṇabia' to to nación, na' chongake' byen chzenag beṇ' chegake', na' nagake' che kwingake' le chaklengake'

ben'. 26 San le', bi chiyal' gonle ka'. Shi nole nakle ben' zakii, chiyal' wchek' yichjle ka to bi' xkwid', na' shi nole chnabia', chiyal' gonle ka nottezə ben' wen mandad. 27 ¿Noran nak ben' zak'chi?, ¿abeena' chbe' cho'a mesa' chawe'?, ¿anti beena' chon mandadan', lla? Beena' chi' cho'a mesan' nake' ben' zak'chi. San nad', la'kzi naktia' xanle, zoa' ladjleni ka to ben' wen mandad chele.

28 'Le' ba wzoalenle nad' lao yog'te daa ba gok cha'. 29 Na' daan, gon' le' yel' wnabia'na' ka daa ben' Xa'na' nad'. 30 Na' yeej gaolenle nad' gana' inabi'a. Na' kwe'le gana' inabia'le yizi'le kwent che shllin kwen ben'ka' nak xiin dia che dii Israela'.

Jesúza' wne' bi wcheb Pédrona' shi nombi'ene'

(Mt. 26:31-35; Mr. 14:27-31; Jn. 13:36-38)

31 Na' lekzka' golle' Simón Pédrona':

—Simón, Simón, Satanáza', daa chnabia' dii xiw'ka', ba wnanban le' gakte lo na'yin kwenche gondinj gonganin le'. 32 Na' nad' ba wnanbid' Chioza' gaklene' li', Simón, kwenche gonlilall'cho nad'. Na' kat' ba biyajilo' cheyi daa gono', na' gakleno' ben'ki nako' txen kwenche soachehgake' gonlilall'gake' nad'.

33 Na' che' Simónna':

—Xan', ba nchoglallaa laa lillyana' sa'len' li' wa axt guetlen' li' txen.

34 Na' che' Jesúza':

—Pedro, nia' li', naanlle' shon shii bi wchebo' shi nombi'o nad' ka zi' kwell shikwteza'.

Ba zoa gaoz wtił Jesúza' daa gak che'

35 Na'ch che' Jesúza' legake':

—¿Azyalljile bi byalljile kana' bsełaa le' na' bibi bex'le, ni ga koo xalaanle, ni mech na' ni xel-le?

Na' che'gake':

—Bibi byalljinto'.

36 Na'ch golle':

—Per naach nia' le', shi de ga chgoo xalaanle, li goxaan, na' shi de xmechle, li wa'n; na' shi nole bi de spad chele, li lljayet' xalena' na' li si' tlisha'n. 37 Nia' le', chonan byen gak cha' kon ka

na Cho'a Xtill' Chioza' gana' na: “Gongakile'ne' ka chongakile' to beṅ' wen dii mal.”

38 Na' che'gake':

—Xan', ni napnto' chop spad.

Na' chi'e:

—Lliz li soachoklə.

Be'lwill Jesúza' Chioza' gana' le Getsemani

(Mt. 26:36-46; Mr. 14:32-42)

39 Na'ch biza' Jesúza', na' kon ka yooloe' chone' biyaje' lo Yaa Olívoza', na' zjano beṅ'ka' nakgake'ne' txen. 40 Na' ka bllingake' latja', na' chi'e legake':

—Li we'lwill Chioza' kwenche bi we'zle latj gon beli chenna' le' gan.

41 Na' bkwase' kwite'ka', ka to ga zeelo chllin to yaj dii chza'l'cho, na'ch bchek' xibe'na' be'lwille' Chioza'. 42 Na' golle':

—Xa, shi li' cheenilo', bislagach nad' lawi dga ba zoa idil illag'; per aga gak ka cheenid', san gak ka cheenilo'.

43 Na'ch bli'lao to anjl beṅ' za' yabana' le', na' biyo'ene' fuerz. 44 Na' daa le chakyesh'chgaile', zizikli be'lwillche' Chioza' axt biyaklolje'. Na' nis yes che'na' daa chxop lo yona' nakan ka to bllon wej chen.

45 Biyoll be'lwille' Chioza', na' bizollee biyaje' gana' lle' beṅ'ka' nakgake'ne' txen, na' ka billine' kwite'ka' ba chesgake' daa chakyesh'gakile'. 46 Na' chi'e legake':

—¿Berache chesze? Li chas na' li we'lwill Chioza' kwenche bi we'zle latj gon beli chenna' le' gan.

Bex'gake' Jesúza'

(Mt. 26:47-56; Mr. 14:43-50; Jn. 18:2-11)

47 Ni choe'te Jesúza' dill', ka bllin beṅ' zan, na' beena' le Jud, beena' nak txen beṅ'ka' shllin, nchi'e legake'. Na' ka blline' jabiguee kwit Jesúza' na' bnope' xagueena'. 48 Na'ch che' Jesúza'ne':

—Jud, ¿akon dga bnope' nad' chono' nad', Beṅ' Bse'l' Chioza' Yell-lioni, lo na' beṅ'ki?

49 Na' beṅ'ka' lle'len Jesúza', ka ble'gakile' ka ba chak che',

na'ch gollgake'ne':

—Xan', ¿awñiyainto' spadki?

50 Na' toe' lii wdintie'n to mos che b̄xoz choo b̄xoz xenna' b̄chogtie' nague' de sh̄lina'. 51 Na' che' Jesúza':

—Bich bi gonile ben'ka'.

Na'ch bida' Jesúza' nag beena'. 52 Na' daa bllin b̄xozka' ch̄n̄abia' len ben'ka' chap yoodo'na', na' ben' golka' ch̄n̄abia', kwenc̄he gox'gake'ne', chi'e legake':

—¿Berache za'zle nox'le yag na' spad kwenc̄he zid̄n̄izle nad' ka to no ben' wban? 53 Yog' lla wzoa' lad̄jlena' yoodo'na' na' bi bex'le nad'. Per naach bllin lla gonle ka cheenile na' naayen' ch̄n̄abia' dii mala' daa ch̄n̄abia' gana' shgasj sh̄chol.

Bi b̄cheb Pédrona' shi nombi'e Jesúza'

(Mt. 26:57-58, 69-75; Mr. 14:53-54, 66-72;

Jn. 18:12-18, 25-27)

54 Na'ch bn̄izgake' Jesúza' na' b̄che'gake'ne' lill b̄xoz choo b̄xoz xenna', na' zit' zit'lə zjano Pédrona'ne'. 55 Na' bxengake' yi'na' lesh' chyoo che b̄xoz choo b̄xoz xenna' na' wche'gake' cho'a yi'na', na' wlen Pédrona' legake'. 56 Na' to noolə wen mandad, ka ble'ile' chi' Pédrona' cho'a yi'na', lii wzetie' chwie'ne', na' ch̄le':

—Lekzka' len beenin nake' Jesúza' txen.

57 Na' Pédrona' aga b̄chebe', na' chi'ene':

—Noolə, aga nombi'a beena'.

58 Na' gokzə xtit bizle'i ben' yoblə Pédrona' na' chizi'ene':

—Lekzka' lenon' nako' ben'ka' txen.

Na' Pédrona' chi'ene':

—Bi len' nak' ben'ka' txen.

59 Na' wizak ka do zi' tgor na' wize' sto ben' yoblə:

—Dii likzan len beeni nake' txen Jesúza' la' lekzka' ben' Galilean.

60 Na'ch che' Pédrona'ne':

—iNi bi nēzid' bi dillaan choo!

Na' ni che'telə Pédrona' ka', ka wchell to shikwtez. 61 Na'ch biyechj Xancho Jesúza' bwie' Pédrona', na' Pédrona' jadinile' daa golle'ne', kana' chi'e: “Naanlle' shon̄ shii bi w̄chebo' shi nombi'o

nad' ka zi' kwell shikwteza!." 62Na' bichej Pédróna' gana' lle' ben'ka' na' wchellyeshee.

Btítjgakile' Jesúza'

(Mt. 26:67-68; Mr. 14:65)

63Na'ch ben'ka' chapgake' Jesúza' btítjgakile'ne' na' wdap' wllall'gake'ne'. 64Na' bsejgake' jalawe'na', na'ch wllall'gake'ne', che'gake'ne':

—¡Wnashki non wllall' li'!

65Na' biya dii gollgake'ne' kwenche gakile' zi'.

Wde Jesúza' lao ben'ka' chñabia'gake' ben' Israelka'

(Mt. 26:59-66; Mr. 14:55-64; Jn. 18:19-24)

66Na' ka wyeeni', bidop ben'ka' chñabia' ben' Israelka', len bñozka' chñabia' na' ben'ka' chli' chsedi leya'. Na' bdegake' Jesúza' lawe'ka'. Na'ch wñabgakile'ne', che'gake':

67—Wnashki neto' shi li'kzan Crístóna', beena' chbeznto'.

Na' che' Jesúza':

—Shi ñña' le': "Awe, nadaan", aga wyajle'le cha'. 68Na' shi ññabid' le' bi dii ññabid' le', aga williilen na' ni bi yisanle nad', shi ñña. 69Na' ñaate, nad', Ben' Bsel' Chioza' Yell-lioni, kwi'a kwit de shli che Chioza', beena' nap ye' wak xenna'.

70Na'ch yog'ze' wñabgakile'ne':

—¿Ana' lin' nako' Xiin Chioza'?

Na'ch che' Jesúza':

—Awe, shlikzan ba wnale.

71Na'ch che' ljjwellgake':

—Kochno chyalljicho gawe' xya che beeni. Kwintekzcho ba benicho ka ba wne'.

Wde Jesúza' lao Pilátóna'

(Mt. 27:1-2, 11-14; Mr. 15:1-5; Jn. 18:28-38)

23 1Na'ch yog'lol ben'ka' bizolla'gake' na' jwa'gake' Jesúza' lao Pilátóna'. 2Na'ch wzologake' chaogake' xya che Jesúza', che'gake':

—Ba bidolinto' beeni chta chñie' ben' wllall chento'ka'. Chi'e bi chiya' chixjcho daa chñab Césara', beena' chñabia', na'

l̄ekzka' naze' nake' Crístona', na' daa ne' ka' zej̄in nake' to ben' w̄nabia'.

³Na'ch w̄nabi Pilátona' Jesúza', chi'ene':

—¿Alin' nako' ben' w̄nabia' che ben' Israelki?

Na'ch che' Jesúza'ne':

—Kan' nakan.

⁴Na'ch che' Pilátona' b̄xozka' ch̄nabia' na' yog' ben'ka' lle' na':

—Ni to dii mal bi chillelid' chon beeni.

⁵Na' zizikchli che'gake':

—Diika' chli' chsedile' chta ch̄nen yog'lōl ben' lle' doxen lallnto'ni. Wzoloze' Galileana', na' axt Judeani ba bide'.

Bde Pilátona' Jesúza' lao Heródeza'

⁶Ka gollgake' Pilátona' ka', na'ch w̄nabile' l̄egake' shi nak Jesúza' ben' Galilea. ⁷Na' ka w̄nezile' nake' ben' Galilea, na'ch bdie'ne' lao Heródeza', beena' n̄lane' ch̄nabi'e Galileana', l̄a' kana'yen' zoa Heródeza' Jerusalénna'. ⁸Na' l̄e bibayi Heródeza' ka ble'ile' Jesúza', l̄a' ba wlla cheenile' ile'ile'ne' daa ba benile' choe' ben' xtilleena'. Na' goki Heródeza' ile'ile' gone' to yel' wak. ⁹Na' biya dii w̄nabile' Jesúza', na' ni to daa w̄nabile'ne' bi billi'e. ¹⁰Na' l̄ekzka' na' lle' b̄xozka' ch̄nabia' len ben'ka' chli' chsedi leya', na' zizikli chaogake' xya che Jesúza'. ¹¹Na'ch Heródeza' len soldad che'ka' biya dii bengakile'ne', na' btitjgakile'ne' bwakwgake'ne' to lech' ka daa chakw to ben' w̄nabia'. Na'tech bizsel' Heródeza'ne' lao Pilátona'. ¹²Na' lo llana' bizoalen Pilátona' Heródeza' wen, l̄a' kana'te chakzbani ljwelle'.

B̄choglogake' guet Jesúza'

(Mt. 27:15-26; Mr. 15:6-15; Jn. 18:39–19:16)

¹³Na'ch biti'a Pilátona' b̄xozka' ch̄nabia', na' ben'ka' ch̄nabia'gake' ben' Israelka' na'ch ben' yell, ¹⁴na' golle' l̄egake':

—Le' bidwa'le beeni lawii, nale chta ch̄nie' ben', na' nad' ba w̄nabidee laoleni, na' bi chillelid' ni to daa nale che' shi l̄i ka chone'n. ¹⁵Na' ni Heródeza' bi billelile' shi bi dol' nap beeni, na' ba bizseleene' laochoni. Na' ba ble'teile aga bi bene' inacho w̄choglozcho guete'. ¹⁶Na' naa gon' mandad wit chingake'ne' na'tech yisane.

17Na' ka chakz yog' yiz, chiya_l' yisane' to beena' nej lillyana' kat' cha_l' Ini Paskwa'. 18Na' yog' be_n'ka' ndop nllag na', wzologake' chosyaagake', che'gake':

—¡Guettega beeni! ¡Na' bisan Barrabáza'!

19Nyixjgake' Barrabáza' lillyana' daa bxie' wdila' yell Jerusalénna', na' bettie' to be_n'. 20Na' daa cheeni Pilátona' yisane' Jesúza', na' stokzə w_nabile' be_n'ka' shi wisane'ne'. 21Na' be_n'ka' zizikchli chosyaagake', che'gake':

—¡Bdee lee yag cruza'! ¡Bdee lee yag cruza'!

22Na' de wyon shiyi che' Pilátona' legake':

—¿Bera dii malan' nezile ba ben beeni, lla? Bi chillelid' ni to dii mal dii ba bene' kwenche guete'. Gonch' mandad wit chingake'ne' na'tech yisane.

23Na' be_n'ka' wzeyidgake' chosyaagake' chnabgakile'ne' wdeene' lee yag cruza'. Na' daa wzeyidgake' chosyaagake', bengake' gan wzoa xtilleeka'. 24Na' bchoglall' Pilátona' gone' ka cheeni be_n'ka'. 25Na' bisane' beena' w_nabgake', beena' de lillyana' daa bxie' wdila' na' daa bettie' to be_n'. Na' bene' Jesúza' lo na'gake' kwenche gongakile'ne' ka chaklall'gake'.

Bda'gake' Jesúza' lee yag cruza'

(Mt. 27:32-44; Mr. 15:22-32; Jn. 19:17-27)

26Na' ka nche'gake' Jesúza' lljada'gake'ne' lee yag cruza', billaggake' to be_n' Cirene lie' Simón zizee lyixaa. Na' bex'gake'ne' bwa'gake'ne' yag cruz che Jesúza' na'ch janoe'ne'.

27Na' be_n' zan zjanogake'ne', na' zan noolka' chbellgake' na' chosyaagake' ni che Jesúza'. 28Na' biyechj Jesúza' bwie' legake' na' golle':

—Le' nool Jerusalén, bi kwellzle cha'; li kwell che kwinle na' che xiinleka'. 29La' wllin lla kat' ina be_n': “Chakomba nool willka', be_n'ka' bi wxan na' bi bwall bxopgake'.” 30Na'ch be_n'ka' zoa llana' gak ka', solo inagake': “She_l' iyinjttega yaa yaoki idakwtegan neto'.” 31Shi yag yaa yag banna' chongakile'n kon daa nazan chegake', zalechla ki gongakile' yag billa'?

32Na' lekzka' nche'gake' chop be_n' wen dii mal kwenche witgake' legake' txen len Jesúza'. 33Na' ka bllingake' latja' gana' le Llit Yichj Be_n' Wet, bda'gake' Jesúza' lee yag cruza'. Na' lekzka'

bda'gake' chopte ben' wen dii malka' shlaa wej kwite'na'. 34Na' ka chda'gake' Jesúza' lee yag cruza', chi'e:

—Xa, wxi'xen chegake', la' aga nezgakile' bin chongake'.

Na' soldadka' bengake' to wyitj kwenche wnezgakile' nogake' yidol' xe'na'. 35Na' lle' ben' zan chwiagake', na' axt ben'ka' chnabia'gake' ben' Israelka' btitjgakile'ne', nagake':

—Gok bisle' ben' yoblə, na' naa yislashki kwine' shi leile' len' Crístona', beena' ba wlej Chioza'.

36Na' lekzka' soldadka' btitjgakilene', na' jabig'gake' kwit yag cruza' gana' nda'gake'ne' na' bshabgakile'ne' to vino dii nak zichj zla'. 37Na' che'gake'ne':

—Shi lin' nako' ben' wñabia' che ben' Israelki, bislashki kwino'.

38Na' yichj yag cruz che'na' bda'gake' to dii cho'en dill' biçhe nda'gake'ne' lee yag cruza', nan: “Beenin ben' wñabia' che ben' Israelka'.” Bzejgake'n dill' griego, dill' latín na' dill' hebreo.

39Na' to ben' wen dii mala', beena' da' kwit Jesúza', biya dii golle'ne', chi'ene':

—Shi lin' Crístona', Beena' Bsel' Chioza' inabia', bislashki kwino' na' lekzka' bisla neto'.

40Na' beena' sto bsheshlene'ne', chi'e:

—¿Abikzə chall chlleblatoo Chioza'?, len kon ka chak chen' ba chak cho'. 41Cho', ka chiyal'kz gag chechon' kwenche chixjcho che dii mala' daa bencho; san beeni aga bi dii mal bene'.

42Na'ch golle' Jesúza':

—Jesús, lljadingachilo' nad' kat'ka' solo inabi'o.

43Na'ch che' Jesúza'ne':

—Dii li nia' li', ñaanlla soaleno' nad' latja' gana' nak mbalaz.

Wit Jesúza'

(Mt. 27:45-56; Mr. 15:33-41; Jn. 19:28-30)

44Na' do ka gobill biçhol doxen yell-liona', bllinte do ka chida shon, 45daa bich bzeeni' wbillla'. Na' lechaa ze loo yoodo'na' bllon' gokan chop laalə. 46Na'ch besyaa Jesúza' zilljə, chi'e:

—Xa, chiyon' bishbe cha'ni lall' noo.

Na' biyoll golle' ka' na'ch wite'.

47Na' ka ble'i beena' chnabia' soldadka' diika' gok, be'lawee Chioza', chi'e:

—Dii li beeni nake' dowalj ben' wen.

48Na' yog' ben'ka' lle' na', ka ble'gakile' ka gok, ziyajgake' chball'gake' cho'alcho'eka'. 49Na' yog' ben'ka' nombia'gake' Jesúza', do noolka' za'lengake'ne' axt Galileana', wzegake' zit'lə chwiagake' ka gok.

Bkwash'gake' Jesúza'

(Mt. 27:57-61; Mr. 15:42-47; Jn. 19:38-42)

50Wzoa to ben' wlie' José, ben' yell Arimatea, daa mbani Judéana'. Na' Joséna' nake' txen ben'ka' chn_uabia' ben' Israelka'. Nake' to ben' wen na' to ben' chon ka cheeni Chioza', 51na' zoe' chbeze' wsel' Chioza' beena' in_uabia'. Na' Joséna' aga wyoolallee ka ben ben'ka' chn_uabia'lene' daa betgake' Jesúza', na' bi benlene' legake' txen. 52Na'ch wyaje' lao Pilátona' na' wn_uabe' lsens yiletje' kwerp che Jesúza'. 53Na' biletje'ne' lee yag cruza', na'ch bitobe'ne' to lech' xen na' jlo'ene' to loo blej daa benschawee, ga bin' wkash'gake' ni tlish' ben' wet. 54Na' llana' gok diiki nakan lla chsini'a ben' Israelka' chegake' kwenche bibi llin gongake' lla sabda', llana' chombaangake', na' zi lat'zə chyalj solo llana' chombaangake'.

55Na' noolka' za'lengake' Jesúza' axt Galileana', wyajgake' jawiagake' bleja' na' jale'gakile' nak wdixjgake' kwerp che'na'. 56Na'ch biza'gake', na' ka billingake' gana' zoagake', benschao'gake' daa chla' zix. Na' bizi'lall'gake' lla sabda' kon ka na leya'.

Biban Jesúza' ladj ben' wetka'

(Mt. 28:1-10; Mr. 16:1-8; Jn. 20:1-10)

24 1Na' lla necha' chizolo xmanna', wizaj noolka' ni bal cho'a bana', nox'gake' diika' chla' zix daa benschao'gake', na' wyaj zi bal noolə yoblə kon legake'. 2Na' ble'gakile' aga chi'ch yaja' cho'a bana'. 3Na' wyoogake' loo bleja', na' ble'gakile' aga bich bi kwerp che Xancho Jesúza' de na'. 4Na' shlak chakgakile' bera zejín dga, kat'kzali ble'gakile' chop ben' byo, nakwgake' lech' dii chey cheeni', zegake' kwite'ka'. 5Na' noolka' bllebchagake' na' bchek' yichje'ka' axt lo yona'. Na'ch ben'ka' zena' che'gake':

—¿Berache chiyiljzle beena' mban ladj ben' wetki? 6Kochno de ni. Ba bibane' ladj ben' wetki. Li lljadini daa wne' le' kana'



Na' ble'gakile' aga chi'ch yaja' cho'a bana'. Lc. 24:2

zoalene' le' Galileana'. 7 Wne' chonan byen Beena' Bsel' Chioza' Yell-lioni gake' lo na' beñ' malka', na' witgake'ne' lee yag cruza', na' ka yiyon̄ lla yibane' ladj beñ' wetka'.

8 Na'ch jadini noolka' daa goll Jesúza' legake'. 9 Na' biza'gake' biyajgake' gana' lle' postlka' shnej len yog' beñ'ka' sto gokgake'ne' txen, na' be'gake' dill' yog' daa gok chegake'. 10 Na' noolkin jayellgake' postlka' daa gok chegake': María beñ' yell Magdálana', Juánana', María x̄na' Jacóbona', na' len zi bal̄ nool yobl̄. 11 Na' postlka' ni lat' bi wyajle'gake' daa goll noolka' legake' daa gokgakile' bizan chon chnagake'.

12 Na' Pédrona' wzee zejdoe' cho'a bana', na' ka blline', bwie' loo bleja' na' ble'ile' lech'ka' chi'gakan ka'l̄. Na'ch bizee zjade' gana' zoe' chibanile' ka nak daa ba gok.

Bli'lao Jesúza' chop beñ' tnez Emaúza'

(Mr. 16:12-13)

13 Na' lo llana' gok ka', chop beñ'ka' nak Jesúza' txen wyajgake' to yell dii le Emaús, na' n̄laa ljwellin ka do shnej kilometro kon

Jerusalénna'. 14Na' lo zej ngoogake' nez choe'gake' dill' cheyi diika' ba gok. 15Na' shlak choe'gake' dill' cheyi diika' gok, na' jabig' kwín Jesúsza' kwite'ka' na' zejlene' legake' txen. 16Na' la'kzi chwiagake'ne', aga gokbe'gakile' no beena'. 17Na'ch wñabi Jesúsza' legake':

—¿Bera dillaan choe'le za'le ni? ¿Berache chakyesh'zile?

18Na' toe', beena' le Cleofas, chi'ene':

—Yog'zə ben' nezgakile' daa ba gok Jerusalénna' llaki ba wde. ¿Astozo' li' bi nezilo' daa ba gok?

19Na'ch chi'e legake':

—¿Beran gok?

Na'ch che'gake':

—Diika' gok che Jesús, ben' Nazareta'. Goke' to ben' wdixjee daa che' Chioza'ne', na' bene' yel' wak na' bi'e dill' zakii dii nak shli lao Chioza' na' lao ben'. 20Na' bñozka' chñabia' na' ben'ka' chñabia'gake' cho' ben' Israel bengake'ne' lo na' joschiska' kwenche bhoglogake' che' guete', na' bda'gake'ne' lee yag cruza'. 21Neto' nonnto' lez nan len' yibeje' cho' ben' Israel lo na' ben' zit'ka'. Na' ba gok shon' lla gok diiki. 22Na' bal' noolka' nak neto' txen wyajgake' cho'a bana' daa baabali, na' le bibaninto' ka wnagake' 23bich ble'gakile' kwerp che'na' gana' bkwash'gake'ne'. Na'ch bila'gake' nagake' ble'gakile' chop anjl, ben' goll legake' mbankzə Jesúsza'. 24Na'ch wyaj bal' ben' byoka' nonlennto' txen cho'a bleja', na' nakan kon ka wna noolka', per aga no Jesúsza' ble'gakile'.

25Na'ch che' Jesúsza' legake':

—¿Le' ben' bi chajni! ¿Bi llabia' bat shajle'le daa bzej dii ben'ka' wdixjee daa goll Chioza' legake'? 26¿Abi nezile lliakzə bia' biya daa yen ile'i beena' nak Crístona' ka zi' yiyo'e gana' sho'e balaan xenna'?

27Na'ch wzoloe' chzajniile' legake' Cho'a Xtill' Chioza' gana' cho'en dill' che kwine', wzoloe' zigaate kon daa bzej dii Moiséza', na'tech diika' bzej yog' ben'ka' wdixjee daa goll Chioza' legake'.

28Na' ka bllingake' yella' gana' zejgake', bentezə Jesúsza' ka ben' shaj gan yoblə. 29Na' ben'ka' bengake' byen yigaanlene' legake', che'gake'ne':

—Bigaanlen neto', la' ba wlle' naa, na' ba chal.

Na'ch wyoo Jesúza' bigaanlene' legake'. ³⁰Na' ka ba chi'gake' cho'a mesa', be_xee to yetxtil na' bi'e yel' cho_xken Chioza', na'tech bxoxje'n na' bi'en legake'. ³¹Na'ch biyombia'yen'gake' nan len' Jesúza', na' to binitloze'. ³²Na'ch che' ljwelle':

—¿Bera daan, axt mbalaz inleeb chibayi lall'do'chona' kana' za'cho tneza' choe'lene' cho' dill' chzajniile' cho' Cho'a Xtill' Chioza'!

³³Na'ch lii biza'tegake' ziyajgake' Jerusalénna'. Na' ka billingake', ndop nllag postlka' shnej na' nochlə ben'ka' nakgake'ne' txen, ³⁴na' gollgake' legake':

—Dii likzan ba biban Xanchona' ladj ben' wetka'. Ba bli'lawe' Simónni.

³⁵Na'ch ben'ka' chop gollgake' legake' ka gok chegake' tneza', na' ka biyombia'gake' Jesúza' ka bxoxje' yetxtila' bi'en legake'.

Jali'lao Jesúza' ben'ka' nakgake'ne' txen

(Mt. 28:16-20; Mr. 16:14-18; Jn. 20:19-23)

³⁶Na' shlak ni choe'gake' dillaa, tokonganzi jaze Jesúza' ladje'ka' na' bwape' legake' chiox, chi'e legake':

—Soashgale mbalaz.

³⁷Na' le bllebgake' daa chakgakile' yel b_xenzan chwiagake'. ³⁸Na' che' Jesúza' legake':

—¿Berache chllebzle? ¿Biche chak choplall'zle? ³⁹Li wwia ni'a na'ki kwenche inezile nad'kzan. Li gox' nad' kwenche inezile aga nak' to yel b_xen, la' to yel b_xen bibi bel' bibi llit yoon ka nak' nad'.

⁴⁰Na' ka golle' legake' ka', bliile' legake' ni'a neena'. ⁴¹Na' yel' chiba chizaki che'ka' na' yel' chibanina', ni bi chakbe'gakile' shi lekzen'. Na'ch chi'e legake':

—¿Abi de lat' dii gaocho?

⁴²Na'ch be'gake'ne' lat' bel' ba bwey'gake' lo yi'na'. ⁴³Na' be_xeeb wdawe'b chwiategake'. ⁴⁴Na' chi'e:

—Ka nak daa ba gok cha', lennan' wnia' le' kana' ni zoalen' le', kana' wnia' llia bia' yillinin gak cha' yog' diika' bzej dii Moiséza', na' diika' bzej dii ben'ka' wdixjee daa goll Chioza' legake' na' diika' da' lee sálmoka'.

⁴⁵Na'ch ben Jesúza' ka wyajni'gakile' diika' na Cho'a Xtill' Chioza', ⁴⁶chi'e legake':

—Cho'a Xtill' Chioza' nan: chonan byen Crístona', biya dii yen ile'ile' na' witgake'ne' na' yiyon̄ lla yibane' ladj ben' wetka'. 47Na' lekzka' nan: ides cho'a xtilleena' daa nan shi yiyaj yileni ben' dii malka' chongake' na' yiyakxen chegake'. Na' solozan Jerusalénni na' illiljan doxente. 48Na' le' chiya! ye'le ben' yog' diiki ba ble'ile gok cha'. 49Na' nad' wselaa beena' bcheb Xa' Chioza' gone' gaklene' le', na' li soatezə Jerusalénni ax̄t kat'ch Xa'na' gone' le' ye! waka' daa za' yabana'.

Biyep Jesúza' yabana'

(Mr. 16:19-20)

50Na'ch bche' Jesúza' legake' wyajgake' yell Betániana'. Na' bl̄is neena' benleeye' legake'. 51Na' ni chonleeytie' legake', ka bikwase' kwite'ka' na' biyep'e yabana'. 52Na' ben'ka' nakgake'ne' txen, biyoll be'la'ogake'ne', biza'gake' ziyajgake' Jerusalénna' chiba chizakgakile'. 53Na' wzoatezi wzoagake' be'la'ogake' Chioza' yoodo'na'.